



SUPP 57.307/A


ERNOTEL, CH

222.

~~96.~~

Nb III 4 d

Nr. 9



1.
C. H. E. D.
DE
ITINERE
SUO
ANGLICANO
ET
BATAVO

Annis 1706 et 1707 facto,
RELATIO

Ad Amicum

D. G. de K. A. C.

Qua variae ad Anatomiam, Chirurgiam,
Botanicam et Materiam Medicam spe-
ctantes observationes sistuntur.

Accedit huic novae editioni Praefatio, qua ma-
lignae **JANI GREGORII BETULII** ob-
trectationes de Relatione hac in Epistola
ad Amicum anno superiori 1710.
propositae, solide refutantur.



AMSTELODAMI

J. E. Meusel

Apud **JANSSONIO-WAESBERGIOS.**

M. DCCXI.

312019



B. C. D.

LECTORI

BENEVOLO

S. P. D.

CHRISTIANUS HENRICUS ERNDL. D.



NOTA est curiosis acuti Hispani *Michaelis de Cervante* Satyrica fabula, qua Thraſonum importunae actiones et vanae ostentationes, sub *Don Quixote de la Manche* ficto nomine, ingeniose perstringuntur. Inter alia hujus Satyrae singularia placet omnino historia illa, qua *Don Quixote* insignem suum prodit errorem phantasticum. Accidit enim aliquando illi cum famulo iter facienti, in transitu molendinum alatum offendere, quod hic, ob singularem, quem faciebat in aëre strepitum, et reliquum, quem sibi de hoc concipiebat apparatus, pro armato gigante cataphracta instructo sibi que insidiante habens, furore Heroico afflatus,

nunc lancea sua , nunc stricto gladio adoritur , atque in debellando hoc putatitio gloriae suae hoste , lacertos perquam strenue exercet , usque dum alarum molendini vehementior motus , lancea fracta , equitem miserum humi prosterneret , et non sine maxima animi confusione corporisque contusione , errore cognito , à pugna cessare suaderet . Hoc in memoriam incidebat commentum statim ac insignis cujusdam in bello Critico Herois , cui sub *Jani Gregorii Betulii* nomine latere placuit , *vidi Epistolam ad Amicum , qua ea , quæ C. H. E. D. in relatione de Itinere suo Anglicano et Batavo Annis M DCCVI et M DCCVII factò de Augusta Bibliotheca Wolfenbuttelenfi , et Seren : Ducis Antonii Ulrici Secessu in Salinarum Valle , recenset , examinata multiplicis arguuntur falsitatis etc.*

Nam , ut brevibus me expediam , bonus ille Vir idem cum edito ante annum scripto meo agere mihi videtur , quod mente captus *Don Quixote* cum molendino alato egit . Hic figura monstrosa ac strepitu Panico deceptus , molendinum pro Gigante armis debellando habuit ; ille non minus prae nimia philautia atque arrogantia mente et oculis quasi privatus , in-

nocentem illam , quam *de Itinere Anglicano et Batavo* edidi relationem , pro Critico de Bibliothecis atque Antiquitatibus habens specimine , cocco impetu adoritur , et ut insignis Criticus omnes pro refutando illo , quem forte offendit , *de Bibliotheca Augusta et Secessu Ducali in Saltz-Thalen* , in transitu à me visis , loco , intendit nervos. Res ita se habet. Ante annum , brevi ante meum è Saxonia in Poloniam abitum , edidi observationes in unum fasciculum collectas , quas in itinere illo , quod per Angliae quaedam et Foederati Belgii loca feci , collegeram , et id quidem in gratiam Amici cujusdam , mihi ob singularem , quam in Academiis cum ipso quondam habui familiaritatem , singulariter chari , *Domini D. G. de K. Archiatri Caesarei et Nat. Cur. German. Collegae* , utpote cui à longo ante tempore promiseram , omnia illa sincere impertire , quae mihi inter peregrinandum tunc notatu digniora visa fuissent. Observationes illas eo magis typis excudi passus fui , quod in Anatomicis aliisque ad rem Medicam spectantibus , nonnulla ibi occurrere scirem , quae rariora et nondum descripta existimabam. Quod autem locum de Bibliotheca et hortensi Palatio

Wolfenbüttelenſi attinet , quorum in tranſcurſu mentio à me facta fuit , nil minus , quam adeo contumelioſam refutationem et dicam illum mihi pariturum fore , credidiſſem , qui de Bibliothecis vel Antiquitatibus ex profeſſo ſcribere , nunquam conatus fui . Operoſiorem igitur dictae refutationi opponere deſenſionem , non adeo neceſſarium eſſe , quivis prudentior et aequuas controverſiarum Judex facile videbit . Aſt ne in ingratum ſuam contuliſſe operam queri neceſſe habeat Auctor , quam fieri poteſt breviter manifeſta illa falſa et fraudes demonſtrabo , quae ipſe commiſit Criticus vapulans , dum Relata mea in genere falſitatis multiplicis arguere auſus fuit . Attingere autem praecipua ſaltem licebit , dum propter leviora quaedam errata cum ipſo in arenam deſcendere ridiculum eſſet legentibus , mihi autem nec libet , nec licet , utpote qui in tali vitae et officii conditione vivo , ut adminiculis ac tempore ad operoſam refutationem neceſſariis privatus fere penitus exiſtam : In ejuſmodi enim regione et locis , ubi bello , fame , peſte aliisque miſeriis circum circa flagrant omnia , ſilere Muſas , facile quivis judicare poterit .

Quod igitur primo dictae Bibliothecae
Se-

Secretarium vel Custodem attinet , *Dominum Reinerding* , *falsissimum est* , *me illum pro Bibliothecae Praefecto in scripto meo habuisse* , uti expudorata satis fronte lectoribus suis persuadere satagit *Betulius* . Neque enim ex illo , quo usus fui Bibliothecarii vocabulo , tale quid evinci potest . Siquidem omnis is , cui arcanorum Bibliothecae cujusdam cura committitur , bono modo Bibliothecarii nomen sibi vindicare potest , licet in eminentiori gradu & potestate eidem aequae non sit praefectus . Nullo modo etiam *Illustris Leubnitzii* gloriae ac meritis quicquam silentio meo , me derogasse demonstrari potest . Est enim Viri hujus Nomen Celebratius , quam ut commendatione mea egeat , et verendum potius mihi fuisset , ne laudare sit detrachere , cum exigua mea scriptio , praestantiam tanti Viri non facile sit assecutura . Quid igitur opus erat ejus , ut Bibliothecae Praefecti meminisse , cum jam aliis praesit in Regis Borussiae atque Electoris Hanoverani aulis muneribus , iisque praecipuis , quae Bibliothecae praefecturam facile obscurare possint . Accedit , quod eo tempore , quo ego Bibliothecam invisi , non fuerit in loco praesens . Quod autem ejus *Adjunctum Ampliss: Dominum*

Laurent. Hertelium concernit, hunc unica modo, si recte memini, vice, atque in transitu saltem in ipso Bibliothecae limine, videre contigit. Quid igitur tanta reprehensione dignum peccaverim, Dn. Reynerding Bibliothecarium nominando, non video: ad minimum mei respectu tunc Bibliothecarium egit, cum incomparabilem illum Rei literariae Thesaurum ipse solus mihi monstravit. Errorem ratione nominis commissum, dum Leitharding pro *Reinerding* posui, casu accidisse sciat. Nam ex pugillaribus meis, quibus tunc observata mea mandaveram, nomen, ob intentatam deletionem non satis clare post aliquod tempus distinguere atque agnoscere potui, fallente interim memoria, quae in peregrinis praesertim nominibus comminiscendis, non omnibus adeo semper fida esse solet. Quem de *figura futuri aedificii*, in quo postero tempore Bibliotheca erit asservanda, objicit errorem, tantus certe haud est, quantum Auctor facit. Et ridiculum mihi videtur, quod in *Epistola sua* de hac sequentibus profert. *Quare dum fundamenti figura jam tum parallelogramma fuit, in aliam formam ipsum aedificium succrescere facile non potuit.* Persuatum quidem omnino

nino habeo , architectum pro extruendo ovalis figurae aedificio , fundamento non facile uti paralelogrammae : ast , an inde sequatur quod fundamento parallelogrammae figurae non imponi possit aedificium ovalis , hoc est quo de valdopere dubito.

Insigne falsum me porro commisisse putat , dum *per quadraginta amplius annos , Bibliothecam Augustam auctam magnopere non fuisse , enarravi*. Maxime speciosa relatione augmentum hujus Bibliothecae à p. 28. ad 36. probare è contrario fatagit , quae tamen si accuratius perpendatur , meam narrationem probat potius quam destruit , ipsum autem Auctorem , prae nimia philautia caecutientem , turpiter confundit. Sit ita , lubentissimè concedam , accessisse interea temporis Bibliothecae libros illos omnes tam manuscriptos , quam typis expressos , quorum paginis allegatis fit mentio : numero centum amplius sint codices manu scripti , quos antiquissimi Alsatiae monasterii Weissenburgensis quondam cives , Pragam postmodum delatos , in Seren: Principum Bibliothecam tandem transiisse , constat: accedant , ut ipse in Relatione mea monui , ex publicis librorum auctionibus apud Batavos , novem abhinc annis ac-

A 5

qui-

quisiti multi , non ubivis obvii , eximii libri : adnumerentur his juridici illi , quorum auctor *p. 33.* facit mentionem , quibus Galliae provinciarum consuetudines communi iis sermone explicantur : Stolidus tamen est , qui inde persuadere vult aliis , Bibliothecam his accessionibus debito modo fuisse auctam : Bibliothecam nimirum universalem , qualis *Augusta* esse debet , et in quam quadrare omnino oportet , quod *Clariss: Gabr. Naudaeus in Diss: de instruenda Biblioth:* scribit : *conquirenda esse omnium librorum genera , et nullum librum esse tam malum aut reprobum , qui bibliothecam ingredi non debeat , et qui non aliquando ab hoc vel illo desideretur .* Positis his evolvat curiosus paululum vel unicus *Corn: van Beughem Bibliographias , Theologicam , Juridicam , Medicam , Philosophicam , Philologicam , Historicam , Chronologicam , Geographicam , Mathematicam et Artificiosam cum Apparatibus vel Supplementis* , quibus libri recensentur , ab anno superioris seculi sexagesimo primo ad haec usque fere tempora typis expressi : conferat postea numerum eorum , qui ab obitu *B. Ducis Augusti* usque ad initium praesentis seculi decimi octavi editi sunt , cum apparatu illo , qui ex recensitis libris in

una vel altera auctione Batava comparatis, (qui tamen ad quingentos numero vix ascendent) et *Ancillonii transmissis Juridicis* Gallorum exsurgit, et ne centesimam quidem librorum à quadraginta hinc annis editorum partem, omnes jam recensitos conficere, fateri necesse habebit, assumpta in numerum et supplementum illa etiam accessione, quæ ex *Seren: Ducis Rudolphi Augusti* privata Bibliotheca, vel ex librariorum decimatione, aliorumque donatione, in subsidium venire potest.

Plane etiam impertinentia sunt, quæ contra me effutire non erubescit auctor falsarius, dum falso a me scribi commemorat, eam *librorum supellectilem, quam Rudolphus Augustus in privatos collegerat usus, Augustae Bibliothecae non accessisse*. Cum enim *Rudolphi Augusti* Bibliothecam nominavi, totam illam intellexi, et talis nunquam in Bibliothecam Wolfenbuttelensem translata est, sed, si quid ex hac, parva saltem erat totius particula, id quod ipsum fateri adversarium meum p. 36. ex his suis diserte liquet: vides simul præcipua Bibliothecae *Rudolphi Augusti Ducis* fata, quæ in eo fere consistunt, quod dispersa fuerit, quum in vivis adhuc esset

Sere-

Sereniss: Possessor: et quod magis dispersa sit post beatum ejus obitum etc. Quam frivola haec auctoris inconsiderantia, quam inconsultum et temerarium contradicendi studium! Qui prae nimia animi elatione aliorumque contemptu, ipse sibi non constat, et aperte omni occasione sibi ipsi contradicit.

Quam fraudulenter et proterve mecum etiam non agit auctor, dum p. 41. et 43. *de Conciliis Generalibus Bibliothecae statuisse me accusat, illa ex Bibliothecae Mazari-nianae auctione à persecutoribus Cardinalis quondam instituta, comparata fuisse, quae de re tamen nec cogitavi quidem unquam, illorum, quæ Conringius in Epistola sua ad Boineburgium meminerat, probe gnarus, scilicet, nunquam concedere voluisse B. Ducem Augustum ut quicquam ex rapina illa Bibliothecae suae accederet. Et hac ipsa de re, ante editionem scripti mei cum amico quodam sermonem habui, ipsique demonstravi, licet a me positum esset, ex Bibliotheca Mazariniana haec esse volumina, neutiquam tamen ex auctione illa eadem comparata fuisse, ideo sequi.*

Non possum satis mirari inconsideratam illam et insulsam objectionem etiam, quam profert contra meam sententiam, quod
per

*per Concilia illa generalia magnum incrementum quondam sumpserit Bibliotheca . Quasi vero integrum corpus , quale hoc est , Bibliothecae nullum dare queat augmentum , praesertim , si de qualitate potius , quam de quantitate vel numero sensus sit , quo sensu de ejusmodi opere optimo jure scribi posse , non dubito . De caetero ipsi quidem licet per philautiam suam *Ancillonii transmissos codices* numero et pretio non adeo insignes pro augmento Bibliothecae probando allegare , mihi , Concilia generalia triginta et septem voluminibus comprehensa et typis Regiis expressa , non aequae . O hominis dementiam ! et plus-quam dictatoriam arrogantiam !*

Magis inconsiderata atque magis adhuc demens est censura , quam pro inconsulta temeritate sua , contra meam *de quadringentis Codicibus Wiquefortianis manuscriptis* observationem , in medium proferre non erubescit . Vehementissime mihi succenset , credulitatem atque imprudentiam meam injuriose accusans , dum scriptis et verbis meis alienam mentem iterum affingens , ita scribit , p. 49. *Adfirmare quidem videtur auctor , quasi ipse indagasset omnia , beneque explorasset , ista , quae in manuscriptis Wiquefortianis continentur , jam maxi-*
mam

nam partem à vitarum scriptoribus apud Gallos ipsos et Batavos typis esse evulgata, quod aequè inconsulte et temere pronunciatum est, ac si adfirmare ego tibi jam aude-rem, Arabicos istos codices, quos in Fessana Bibliotheca adservari memorat Thomas Erpenius, typis jam esse exscriptos etc. et paulo post p. 50. pro certo ego habeo, ipsum non explorata à se ac perspecta, sed audita tantummodo pronunciasse : quæ quum plerumque quam maxime fallant, ita et ipsum nostrum fefellisse quoque credulum atque improvidum auctorem, tibi velim persuadeas. Profecto, nullo modo exputare possum, unde tantam contra me conceperit pessimus scriptorum alienorum interpretis animi malignitatem atque rancorem, ut ex verbis claris admodum atque perspicuis plane contrarium sensum extorquere, et liquida satis, pro dubiosis lectoribus obtrudere sategerit. Verba mea de his Codicibus à Wicquefortio quondam Parisiis Guelpherbytum transmissis, et Mazarinianis etiam alias vocatis, sunt : multa in his de ministerio Richelieu et Mazarini latebant arcana, quæ tamen (arcana puta illa statuta Richeliana et Mazariniana) postmodum maximam partem à vitarum scriptoribus (des auteurs des Memoires) typis evulgata

gata sunt. Quis non videt, me specialissime hic de *Richelieu* et *Mazarini* arcanis, quæ quadringentorum illorum codicum Manuscriptorum aliquam saltem particulam facere, quivis hariolari potest, loqui. Et hæc typis jam evulgata esse, ipse postmodum p. 50. fatetur: *sin autem verba ista de Richelii duntaxat et Mazari- ni, eminentissimorum prudentissimorumque Cardinalium arcanis politicis intellecta vo- luerit, ejus in judicando temeritas tolerabi- lis quodummodo videri tum poterit etc.* Quod paulo post adhuc liquidius, et in clarum testimonium quasi meae super hunc falsarium victoriae demonstrat, ipsos illos, de quibus locutus fueram, scriptores Gallos al- legans, nimirum:

Memoires de Bellievre et de Silléri etc:

Memoires des Sages et Roiales Oeconomies d'Etat Domestiques, politiques et mi- litaires de Henri le Grand: Par Ma- xim. de Bethune Duc de Sulli.

La Negotiation de Mr. le President Jean- nin etc.

et hujus generis scripta quaedam alia. Hæc omnia ex ipsius adversarii mei scrip- to, ex quibus quam vera sint, quæ de manuscriptis his retuli, clare liquet: Ni- hilo-

hilominus hac occasione, uti alias per totum fere tractatum fecit, injuriose satis de temeritate mea inconsulta, inconsiderata et demente, loqui, furiis quasi agitat-
us infernalibus, non erubescit. Quid, facta sic codicum Mazarinianorum eorundemque historiae mentione, contra *Rei-
nerdingium* maligne admodum effutiat, ex verbis p. 50. 51. et 52. prolatis, videre est. Et miror profecto *Rei-
nerdingium* ausibus Betulii, quos de divulgandis codicum dictorum titulis susceperat, adeo strenue resistere voluisse, quem tantum abest, ut pro Bibliothecario haberi permittat, ut potius ad vilissima Bibliothecae servitia illum vix sufficere, in primo statim epistolae suae limine satis arroganter statuere, non dubitet.

Levisime saltem quaedam de *D. Arndtii Breviario precum e media flamma servato, et supellestili mensali B. Lutheri*, quae à longo jam tempore in hac Bibliotheca asservantur et peregrinis advenientibus monstrantur, tetigi. Hoc etiam aeger-
rime ferens, perquam ironice perstringit meus Aristarchus. Ridet cum pietatis inimicis, uti ex propriis suis liquet verbis, hujusmodi mirandum, relationem scilicet, quam de Breviario illo adduxi,
et

et sic sacras de DEO meditationes , cum nefandis quibusdam libris vi flammæ quondam æque non consumptis confundere non erubescit . Postmodum miratur satis ironice quod *B. Lutheri poculum vitreum et cochlear æri incisa relationi meae non inseruerim* . Sciat autem me tali labore facile supersedere potuisse , præsertim cum magni nominis inter Lutheranos Theologum et Lubecensium Superintendentem , *D. Georg. Henr. Götziū in scripto suo de Reliquiis Lutheri diversis in locis observatis* , p. 21. et 22. satis amplam de his , et specialissime quidem de poculo vitreo Lutheri dedisse descriptionem , probe novissem . Dolendum interim , quod eo tempore , quo *Sereniss: Brunsvicens: Duces* hæc talia Bibliothecæ Augustæ adjici passi fuerunt , non præsens fuerit morosus noster Cato . Posito hoc , certe non asservarentur , aut peregrinis monstrarentur ejusmodi quisquiliæ .

Illam quam *de Sifrido Vitulo* ex antiquitate Monachali satis operose erutam sistit in epistola sua , p. 61. et sequ: auctor notitiam , ego quidem nullo modo habere potui , qui Critici partes in me nunquam suscepi . Interim qui sub monstri specie in editis ac propria manu scriptis suis libris

apparere non dubitat, nulla injuria pro
monstro habetur. Nec cum necessaria
Medico prudentia pugnare videtur, si quis
monstruosum hominem libros transcripsisse
crediderit. Cum hinc inde nota sint
exempla eorum, qui vel pedibus ipsis,
vel brachiis monstruosis literas pingere pro-
be noverint. Memini me, anno 1698.
vidisse Lipsiae virum pygmaeum, mani-
bus in utroque brachio à nativitate orbum,
qui loco cubiti appendicula quadam carti-
laginea erat instructus, ungulae vitulinae
non absimili, qua non solum scribere et
pereleganter quidem, sed et alia officia
magis adhuc difficilia praestare vale-
bat.

Cur etiam in pejorem partem interpre-
tetur auctor, quod *Anselmi Boëtii de Boot*
in Bibliotheca Augusta à me visum allega-
verim Herbarium, nullam penitus video
rationem. An, si tanti etiam non esset
Herbarium ipsum, vel solum *Boëtii* no-
men inter Historiae Naturalis scriptores
fatis clarum, non mereretur, hujus ut
mentio fieret? Taceo auctorem Epistolae,
insignem Orbilionem potius quam Bota-
nicum, de plantis exsiccatas in hoc Her-
bario occurrentibus judicium ferre nullo
modo posse, utpote quem plura praeter
il-

illam , quam inter Julipam et Narcissum observavit differentiam , ex Botanicis nosse , haud crediderim : Potiora in hoc studii genere novisse *Boëtium* , *Illustrem Medicum* , apud omnes in confessio esse existimo.

Guelpherbyto mecum in secessum Principis , qui in salinarum valle est , abit *plagofus meus Orbilio*. Ast neque hic in adeo amoeno loco animum suum morosum ad modestiam flecti patitur. Pergit potius contumeliosis objectionibus relationem meam lacerare , et primo quidem vel maxime aegre ferre videtur , quod de mirifica Horti amoenitate ampliores laudes non fecerim. Hinc p. 85. scribere non dubitat : *quod si apud Italos , Gallos atque Batavos commoratum eum antea nossent , quam hortum hunc perlustravit , majores tum delicias animo ejus obversatas crederem , prae quibus istas non dignas adeo diducarit , quarum pluribus verbis faceret mentionem*. Ad hoc ut respondeam , profecto , si hortum , qui vigesimum aetatis annum nondum complevit , in nonnullis deliciis adhuc deficere statuerem , à vero penitus me aberrasse non existimarem. Quod si talem cum aliis Germaniae hortis , ut de Italicis nihil dicam , compara-

re liceret, differentia adhuc evidentior atque asserti mei veritas clarior inde emer-
sura sine dubio esset. Ita, exempli gra-
tia, *Brunsvicensis* hic nullo modo cum
Stutgardiano horto archi Ducum Württen-
bergenfium fedi adfeto, erit comparandus:
in specie quod exterarum arborum, Ci-
treæ imprimis et Aurantia poma feren-
tium, non in vasis cum terra sua incluso-
rum, sed ex ipso solo horti emergentium,
insignem atque incredibilem fere proceri-
tatem et copiam attinet. Ut de *Caesaris*
in suburbio *Viennensi* horto, de secessu iti-
dem *Imperiali* in *Schönbrunn*, de *Slachwo-*
densi in *Bohemiae* confiniis, de *Pragensi-*
bus, nova *Troja* in specie, *Comitis Wen-*
ceslai de *Sternberg* deliciis, de *Norimber-*
gensium Hesperidibus à *Clarissimis Volhame-*
ris excultis, de *Horto Medico Altdorffino*,
de *Veronensibus*, *Patavinis*, praecipue il-
lo, quem *Illustris Maurocenus* possidet, et
quotannis novis exoticis exornari curat,
eorumque hortorum omnium singularibus,
nihil jam dicam. Quos omnes jam nomi-
natos hortos, me antequam in has Brun-
svicensium regiones veni, quondam ocu-
lis meis vidisse ac perlustrasse, sciat nasu-
tulus meus censor. Miror autem homi-
nis insolentiam, qui mihi injuriis insultan-

tandi nullam occasionem praetermittens , verba illa , quibus Hortum in Salinarum valle pro Juventute sua satis esse amoenum ac delizioso statueram , sola refert et perquam acriter perstringit , de illis autem quae in relatione mea paulo post sequuntur , nihil meminit , ubi p. 11. expresse posueram : *sufficit curiosos ejusdem spectatores fateri omnes , aedificium hic cerni Rege dignum , atque in deliciis quoad hortum aequae ac Palatium nulli fere in Europa secundum .* Dixi hic compendiose omne id , quod auctor in epistola sua ampliori panegyrico , et catachrestica fortunatis et chimaericis Amadisi insulis digna descriptione recitat .

Animadversionem vix meretur puerilis illa et frivola objectio , quam ex puro puto contradicendi studio , de *Herm. Korbio* , quo *Sereniss. Dux* in extruendo Regio illo palatio hortensi usus est , protulit male fanus auctor . Fatetur ipse p. 95. *Herm. Korbium* scriniorum fabri fuisse discipulum , animadvertisse Principem , laudatum *Korbium* juvenem arti scriniariae intentum adhuc , praestanti et ad mechanicam aptissimo praeditum esse ingenio : fatetur etiam eadem pagina , Principem in amplificandis aedibus opera ejusdem usum fuisse . Interim ,

fassus haec omnia , aegre fert , et insulse minimeque convenienter me affirmasse scribit : Seren : Ducem scriniarii cujusdam opera in extruendo palatio usum fuisse . Scilicet non aequè diffuse et clare mutationem illam , qua ex Scriniario Architectus factus fuerit , post itinera scilicet varia in Italiam suscepta , iisdemque comparata artis architectonicae scientia singulari , descripseram in compendiosa mea de secessu hoc notitia . Quod tamen nulla penitus in architecti hujus excellentis gloriam injuria à me factum fuisse , quivis prudentior videt . Cum non rarum sit ex longe abjectiorum artium discipulis , magnos in quavis disciplina et arte natos fuisse magistros .

Nil minus etiam quam falsum est , quod à *Luhn Hamburgensi* , multae picturae , quas *recenti calci inscriptas hinc inde aedificii interiora habent , factae sint* . Pinxit omnino *Luhn* quam plures , quo ipso tamen et allegatum ab adversario meo *Tobiam Quersfurth et Johann. Osw. Harms* suas etiam contribuissè in hoc pingendi genere operas , non nego .

Paulo post , modo auctori meo solenni , se ipsum in sole caecutientem refutat , dum scribit , *Illustrem illum pictorem Bonbellum* ,

Du-

Ducis tantummodo Antonii Ulrici et Beatiss. ejus conjugis , adstante filio natu minore Ludovico Rudolpho , ut et Beveranorum Principum , Augusti Ferdinandi et Ferdinandi Alberti icones pinxisse : me autem falli Lectoribus persuadere conatur scribentem . Serenissimae autem Familiae Ducum Brunsvicensis : icones vivis coloribus affabre expressos , celeberrima pictoris Bonbelli manus concinnavit .

De lana caprina cum antagonista meo certarem , si omnia illa , quae in ipsa pinacotheca palatii visa perperam à me relata fuisset , uti existimat , refutare vellem . Pleraque in minutis consistunt , ita ut operae pretium haud ducam , de his cum illo rixari . Cujusmodi sunt , quae de folio magni illius triclinii refert , marmore non stratum illud esse , sed ejus generis quadratis lapidibus , qui non procul a Visurgi ex silva Sollingen apportantur . Hoc ipso quidem sui quasi immemor auctor tatetur , me magnificentius quam par est de Regio hoc aedificio sensisse , qui paulo ante tantas de nimis parca rerum adeo sublimium laudatione mea fecerat querelas . Sciat autem certo sensu ad marmora optime à scientibus referri lapides illos , qui in nostris etiam regionibus eruuntur , si modo

duritie insigni et politurae admissione alios superant communes.

Parum etiam in recessu habet, quod de statuis in pinacotheca tunc a me visis monet, scilicet *me pro statuis ex aere conflatis habuisse quasdam, quae ex marmore confectae sunt*. Cum tamen expresse in prima tractatus mei editione posueram: *ex utroque latere pulchro ordine digestae sunt statuæ antiquae ex aere conflatae Homeri, Platonis etc: ut nihil dicam de aliis ex alabastrite confectis*.

Florae simulacrum, praetiocissimum huius pinacothecae Decus, *ex alabastrite confectum esse, falso me narraſſe perhibet*, cum ex marmore albo potius sit paratum. Fides maneat penes auctorem, litem propterea reciprocare nolo. Duritie marpesium vel album marmor superare alabastritem, non ignoro. Interim plures fortassis mecum erunt, qui substantiam huius simulacri penitus examinandi occasionem non habentes, illam pro alabastrite habebunt potius, quam pro albo marmore, potissimum, cum mollior alabastritis substantia sculptoris labori aequè non resistat, ac marpesiae cautis durities.

An absurdum adeo sit commentum, quod *maxillae superioris atque inferioris ca-*
pi-

*pit*is humani ossa una cum osse frontis musivo opere ornata pro cranio habuerim cum *Jacob Tollio* : an absurdum adeo , quod illud ipsum pro poculo victori cuidam barbaro inservire potuisse asseruerim cum *Clar: Henninio* , aliis modestioribus decidendum relinquo . Et licet formam hujus capitis ossei , pro ut nunc conspicitur , poculo minus esse aptam concederem , inde tamen hanc de poculo opinionem penitus esse absouam evinci nequit . Cum facile per temporis injuriam et possessorum variorum incuriam , ita laedi potuerit , ut occipitis et ossium temporis cum reliquis partes , quae cavitatem poculo necessariam efformare solent , fuerint abscissae . Profecto minus superstitiosa de poculo haec mea , quam anilis et Rabbinica de Teraphim auctoris erit sententia .

Ridiculum porro est et male sanae mentis indicium , quod curiositati meae normam praescribere non dubitet auctor , dum perquam acriter perstringit depravatum meum in laudandis curiosis gustum , et quod ex voluminibus in viginti quinque mensis pinacothecae locatis , illud saltem selegerim , quod *Clar: Commelini Hortum Amstelodamensem coloribus illuminatum* constituit . An vero hoc ipso injuriam

fecerim reliquis , de quibus expressè dixeram , *rarissima in illis architecturae , picturarum etc. specimina inveniri* , prudens judicet . Qua ratione autem nasutus ille mihi Botanico studio addicto , vitio vertere potest , quod prae reliquis hoc solum laudandum mihi sumpserim ? In hac arte periti norunt , quantum ad incrementum Botanices faciat rariorum plantarum vivis coloribus facta expressio . Norunt hoc in specie Horti Amstelodamensis ex Magistratu Nutritii et Praefecti , qui plantas omnes rariores exoticas in horto provenientes , vivis coloribus chartae pargamennae , nitidiori et accurata opera , inscribi , in diuturniorem durationem et perpetuam Batavae Nationis gloriam , curant . Ex quibus picturis emerferunt specimina illa , quae aeri incisa sub allegato jam *Horti Amstelodamensis titulo Clar. Commelini* haecenus ediderunt . Cum ipsa originalia vivis coloribus expressa interim in Horti atrio asserventur . Magni ex pari ratione aestimatur *Codex ille Dioscoridaeus* perquam vetustus in Bibliotheca Viennensi Caesarea , qui plantas in hoc auctore occurrentes coloribus illuminatas in charta pargamena etiam sistit . Majoris adhuc aestimaretur ab artis amatoribus , illud
Her-

Herbarium, ex tribus quidem ordinibus Methodi Plantarum Excell. Rivini duntaxat constans, est accuratissima et felicissima D. J. C. Scheideri, Professoris Lips: manu quondam ad vivum perquam egregie, et, quod maximi momenti, verè Botanice illuminatum. Quod in laudati D. Rivini museo Lipsiae adhuc asservatur. Opus omni laude et commendatione majus, dignum quod à curiosis Botanicis spectetur omnibus.

Tantum de praecipuis, quibus relationem de Bibliotheca Augusta et secessu Ducali in Saltzthalen meam, suspectam reddere voluit *Janus Gregorius Betulius*, qui tandem sub finem suae epistolae p. 126. fatetur, *in peiorem partem rapi mihi minus potuisse, quando in rebus, quae ad Medicam artem non pertinerent, sagacissime omnia non essem odoratus, si modo de me ipso relationis exordio testificatus non fuisset, singulari semper affectu Bibliothecas et rem literariam me esse persecutum.* At, quam ficulnea haec sua sit argumentatio, quivis facile videt praejudiciorum nebulis non occaecatus. Num enim, ut simili quodam sophisma hoc diluam, qui concentu Musico se delectari fatetur, ideo Musicae exactam notitiam habere tenetur? Nescio
etiam,

etiam , an se ipsum non refutet *improvidus* auctor , cum ultimo loco scribit : *Rempublicam literariam non magnam adeo fecisse jaeturam , si observationibus istis , quas edideram , carere diutius debuisset .* Contrarium ipse , edita in publicum hac sua epistola , maligno quidem virore et rancore contra me undique aspersa , de caetero vero perquam erudita et singulari rei literariae et antiquitatis notitia referta , abunde , ut existimo , testatus est , eruditione perquam praestans , ast moribus vel maxime deficiens et philautia corruptus auctor . Semiseculum enim fere clapsum est , quod nihil quasi de incomparabili et vere Augusto thesauro librario , qui Guelpherbyti asservatur , scriptum sit , ut secessum in salinarum Valle taceam , quo de quenquam scripto vel minimum duntaxat publicasse haecenus , expiscari non potui . Ast epistolae , meae relationi oppositae , auctor , de utroque hoc Germaniae nostrae miraculo perquam singularia communicare cum eruditis non dubitat . Potiori ad hoc , quam ego quondam , occasione instructus , utpote qui , juxta propriam suam confessionem , singulari gaudet praecipuorum in aula Wolfenbutteleni ministrorum , et in specie *Ampliss: Hertelii* favore

vore et benevolentia , quorum adjutus experientia , plura potuit de Bibliotheca et Secessu scire singularia , quae aliis aequè patefieri haud solent . Quorum tamen cum publico communicatio , vel nunquam penitus , vel tarde satis facta fuisset , nisi relatione mea contra intentionem , scribendi et cavillandi ipsi occasionem dedissem . Quod si vero *indicem manuscriptorum Codicum Mazarinianorum* edere promissis stando non deficiet *auctor* , me hac occasione amplius laceßere nolit , precor: sin autem cavillandi et contradicendi studio agitatus , innocenti insultare nondum desinet , à moratioribus eruditis tanti amplius sua , propter admixtam malignitatem , non aestimabuntur , imo vero se ipsum , aërem feriendo et cum umbra pugnando , turpem dabit publico . Nam et illi , qui ex prodeuntibus in publicum scriptis , nil nisi errores et hallucinationes colligunt , scarabaei sordidissimi insecti naturam imitari deprehenduntur , quod rorem et laudabilem terrae succum negligens , male olentia jumentorum excrementa et scybala perreptare ac degustare in deliciis habet . Varios esse scribentium scopos concedunt omnes . Non cuivis systemata scribere , vel doctrinalia , quibus nihil opponendum , proponere lubet .

Num

Num verò de rebus minus adhuc cognitis, vel diu in obscuro latentibus, illa revelare non licuerit, quae ab aliis accepi-
mus vel ipsi observavimus, saltem, ut occasio detur aliis inquirendi in illa accuratius?

Quod de caetero novam hanc Relationis meae Itinerariae editionem attinet, sciat *B. L.* duplicem potissimum fuisse causam, quae ad hanc adornandam me impulerit. Ex quibus primaria quidem fuit, ut hoc ipso commoda mihi nasceretur occasio malignis ac dolosis obtreptionibus, quibus famae meae maculam aspergere ausus est saepius allegatae epistolae auctor, veritatem opponerem, ac publice demonstrarem, quam male fundata et quam sophistice defensa sint *Betulii* contra meam argumenta. Alter autem scopus fuit, ut desiderio meo satisfacerem, eandem hanc emendatam magis atque correctam, imo et locis quibusdam auctiorem sistendi. Sciendum enim, me tunc, cum in edenda prima illa occupatus fui, variis propter illud, cui me accingere tunc debebam, longinquum iter, distractum fuisse negotiis, ita ut manuscriptum meum, antequam typographo traderetur, decenter et accurate satis revidere haud licuerit, quo etiam factum, ut hinc inde irrepserint nonnulla, quae postmodum typis ex-
pres-

pressa videre dolebam maximopere. Et licet ab illo tempore non minus contatentis occupationibus, continuis fere praeterea locorum mutationibus, aliisque tædiis ratione officii mihi incumbentibus, impeditus vixerim, non destiti tamen editum antea schediasma meum sub limam iterum iterumque revocare, illamque, quam nunc vides, editionem correctiorem adornare. Perpauca mutata videbis in illis, quae Bibliothecam et secessum Ducis Wolfenbuttelenfis concernunt, ob rationes superius allegatas, plura fortassis quod *Botanica et Rem Medicam attinet*. Qua in re multum me adjutum fuisse ab *Excellent: Domino D. Johanne Philippo Breynio, Botanica et Naturali scientia B. Parentem suum si non superante feliciter tamen aequante*, hic, non sine magna nominis sui celebratione, fateri necesse habeo. Licuit enim per tempus illud, quo *Gedani* aula Regia hoc et superiori anno degebat, utilissima *Clarissimi* hujus *Viri* conversatione frui frequentius. Qua occasione multa observare et videre concedebatur, quae antea adeo accurate non sciveram. Quantum enim in aedibus suis possideat curiosorum in Botanicis, materia Medica, imo universa fere Naturali Historia apparatus *Dn. D. Breynius*, facile judicare poterit, qui

qui considerat supellectilem illam, quam à B. Parente habet, infinitis fere quae in peregrinationibus per Hollandiam, Angliam, Hispaniam, Italiam, Germaniam quondam factis, collegit, feliciter auctam ab ipso fuisse, atque augeri adhuc quotidie. Hinc est, quod nullum fere nominaveris ipsi exoticorum utriusque Indiae rariorum genus, quo de genuinum ac naturale specimen tibi monstrare non valuerit, ut rariora illa simplicia taceam, quae in Syria quondam atque Arabia, curiosa *Celeberr: Viri Jacobi Golii* manus collegit, cujus gazophylacium naturale ex haereditate paterna integrum possidet.

Haec sunt quae de nova relationis meae Itinerariae editione monendus erat *B. L.* Quam si aequiore censura ac *Betulius* cum prima fecit, suscipiet, eo ipso monstrabit, se non adeo contrarium esse illis, qui pro augmento scientiarum et artium, omnia, quae observarunt, fideliter cum aliis communicant, nec diu nimis, rodendo ungues, lucem scriptis suis fugiunt, de levioribus hallucinationibus non adeo solliciti, siquidem nihil perfectum, nihil omnibus numeris absolutum in hac rerum fragilitate a quoquam expectandum esse, probe norunt. Hisce Vale. Dab. Gedani, Calendis Martii M. D. CCXI.

Q. D. B. V.

Sicuti a prima juventute mea , praeter
 Avitas et Patrias Artes , quibus na-
 tus quibusve innutritus fui , singu-
 lari semper affectu Bibliothecas et
 Rem Literariam profecutus sum ;
 ita auspiciam Itineris mei sub finem Julii , ut
 nosti , *Amicorum Optime* , anno 1706 cum
 in modum direxi , ut Lipsiae salutatis Amicis ,
 per Leucopetram et Querfurthum Sylvaeque
 Hercyniae partem *Guelpherbythum* tenderem ,
 ubi a *Dno Schomburgio* , sub Ducis Brunsvi-
 centis militia vigiliarum Praefecto , benevole
 exceptus , ac Bibliothecario *Dno Reinerding*
 commendatus , altero statim ab adventu meo
 die Bibliothecam Augustam , per totam Euro-
 pam celeberrimam , visere licuit . Haec in
 Armamentario Ducis tunc servabatur , post-
 quam aedificium , quod antea illam contine-
 bat , funditus destructum fuit , de novo jam ,
 ast longe magnificentiori modo et forma , ite-
 rum exstruendum , quo occupatum etiam vi-
 di ingentem operariorum numerum .

Quinquaginta fere anni sunt , quod insigne
 hoc Rei Literariae archivum , incultum fere
 relictum fuit . Neque enim ab illo tempore ,
 quo fundator ejus obiit , auctum magnopere
 fuit , siquidem nec ea librorum supellex quam
 Rudolphus Augustus Dux in privatos collegit
 usus , huic Bibliothecae accessit . Placuit e-
 nim B. Principi speciali legato ipsam Acade-
 miae Juliae ex parte , ex parte Coenobio Rid-
 daeshus. donare . Interim non reticendum ,

novissime , i. e. ante hos duos annos , Bibliothecam hanc egregia accessione rariorum eorumque novissimorum codicum ex publicis aliquot Batavorum venditionibus sub hastâ , jussu ac liberalitate Sereniss. Principis ac Ducis Antonii Ulrici etc. auctam fuisse , quos omnes singularibus armariis inclusos atque a veteri Bibliotheca separatos , ab introitu a dextris positos , cernere licet. Quantum de caetero diligentiae ac sumptuum primus hujus Bibliothecae Fundator impenderit , ex eo facile colligi potest , quod de Anno 1625 quo primum jactum fuit collectionis fundamentum , usque ad annum 1666 codicum numerus in universum ad triginta fere millia jam excreverit , quos inter codices MSti mille circiter Graeci , Latini , Hebraici , Arabici etc. Magnum incrementum praebuit postmodum *Bibliothecae Mazarinianae* particula , Concilia nempe Generalia triginta et Septem voluminibus comprehensa , nitidissima Bibliopegi opera conspicua , atque insignibus deauratis Cardinalis ornata. Non parum etiam contribuit Dni Wiquefortii Ducum Brunsvicensium quondam ad Regem Galliae Legati diligentia , qui quadringentos numero Manuscriptos codices alutâ nitidissime vestitos , et Parisiis quater ac vigesies mille imperialium pretio coëmptos , ex Gallia Augusto Duci transmissit ; multa in his de Ministerio Richelieu et Mazarini latebant arcana , quae tamen postmodum maximam partem , a vitarum scriptoribus , (*des Auteurs des Memoires*) apud Gallos ipsos et Batavos , typis evulgata fuerunt. De caetero vetustissimus codicum impressorum

nunc

nunc erat *Rationale Divinorum Officiorum* ; apud *Faustum* 1459. Ex Manuscriptis notatu digniora : *Biblia Hieronymi* anno 1315 a Fratre Sifrido Vitulo , cuius icon in calce codicis cum capite manibus ac pedibus vitulinis appicta , cernitur : *Boëtii de Boot Herbarium vivum* ab Aug. Barraeo Reg. Galliae Archiatro , Bibliothecae donatum. Inspicere hic etiam licuit *Biblia Lubecae* anno 1494 impressa versionis Teuto-Saxonicae veteris cum notatu digna et foeminis odiosa glossa marginali ad Cap: Genes. 3. super verba illa : Und er soll dein Herr seyn etc. *dy vakene to pyneghende un to slaende* . Haec glossa falso Lyrae imputatur , quippe cuius commentarii Latini nihil tale habent. Quae de caetero ex B. Lutheri suppellectile domestica , ac de D. Arndti Breviario Precum , quod Hortulus Paradisiacus (*Paradies Gärtelein*) inscribitur , e media flamma servato , in hac Bibliotheca monstrantur , per vulgum nota sunt. Occasione discursus narrabat mihi Bibliothecarius de *S. Ignatii Epistolis ad Philadelphenses* , inveniri in his cap. nono locum , Divi Pauli Apostoli matrimonium a Romanensibus in dubium vocatum , diserte confirmantem , his fere verbis : *sicut Petrus et Paulus et reliqui Apostoli , qui nuptiis operam dederunt etc.* et quamvis Pauli nomen in omnibus impressis Exemplaribus haud inveniat , vetustum tamen codicem Manuscriptum in Bibliotheca Oxoniensi ab Amico optime sibi noto , fuisse visum , in quo Pauli nomen , quamvis rasura et attentata deletionem affectum , inveniat . Lustrata sic per aliquot dies Bibliotheca , ante a-

bitum et Arcem visitavi Ducalem , proximeque adiacens Collegium Equestre . In urbe vero tristissimum tunc spectaculum praebebant rudera Templi novi , secundum modernae architecturae regulas a Sereniss. Ducib: Brunsvicensibus sub initium anni Jubilaei M DCCI perquam nitide exstructi : Fidem fere omnem superat , aedem hanc Sacram ex fundamento usque ad summum fastigium fere lapideam , intra paucarum horarum spatium , per ignem coelitus delapsam , tam misere fuisse destructam , ut non nisi obscura quaedam solidi hujus aedificii vestigia jam amplius supersint . Evenit tristissimum hoc fatum circa illud ipsum tempus , quo in Seren. Ducis aula controversia de Principis Neptis eligendo Divino Cultu ac fidei Professione vigeat .

Gvelpherbyto discedens *Brunsvicum* perrexi , atque in medio itinere diverti in magnificum Ducis Ant. Ulr. Palatium Hortense , vernacula *Salz Thal* appellatum . De Horto nihil jam dicam , cujus deliciae pro juventute sua satis quidem sunt egregiae : sufficiat de aedificio ipso monuisse , illud quidem solum ex lateribus coctis tignis ligneis suffultis , ante hos octodecim annos esse exstructum , quoad regulas tamen Architectonicas ac jucundissimam situationem paucis Germaniae Palatiis Hortensibus cedere . Usus est Sereniss. Dux in extruendo hoc , et amplificando opera *Hermannii Korb* , Viri ad mechanicam nati , ingeniosissimi , ac Duci hoc nomine singulariter chari . Hic *Hermannus Korb* Scriniarius ante , nunc supremus Principis Architectus , singularem in concinno ac terso hoc aedificio pra-

praestitit dexteritatem, ab exteris Italis etiam ac Gallis, qui in hoc artium genere primas sibi alias tribuunt, aestimatam magnopere atque laudatam. Quod picturas illas attinet, quas calci recenti inscriptas, aedificii interiora habent, ex his plerasque civis Hamburgensis nomine *Luhn* fecit: Serenissimae autem familiae Ducum Brunsvicensium ac Lüneburgensium icones, vivis coloribus affabre expressas, celeberrima pictoris *Bonbelli* manus concinnavit. In medio fere Palatii hujus spatiosissimum visitur Triclinium parallelogrammi forma, nullis suffultum columnis, cujus solium marmore tectum, laquear autem fornicatum atque amoenissimis picturis exornatum est. Ex utroque latere pulchro ordine digestae sunt statuac antiquae partim ex marmore partim ex aere conflatae, Homeri, Platonis, Demosthenis, Aristotelis, Dionysii, Ciceronis, Senecae etc. effigies secundum capita vultusque exprimentes, ut nihil dicam de aliis integris, quas inter elegantissima, Floram referens humi jacentem, quam ex ipsa Graecia accersivit, ac mille imperialium pretio coëmit Dux Sereniss. Reliqua spatia occupant rarissimae excellentissimorum pictorum tabulae: in hinc inde vero positae mensae stratae sunt viginti quinque numero volumina, aluta obducta, rarissima Architecturae, Picturarum et Rei Herbariae specimina continentia, quae inter *Clar. Commelini Hortus Amstelodamensis* etiam erat, cujus figurae singulari diligentia illuminatae coloribus, oculos delectabant. In lateralibus hujus Triclinii conclavibus, asservantur alia quam plu-

rima eaque rarissima pictorum opera e. g. Maria et Iosephus a *Mich. Angelo*, pictura mille et quingentis imperialibus comparata : Salvator Mundi in Oliveto a *Caraggio*, pretio bis mille imperialium acquisitus : Iosephus ut faber lignarius repraesentatus, a *Pietro Romano*, qua tabula Potentiss. Prussiae Rex cimeliarcheum hoc augere nuperrime voluit. Memini etiam in secretissimo conclavi, quod omnibus non aequae patet, inter ingentem numerum rariorum ex China et Japonia, Asia et Graecia Antiquitatum, me vidisse vetustissimam tabulam aeneam, cubitalis fere altitudinis, summi apud Graecos Philosophi, Aristotelis caput, elevata opera exhibentem, subiecta sequenti inscriptione Graeca :

ΑΡΙΣΤΟΤΕΛΗΣ. Ο ΑΡΙΣΤΟΣ. ΤΟΝ
ΦΙΛΟΣΟΦΩΝ.

Mirabar articulum Τὸν in hac inscriptione minus ad Graecae Grammaticae genium fuisse positum, quod tamen ignorantia artificis sculptoris facile accidere potuit, nec ideo antiquitati hujus tabulae quicquam derogari, mihi quidem videtur. Ostensum mihi in eodem hoc antiquitatum sacrario cranium Humanum, musivo opere elegantissime ornatum, ex quo olim apud Paganos Oraculum dedisse responsa, adstantibus persuadere satagebat Palatii hujus Inspector ; ego vero pro poculo potius cranium hoc olim inservivisse victori cuidam Barbaro, persuasus sum. De reliquis Magnifici hujus Palatii conclavibus eorundemque ornatu prolixior hic esse nolo; sufficit curiosos

Nos ejusdem spectatores fateri omnes, aedificium hic cerni Rege dignum, atque in deliciis quoad hortum aequae ac Palatium nulli in Europa secundum. Hoc tamen, antequam hinc discedam, unicum adhuc commemorandum mihi restat, insigniori loco caeteris conclavibus immixtum esse Sacellum cum Choro, in quo virgines cum Domina ex Nobilitate Equestri oriunda certo numero stipendio hic fruuntur satis liberali, et quotidie stans horis precibus ac hymnis cultum divinum, more Protestantibus familiari, celebrare solent.

Brunsvici quid viderim non multum attinet dicere, excepto Cathedrali Templo Arci Ducali e regione sito, quod dicatum ab antiquitate Sto Blasio quondam fuit: in choro vidi subsellia et libros antiquissimo charactere Monachali scriptos, quae illis Canonicis, qui horas hodiernum ex veteri consuetudine quotidie cantare solent, inserviunt. In Arce ipsa, quae non adeo magnifica, sed ad veteres Gothicae Architecturae regulas simplici forma extructa est, inter rariora asservantur ac monstrantur in certis conclavibus duae tabulae pictae, altera exhibet puellam Persicam transparente tela amictam, in ipsa Persia facta indeque in hunc locum translata, satis elegans: altera Philippi IVti Hispaniarum Regis conjugem vivis coloribus ad vivum expressam, in habitu, quo viduae regiae in Hispania comparere solent.

Brunsvico cum mercatoribus quibusdam, qui nundinas Brunsvicenses visitaverant, Hamburgum per Cellam et Harburgum profectus sum. Hic a *Domino Hilcken Icto*, Agnato meo,

meo , hospitio liberaliter excipiebar , cujus cum conjuge Amantissima , singularem benignitatis in me affectum satis depraedicare nequeo . Hujus Viri Clarissimi opera , quicquid Hamburgum prae caeteris visu dignum habet , Iultrandi occasionem exoptatissimam nactus sum . Habet enim cum Praecipuis Urbis hujus Viris , Literatis praesertim , commercium ac necessitudinem singularem , in propria vero domo Bibliothecam ex omni genere politioris literaturae librorum selectissimam , quam ipse in peregrinationibus suis per totam fere Germaniam , Utrumque Belgium , Angliam , Daniam et Sveciam conquisivit sedulus . Vidi in hac libros rarissimos , quorum bonam partem comparavit anno 1691 Lugduni Batavorum ex arcana illa *Johann. van Westreenen* Bibliotheca , cujus catalogum hodiernum asservat , libros rarissime occurrentes et paucissimis notos ex Historicis Graeco-Latinis , Antiquariis , Numismaticis , Literatoribus , Geographicis etc. continentem . Fuit enim *Johann. van Westreenen* in perscutranda veterum Graecorum et Romanorum vivendi ratione , in specie quod voluptates ac delicias Venereas attinet , per totam vitam suam curiosissimus : qua de re ex antiquis monumentis ac scriptoribus fecit sibi collectanea , quorum bonam partem inseruit famosissimo illi libello sub *Aloyisiae Sigeae et Elegantiarum Latini sermonis* nomine in publicum edito . Repertus fuit in ejus feriniis post mortem alius adhuc ejusdem farinae tractatus , manu propria scriptus , et adjectis figuris illustratus , praecedente multo nequior , quo obscenos omnes , quos ex anti-

tiquitate actus colligere potuit, repraesentavit, et elegantissimo, quo excelebat sermone Latino, explicavit, qui tamen, DEO sint laudes, typis nondum evulgatus est. Apud eundem *Dn. Hilcken* vidi etiam *D. Urbani Härne Archiatri Regis Sveciae de Historia Naturali Sveciae Prodromum* lingua Germanica conscriptum, cujus titulus:

Kurzeanleitung / wie man unterschiedliche Erzk- und Berg = Arten / Mineralien / Gewächse und Erd = Sorten / nebst mehrerern seltsamen Dingen erforschen und angeben könne. Auf Ihr Königl. Maj. allergnädigstes Belieben an alle und jede dieses Reichs Einwohner / welche Lust haben dasjenige / so an einen und andern Orten gefunden werden kan / ans Licht kommen zu lassen / ausgegeben An. 1694. Stockholm in der Königl. Druckerey.

Ex contentis, quia non pauca eaque singularia ad Historiam Naturalem in specie R. Miner. facientia habent, summam quaedam hic allegare non poenitebit.

Cap. 1. §. 6. Ob irgends wo Quellen gefunden worden / so dürre und naße Jahre / Hunger / theure zeit / Krieg und anderes Unglück anzeugen? gleich wie bey Neukirchen in Oster-Gothland eine solche Hunger-quelle gefunden wird / und Dielerwegen in Engelland / auch wie man vermeinet / die ebbe Morala bey dero Stillstehung vorbedeuten soll.

§. 7. Ob Wasser / die keinen Grund oder boden haben / gefunden werden / nicht allein in Seen (wie man vor gewiß Vorgeben will / daß in der Wetter / unter Almborgs West-Seiten / noch nimmer einiger Grund gefunden sey) sondern auch in kleinen Seen / als in West-Gottlandt in den weißen und schwarzen Schlund.

§. 8. Ob irgend wo einiger Schlund-brunnen / stehende See / oder anderer Ort angetroffen wird / dahin bey'm Regenwetter alles wasser zu sammen ziehet / und gleichwoll kein Auslauf gefunden wird? als in Jügermannland an etlichen Orten / welche sie Kurimus nennen / da alles wasser gleichsam verschlungen wird.

§. 10. Ob Seen / so gar überwachsen sind / dergleichen man sagt / daß eine in tieffland seyn soll / welche dermaßen überwächst / daß man kan Heu drinnen machen / und darunter tieffes Wasser und Fische sind ; Oder aber Seen mit doppelten Boden bewachsen / daß sich die Fische darunter enthalten / und mit keinem Netze oder Garn gefangen werden können / als in Jemptland / welche der Seel. Drachenstern durch ein sonderliches Feuerwerck gesprengt hatt.

Cap. II. §. 15. Ob man jemahln durch einen harten Berg gekommen / wie gemuthmaßt wird / daß in dem Athwed und Petersberge Gruben gesehen sey / und in alten Gruben in Teutschlandt / nach einiger Berg-Chronicken Bericht / daß man endlich am Sole auff einem trieb-Sand gerathen / allwo man mit dem allerlängsten Stangen nicht hatt können einigen Boden erreichen.

Cap. III. §. 11. Ob es einiger Orten Erde gebe / so da scheint oder leuchtet / wenn man sie in Finstern reibet ? NB / Ist einmahl in Upland ohnweit Stockholm erfunden.

Cap. VII. §. 1. So werden auch auff öland Steine gefunden / die man zu belegung des Erdreichs gebraucht / mit weißlichen Stacheln / welche halbe Monden / Spieße representiren.

Cap. X. §. 2. Von Silber-Erze ist dieses allein zu mercken / daß dasselbige hier zu Lande mehrentheils in den feinen Kälck-Bergen oder in Marmor gefunden werde / deßwegen man in solchen Orten nach-

nachsuchen muß ; dieses ist fast von vielerley Gattung / bey uns aber giebt's mehrentheils Glantz-Erz / das mit feinen Körnern ist gemeiniglich reicher / aber es ist nicht allezeit das beste / so am meisten glänzt.

§. 8. Unter denen unterschiedlichen Lapländischen Berg=Arten / welche der Herr Baron Ammiral und Lands=Hauptmann Hans Klerck mir verehret / habe ich auch ein klein stück Queck=Silber=Ertz bekommen / sehr schön und hoch von Farben / roth und schwehr / wie ein Zinober.

Cap. XI. §. 15. Schörl / sind schwarke Körner grössere und kleinere / mehrentheils wie kleine Bohnen / ganz dicke und beynahе wie Granaten . In Norland findet man so grosse / als Wall=Nüsse / und sehen sehr gleich dem reichen Zinn=Ertz / so man nennt Zin=Graupen ; wenn man das kleinere findet / von der feinen und dichten Art / kan es sich wohl lohnen .

§. 9. Marien=Eis und Glimmer Gold samt Silber=Schein oder Mica ist eine Anleitung zu reichern Mineralien , insonderheit wo es in grosser Menge gesehen wird.

Tractatus hic apud nos paucissimis notus . Ex ipsa enim Autoris manu , idiomate Svecico et Germanico expressus Amicis suis exteris communicatus , in Svecia autem jussu Regis in singulis Regni praefecturis distributus fuit . Num post haec tempora Clariss. Vir D. Hiärne de promissa Historia Naturali Sveciae specimen aliquod ediderit , adhuc non constat , quod tamen omnes in Physicis curiosi impatienter expectant .

Multum negotii tunc faceſſebat Dno Hilken editio operis Posthumii Vincentii Placcii de Anonymis Scriptoribus detectis , quod collata
ma-

manu et opera reliquorum Testamenti Placciani Curatorum, ex schedis B. Autoris cum supplementis *Dni Mastrichti* Patricii Bremensis etc. typis evulgare per Dn. *Libernicel* Bibliopolam Hamb. satagebat, pro quo labore singulo ex Testamentariis quinquaginta quinque exemplaria completa debebant redire. Impendendus autem erat huic editioni labor haud exiguus: continuatio enim illa, quam *Vinc. Placcius* post primam editionem de Anno 1678 usque ad annum 1691 ipse concinnaverat, schedis male dispositis erat inscripta, dimidiatis verbis et compendiis scripturae concepta.

Antequam ad ea quae in publico vidi, progrediar, mentionem etiam facere debeo *Dn. D. Luders*, Medici Practici Excellentissimi. Hic in conquirendis curiosis ex R. Minerali in specie; admodum est sedulus, atque apparatus habet sat elegantem, inter alia asservat Cornu Ammonis magnitudine imperialis fere, ex pyrite, aeris polito ad instar coruscante, elegantissime a natura fabrefactum, nitidissimum ac integrum. Hujus viri humanitati etiam debeo, quod apud *D. Benedictum Nicolaum Petraeum*, qui anno 1699 *Trajecti* curiosam edidit dissertationem *de Natura Metallorum nonnullisque eorum Artefactis*, viderim Museum ex Mineralibus rarioribus constans instructissimum. Introduxit me idem Dn. D. Luders in aedes Physici Hamburgensis *Dn. D. Biefters*, Practici Famigeratissimi, Viri omni vultu et gestibus ad humanitatem compositi. Hic olim Londini in Anglia Praxin fecit, tanto cum successu, ut brevi tem-

po-

pore ingenti argenti summa ex Praxi sua ditatus, marsupio bene instructo post aliquot annos Hamburgum redierit. In discursu narrabat mihi de nova Podagram curandi methodo, qua clarebat h. t. Hamburgi rusticus: Solet hic quotidie pedes Podagricorum urina imbueri, et vesicatoria simul applicare, et ita permultos a doloribus consuetis restituit. Lotio Vaccino jam plures etiam uti intra corpus assumpto, vernali praesertim tempore, tanquam universali sangvinem depurante, meminit, quod ab Anglis, qui proprium lotium pro hoc scopo usurpare non dubitant, originem habere existimavit. Alius Practicus tunc degebat Hamburgi *Dn. D. Kirchboof*, qui in diffusa, qua gaudet praxi, tamen in libris colligendis fatis est curiosus.

Monstrabat ille mihi raram et optimam Coelii Aureliani editionem, a Domino Fabricio maximopere commendatam, quam ex Bibliotheca Gudiana, quae meo tempore auctionis lege publice distrahebatur, comparaverat. Titulus erat sequens: *Coeli Aureliani Siccensis, Medici vetusti et in tractanda morborum curatione Diligentissimi, Secta Methodici*

De Acutis morbis L. III.

Diurnis L. V.

Ad fidem exemplaris Manuscripti castigati et annotationibus illustrati. Cum indice copiosissimo, Lugduni ap. Guil. Rovillum sub scuto Veneto, M. D. LXIX. Alph. I. in 8. Aliam adhuc editionem inveni allegatam apud le Clerc Histoire de la Medicine. Part. II,

II. p. 160 , ubi haec leguntur : *Dalechamp a*
enfin fait imprimer ce même auteur , Caelius
Aurelianus , complet , à Lion en 1567 chez
Rouillé in octavo , avec des notes marginales ,
mais il ne s'est pas nommé . Quod si Domi-
 nus le Clerc hic errorem non commisit in al-
 legando editionis anno , pro 1569 ponendo
 1567 non adeo tamen differre hanc suam e-
 ditionem de allegata mea , putarem . Inte-
 rim ambas has editiones , accurata emendatio-
 ne , quae modo lucem conspexit *Clariss. Do-*
mini Joan: Janssonii ab Almeloveen , superabit ,
 spero .

Haec de privatis : pauca jam de publicis
 Hamburgensium Bibliothecis ut moneam , ra-
 tio postulat . Praecipua ex his atque instru-
 ctissima est *Johannaea* , quae ab Aede Sacra
 Divo Johanni dicata nomen habet . Biblio-
 thecarius erat *Dn. D. Suerlander* , ingenuus
 et erga peregrinos Humanissimus Vir . Praeter
 ingentem codicum impressorum numerum haec
 Bibliotheca Manuscriptorum rariorum bonam
 etiam partem habet , ex quibus mihi monstra-
 tis praestantiora erant sequentia .

D. Paul. Marqv. Schlegelii Herbarium vi-
vum tomis sex comprehensum , in quo plantae
omnes cum cura singulari exiccatae et explica-
tae a docta celeberrimi Auctoris manu cernun-
tur .

Chronicon Lubecense , ab anno 1106. ad an-
num 1430 .

No. 25. *De Konst Magia na der Meinung*
der Olden : Speculum Hermetis cum figuris :
Multa in hoc Manuscripto ex Marsf. Ficino ,
cujus allegatio frequens est , De caetero insi-
gnis

gnis in eodem figurarum et characterum Magicorum numerus. In legendo et excerpando hoc ipso codice Manuscripto multum laboris et operae quondam consumpsit Bibliothecarius nomine *Bluhm*, Schelhammeri Antecessor, qui postmodum tristissimo fato manus sibi intulit violentas, ac de laqueo in ipsa hac Bibliotheca, non sine insigni loci profanatione, se suspendit.

No. 58. *Pfelli Quaest. et solut. Physicae ad Imperatorem Michaellem Ducam Constantinopolitanum. Bonon. 1580. emptum a Luca Holstenio 1624.*

No. 62. *Fausi libellus. quod nihil incorporei insit Creaturis. Claudiani Mamerti de Statu Animae Libri tres. Typis quidem expressus hic liber, ast sedula Lindenbrogii manu castigatus et auctus.*

No. 94. *Physica nonnulla, inter quae nomina Piscium Albis fluvii, Latina et Germanica.*

In Octavo.

No. 7. *Album Friderici Lindenbrogii, in quo praecipuorum sui temporis Virorum, eruditione et artibus insignium, manu propria scripta inveniuntur.*

No. 8. *Scriptum magicum Germani idiomatis, Van der Punctier Kunst.*

In Duodec.

No. 5. *Abregé d'Alchimie, Auctor est Alpbidius. materiam nominat Mercurium: totus Tractatus duas facit plagulas.*

Inter curiosa Naturalia, quae in hac Bibliotheca simul asservantur, eminent Conchylia, atque ex his Conchae Musicae elegant.

gantissimae , itemque Concha Imbricata rarissima inventu . Mandragorae radicem mihi etiam monstravit Bibliothecarius eleganter exa-
ciatam , manibus in tergum versis , barba pro-
lixa , hianti ore , dentibus extructo , barbati-
senis figuram exacte referentem.

Alia jam Hamburgi est Bibliotheca Canoni-
corum , quae in templo Cathedrali asservatur .
Fundator hujus fuit *Dn. Goederfen* , Capitu-
li quondam Decanus , Amplificator *Dn. Mül-
ler* . Libri hujus Bibliothecae praestantiores
sunt sequentes :

*Ptolomaei Geographia , chartae pergamenae
perquam nitide impressa Ulmae Sued.
1486. cum chartis Geographicis eleganter
illuminatis .* Fuit hic Bibliothecae Pra-

gensis antehac civis , translatus ex hac in Ham-
burgensem , a milite quodam Sveco , Pragen-
sis devastationis socio .

*Mf. sub nomine Addenda et Delenda in Hi-
storia Thuana* , digiti crassitie auro obductum
et aluta investitum . Eodem nitore atque e-
legantia codex hic est compactus , quo Manu-
scripta illa Parisina , quae Guelpherbytanam
Bibliothecam orniant , et quorum superius fa-
cta fuit mentio , instructa cernuntur , ita ut
partem alias fecisse eorundem videri posset .

Habet haec Bibliotheca fundum ex legato
aliquot Canonorum , ex quo libri novi et cu-
riosi quotannis coëmuntur , qualis erat no-
vissimus ille , quem monstrabat Bibliotheca-
rius : *Mishna* , *Guil. Surenhusii Groningen-
sis* , *Amsterod. 1700 impress.* tribus volumini-
bus comprehensus , ac triginta imperialibus
comparatus .

Ex Bibliotheca in hortos , quos Hambur-
genſes habent eximios atque inſtructiſſimos .
Ex praecipuis , quoad rariores plantas , exoti-
cas praefertim , erat h. t. Domini *Laffdrop* ,
ſpatioſiſſimus , omni genere deliciarum uti et
vivario inſtructus . Plantas quas hic inveni
rariores erant ſequentes .

Pyrocantha ſpinofa , fructu *Sorbi Aucupa-
riae* , folio *Pyri* . Haec *Leonard. Pluckene-
tius* inter plantas *Virginianas* tab 46. fig. I. op-
time delineatam ſiſtit ſub nomine *Mespil. acu-
leatae pyrifoliae* , *denticulatae* , *splendentis* ,
fructu inſigni rutilo .

Azedarach Avic flore coeruleo , fol. jaſminii
fraxini . Eſt arbuſcula flore pentapetalo regu-
lari , fructu molli globoſo pentapyreno . Fi-
guram hujus ſatis accurate expreſſam inveni-
mus apud *Remb. Dodonaenum* p. 848. editionis
Latinae , *Belgicae autem* . p. 1326.

Laurus Americana : optimam hujus ico-
nem dedit *Franc. Steerbeck* in ſua *Citricultu-
ra* : vocatur etiam *Laurus Indica Aldini* , vel
Americana Ferrarii . *Tobias. Aldinus* enim
fuit , qui primam dedit hujus figuram in *Hor-
to ſuo Farneſiano* p. 60. edit. *Romanae* , quae
anno 1625. prodiit.

Colocaſia : de qua horti inſpector referebat ,
folia aquam , qua irrigari ſolet , in ſubſtantia
reddere . Eſt *Arum maximum Aegyptiacum* ,
Calcas , *Veslingii* , vel *Proſp. Alpini* . De A-
ro hoc Aegyptiaco vide , quae contra alios
cum fundamento ſcribit *Fab. Columna* in
Εκφράσεις Part. II. p. 1. Optimam hujus Ari
figuram habet *Abraham Munting* , in *Waare
Oeffening der Planten* , *Amſterd.* 1672 im-
preſſ. p. 273.

Malus Aurantia fol. Salicis : Rara species ,
 cujus *Johann. Bapt. Ferrarius in Hesperidibus*
meminit. Folia habet picta , fructum oblon-
 gum variegatum , aurei et flavescentis coloris .
 A Germanis nostris haec species appellatur
Türkische Pomeranz. *Ferrarius* fructum potius ,
 quam arboris folia et figuram describit . *Cl.*
Tournefortio , *Inst. Rei Herb*: p. 620 , vocatur
Aurantium Virgatum angustifolium. No-
 tandum autem , quod varietas foliorum se-
 cundum latitudinem atque angustiam in una
 eademque arbore plerumque observetur .

Ladanum , rectius *Cistus Ledon* , flore al-
 bo , magnae Rosae instar explicato . Hic fru-
 tex propter proceritatem suam his in regioni-
 bus raram , floremque admirationi erat omni-
 bus . Veram hujus figuram sub nomine *Cisti*
Ledon l. vel angustifolii , flore omnino inter-
 dum albo , sistit *Carol. Clusius* , *Hist. Rar.*
Pl. p. 77.

Acacia Cornigera , aculeis ad ramulorum
 exortum cornua bovina referentibus , siliqua
 rostrata , qua de vid. *Jacobus Breynius in Pro-*
dr. p. 4. Figuram curiosae hujus Plantae ha-
 bet *Hernandes p. 86.* et *Leonhard. Pluckenet.*
Phytograph. tab. 122.

Ficoidis rara species : cujus folia crassiora
 succulenta , in extremitatibus , eminetiis mar-
 garitas referentibus ornata sunt . De Fi-
 coide hac vid. *Volckamerus Flora Norimb. p.*
166 , qui solus hujus speciei mentionem fe-
 cisse observatur .

Aster Ayzoides , rectius *Ficoides African.*
fructu maximo eduli . *Ayzoides* a foliis sedi
 appellatur . Sub nomine *Ficus Ayzoidis* hanc
 spe-

speciem habet Hermann. Hort. L. B. p. 245.

Cereus altitudine sua viri proceritatem exaequans. Hunc *Tournefort* sub nomine *Melocacti Americani*, monocloni describit; *Dn. Hans Sloane* autem in *Catal. Plant. Jamaic.* 196. *Cereum* crassiss. fructu intus et extus rubro, nominat.

Tithymalus African. racemos. Flore albo pulchre circumcirca diviso. Quem in *Hist. Nat. Imperati* sub *Tithymalo aphylo*, planta di *Mauritania*, descriptam invenimus.

Rapum S. Antonii, planta novissime ex India transmissa, pro rarissimo exoticarum Horti sui specimine ab Hortulano habebatur. Statura sua et floribus Turritim perfecte referebat.

Haec sunt quae Hamburgi notatu digna inveni: praetereon. lubens alia omnibus obvia et spectata. Non possum autem, quin summa, qua decet laude, antequam hinc discedam, praeter caeteros jam supra laudatos, memor sim Amicorum quorundam Veterum, ex parte Academicorum, eorumque favorem et collata in me beneficia publice praedicem. Quos inter *Dn. M. Müller*, Ecclesiae cujusdam suburbanae Pastor, et *Dn. Luttman* S. S. Ministerii Candidat. Praesertim huic postremo, pro Sytaticis Londinum ad Sororis Maritum *Dn. Heidridder*, Mercatorem datis singulari amore grataque voluntate me semper obstrictum profiteor. Primo loco mihi hic nominandus etiam fuisset *Dn. D. Nehmitz*, qui praxin Medicam tunc Hamburgi feliciter exercebat. Hujus benevolentiae debeo, quod in aedes Domini *Dangerfeld* Reg. Polon. et

Elect. Saxon. apud Hamburgerfes Legati Residentis , introductus , ac multo ibidem honore ac beneficiis tractatus fuerim . Sciunt , quibus nota Domini Dangerfeld erga externos comitas et humanitas summa , quam splendide excipiat in aedibus fuis , fupra fidem magnifica fuppellectile atque apparatu inſtructis , ſibi commendatos . Quapropter tacita potius veneratione Generoſi hujus viri laudes praeterire , quam ejusdem Magnificentiae intempeſtiva relatione quicquam detrudere , conſultum duco .

Hamburgo , adulto jam Septembri menſe , Amſterodamum rheda conducta cum duobus ex Sileſia mercatoribus profectus ſum , via illa ordinaria , quae per *Boxtehudam* , *Bremam* et *Lingen* in Hollandiam ducit : *Amſterodami* autem tunc nihil moratus , ſtatim *Hagam Comitum* me contuli , ubi obtentis pro libero com meatu patentibus a Reginae M. Brittanicae legato *Dno Stanhope* , *Roterdamum* abſceſſi . Hic , antequam Angliam peterem , *Dominum Bayle* convenire diſcupiebam , a quo autem acceſſus propter morbum , ipſi poſtea fatalem , denegabatur : Et affirmabat *Dn. Leers Bipliopola* , vir prudens ac literatus . *Dno. Bayle* ab intimis , nihil eſſe fictum in hac deſiderati acceſſus declinatione : aegrotare enim jam ab aliquot menſibus optimum hunc virum trifti malo , omnem ipſi ſuccum et ſanguinem exhauriente , cum doloroſa ſanguinis et puris expectoratione , quod ipſi non ſolum ſermonem redderet difficiliorem , ſed ſimul etiam ſcriptis ac deſenſionibus contra adverſarios neceſſariis , inſignem injiceret remoram .

Post

Post unum igitur alterumque in laudati *Dni Leers* Bibliopolio aditum, nihil praeterea Rotterodami egi, sed in portum haud procul abiacentem *Helvoet*, *Sluys* cum nave delatus, ibidem ordinariam illam transfretationem per Celocem (*Paquet Boot*) in Angliam expectavi. Erat die Dominica hora fere septima pomeridiana, ubi dictam navem conscendi, simulque me prima vice stupendis illis maris fluctibus commisi. Licebat mihi tunc adeo quidem felici esse ut altera die hora quasi undecima antemeridiana, optatum Angliae portum, *Harvicum*, tenere, ventis impetuosius quidem, ast cursui nostro faventibus, concederetur: sequenti die *Londinum* pergebam, quod primo Octobris St. N. vidi, admiratus sum. Urbem enim hanc totius Europae Christianae fere maximam non sine singulari stupore lustrabit curiosus advena. In tota longitudine sua cum suburbiis, quae ab ipsa civitate vix a se vix quidem distingues, septem leucas Anglicas, quae milliare Germanicum fere excedunt, habet. Num Parisiis numero civium atque hominum cedat, meum non est determinare: hoc saltem certum est, in plateis illis majoribus Urbis ac viis regiis, tantam omni tempore occurrere hominum turbam, ut a pressione liber sit nemo, qui pedibus iter facit, ut taceam periculum a vehiculis publicorum perpetuo cursu obviantibus imminens. Singularia hujus Urbis sigillatim recensere non stat sententia: pleraque *Londini* ornamenta tacendo laudavero, ne quid descriptionis tenuitate horum splendori detrahatur. Summatim autem pauca eaque praecipua,

pua , Tibi , *Amice* Integerrime , in memoriam revocabo , qui , cum Angliam ipse lustraveris , omnium optime , ubi deficio , commemoranda supplebis .

Primum quod visitavi , ex aedificiis publicis erat magnum illud Xenodochium publicum , quod *Anlice Charter-Hous* appellatur . Per totam Europam invenietur vix ullum , quod tam insignes ex Magnatum legatis possidebit divitias , quam hoc ipsum : ita ut reditus ex fundo annui quinquies mille librarum Anglicarum summam conficiant . Aluntur in hoc senes pariter ac Juvenes ; maximam partem autem faciunt pueri parentibus orbi , quorum tenera aetas , ab aliquot praeceptoribus hunc in finem constitutis , ad pietatem et humanitatem solícite informantur : beneficia quoque apud hos minus cessant cum fine pueritiae ; siquidem illi , qui literis operam dare apti reperiuntur , in Academia Cantabrigiensi postea largissimis , pro studiis prosequendis , fruuntur stipendiis .

De *Monumento* , insigni Londini decore , quod in aeternam tristissimi hujus Urbis fati , quo principalior ejus pars anno 1666 flammis consumebatur , memoriam erectum est , mirari satis nequibam , in angulo Urbis tam abjecto inveniri stupendum ejusmodi obeliscum . Narrabant autem ideo hunc pro Monumento locum fuisse electum , quia huc usque flammarum furor in fatali illo incendio , nec plus ultra saevierit : interim spatium illud , ex quo conspicitur magnificum hoc opus , angustum fatis est , ita ut integrum a fundamento ad fastigium usque oculis usurpari a nullo fere la-

latere possit, siquidem domunculis circum circa cominus adjacentibus septum est.

Pontem illum famosissimum, qui ex Londino ad alteram Civitatis partem, Episcopi sedem ducit, nemo qui transgreditur, pro ponte habebit: ex utroque enim latere domibus stipatus est, ita ut in uno solo saltem pateat, eoque fere medio loco, ubi ex ponte in Tamesin possis prospicere.

In Arce Londinensi, vastissimo fortalitio, quae ab Anglis *Tower* appellatur, sequentia mihi fuere monstrata: Atrium, in quo arma vetusta illa asservantur, quae regnante Elisabetha, Hispanis terra marique caesis, Londinum in Victoriae testimonium transferebantur: aliud, integram Regum Angliae, ad vivum vultibus et staturis repraesentatorum, equis cum consveta armatura insidentium, ferriem continens: in inferiori contignatione non procul a turre, in qua Regius Thesaurus asservatur, spatiosum est atrium, omni genere tormentorum bellicorum instructum, quae inter tunc monstrabantur nobis tormenta aliquot ex aere in urbe Hispaniarum Sevilla a Germano artifice conflata, quae in nuperri-
ma Portus *Vigos* expugnatione, partem praedae fecerunt: immediate supra hoc, insignis atque infinitus fere numero asservatur apparatus Bellicus, qui in omni genere armorum, equites juxta ac pedites instruendum, consistit. Non vetusta haec, sed nova plane, ad hodiernum belligerandi modum perquam nitide confecta atque elegantissime disposita sunt. Quibus certus artificum praeest numerus, qui defendendis a situ et rubigine his ar-

mis quotidianam impendunt operam. Ille qui nobis monstrabat Bellicum hoc Gazophylacium, afferebat haec arma pro instruendo plus quam centum mille militum exercitu sufficere. Tandem in supra allegata turri, ejusdemque loco subterraneo fornicato, accensis candelis a muliercula, monstrabatur nobis *Thesaurus Regius*, qui ex sequentibus potissimum constabat speciebus :

1. Corona Imperiali, qua Reges Angliae omnes jam ab Eduardi Confessoris tempore coronati fuerunt :

2. Orbe Imperiali, cujus summitatem ornat adamas unciam unam cum dimidia crassitie sua exaequans :

3. Sceptro Imperiali cruce signato, cum adamante ingentis etiam pretii :

4. Sceptro Columba signato, Pacis Symbolo :

5. Pediti Sti Eduardi ex auro obryzo malleato, quod Regibus ad Coronationem ductis, praeferri solet :

6. Salino pretioso, auro et gemmis conspicuo, Arcis Londinensis figuram exprimente, quod in mensa Regia Coronationis tempore exponitur :

7. Curtana, Ense Clementiae (*the Sword of Mercy*) qui inter duos Justitiae Enses, Spiritualem et Temporalem in actu coronationis praefertur :

8. Pelvi argentea deaurata, ex qua Regina et Regia familia baptizati fuerunt :

9. Alia adhuc majori, quae Carolo II. Regi a Pleymouthensi Civitate dono data fuit :

10. Reginae diademate (*the Queens Circlet*), quo caput ad coronationem ducta tegit :

11. Corona , pro Reginae Mariae Wilhelmi Conjugis , coronatione facta :

12. Ejusdem Reginae Orbe et Sceptro Regio :

13. Corona Status , qua Regina Parlamento praesidens , ornata cernitur . Huic maximi moduli Smaragdus septem uncias in circumferentia habens , Margarita item Orientalis inusitatae magnitudinis et Rubinus immensi pretii affixa sunt :

14. Sceptro ex ebore eleganter confecto , cujus fastigium columba ornat , quo Regis Jacobi conjux in coronatione usa :

15. Armillis et Calcaribus aureis , Reginae in Coronationis actu praelatis :

19. S. Ampulla , aquilam repraesentante , ex puro auro conflata , in qua sacrum chrisma Regum Angliae Coronationi et unctioni dicatum , cum cochleari aureo , asservatur . Quae duo pro antiquissimis habentur hujusce Regni cimeliis .

Inter rarissima Londini numerandum etiam magnificum illud aedificium in *Moor Fields* , quod pro recipiendis ac custodiendis Maniacis ac Lunaticis est extructum ac *Bedlam* ab Anglis appellatur : Pro Regio Palatio primo intuitu hoc potius , quam pro Stultorum ac Furiosorum receptaculo habebis ; nec injuria dixit Gallus ille de Anglorum singularibus a Rege suo sciscitatus : possidere Londinenses Moriotrophium , quod magnificentia vix cederet Parisiensium Arci Lupariae (*Louvre*) : ad

quod Rex : nae! Angli ingentem stultorum ex magnatibus numerum habeant necesse est , qui in erigendo hoc moriotrophio tam sumptuosi fuerunt. Aedificium hoc anno 1676 finitum , et pretio 20000 Librarum Anglic. extructum est , quod suppeditatum a civibus Londinensibus. Interiorem aedium partem faciunt duo in insignem longitudinem extensa atria , ex quorum latere aegrotantium cubicula. Alitur pro curandis his miseris Medicus , et accidit non raro , ut intra annum plusquam quadraginta ex hoc loco sani et curati secedant.

Non procul hinc a sinistris in suburbio *Hoxton* , Xenodochium publicum cernitur , cujus Auctor fuit *Dn. Ask*. Inservit hoc sustentationi viginti senum pauperum ac totidem puerorum ; aedificium nitidum satis atque elegans. Reditus hujus Xenodochii ante annos aliquot in signe habuerunt augmentum ex legatione *Dominæ Leade* , Matronae Famigerabilis.

Collegium Medicorum hoc tempore est in *Warwick-Lane* , non procul a *Newgate*. *D. Harveus* anno 1652 hoc Collegium Bibliotheca et omnibus suis bonis ditavit. Privilegiis gaudet insignibus per Parlamentum concessis. quorum rigore nulli permittitur extero , medicinam Londini facere , nisi potestate ab hoc Collegio data , sigilloque munita. Numerum hujus Collegii facit Praeses quotannis novus , quatuor Censores atque octo Electi , Assessorum autem quadraginta sunt numero , quo referuntur Archiatri Regii , qui hoc tempore erant

D. Hannes ,

D.

D. Laurence , Emeritus ,

D. Lister , qui Wilhelmi tempore cum Comite de Portland Galliam visitavit , et brevium hujus itineris literis consignavit ac typis evulgavit .

D. Hans Sloane , Societ: Reg. Secretarius . scriptis in publicum editis perquam Clarus , *Catalogo nimirum Plantarum , quae in Insula Jamaica proveniunt , adjectis aliis , quae in Insulis Madera , Barbados , Nieves et S. Christofori nascuntur . Londini 1696 in 8. uti et Historiae illius naturalis Insulae Jamaicae editione ,* cujus Tomus primus nuperrime subsequenti titulo prodiit : *A Voyage to the Ylands Madera , Barbados , Nieves , St. Christoffers and Jamaica , London , 1707 in fol.* Et

D. Aburdnet natione Scotus , Principis Georgii Archiater , atq. qui reliquis fere omnibus a Regina ipsa et Magnatibus propter dexteritatem suam praeferebatur .

In Bishop-gat-Street est *Collegium Greshamense* . Hoc ipsum nostro tempore maxime celebratum est a Societate Regia , quae hic singulis hebdomadis die Martis , congregatur . Auspiciis habuit sub Carolo II. Rege , circa annum Chr. 1663 . Formatur haec ex Praefide , Assessoribus ac Collegis . Thesaurus ille Naturalium , quae in isto Collegio asservatur , satis est curiosus , exceptis praeparatis illis Anatomicis , quae maximam partem nullius sunt pretii . Maximam partem naturalium ex utraque India accersitorum Collegio et Museo huic *Daniel Colwal* donavit . Catalogus omnium anno 1687 in fol. prodiit , sub titulo : *Musei Societatis Regiae , auctore Nehemia Grew ,*

Grew. Erat meo tempore Societatis hujus illustre membrum *Dn. Woodward*, Medicinae Doctor et Practicus, vir in Naturali Scientia ad stuporem versatus, de quo vel Geographia Physica testari poterit, quam nuperrime edidit, et quae interpretem in Helvetia *Dn. D. Scheuchzerum*, Amicum nostrum adepta est. Possidet *Dn. Woodward* thesaurum incomparabilem ex Mineralibus et Conchyliis petraefactis, quae partim in Brittania ipse collegit, partim etiam egregie auxit, comparatis ex omnibus fere Europae angulis Mineralium rariorum et Conchyliorum petraefactorum exemplaribus. Bibliothecam etiam habet selectissimam librorum Physica et Medica tractantium. Antequam Collegium hoc relinquam, non possum quin memorem *Dni D. Hans Sloane*, qui Secretarii munere in illustri Societate quidem fungitur, ast longissime remotus ab hoc Collegio in *Southamptons-Square* aedes proprias inhabitat. Dici non potest, quantum apparatus Exoticorum Naturalium omnis generis Excellentiss. ille Vir possideat, quae partim ipse collegit et secum ex Occidentali India apportavit, partim ex liberali B. Antecessoris sui legato acquisivit. Inter rariora erant ova Testudinum, in littore Jamaicensi Americae ab ipso reperta. Monstravit mihi etiam lagenulam vitream, quam in littore Maris Mediterranei casu invenit curiosus nauta: obducta haec erat circumcirca fere Corallio albo, jucundo et curioso spectaculo, quod de modo generationis marini hujus concreti insignem curiosis naturae scrutatoribus foenerari lucem potest: nihil autem disse-

ferebat lagenula ab illis , quae hodiernum recipiendis vinis Hispanicis ac Canariensibus inserviunt (eine rechte schwarz-grüne runde Secce oder Frontignac Bouteille). De Bibliotheca *Dni D. Sloane* , quae in Medica Scientia nullam Londini habet parem , nihil jam dicam ; laudata mihi haec fuit a *Dno D. Hudson* , Oxonii , qui libros Medicos in Bibliotheca Bodlejana deficientes , apud *Dn. D. Sloane* Londini , in instructissima ejus inveniri , fateri non dubitat .

Aliud Ornamentum atque insigne Decus habet nunc Medicorum et Chirurgorum Londinensium coetus , *D. Cyprianum* , qui ex Hollandia Wilhelmi tempore ab Archiatro Regio *Dno Millington* accersitus , inclytis curationibus , in specie autem Calculi sectione famam et opes sibi acquisivit brevi tempore ad invidiam usque magnas . Primus in Anglia , qui Curae atque operationi ejus se subjecit , Collegii Medici Londin . Praeses et Archiater Regius , de quo jam dixi , tunc plusquam sexagenarius , fuit , quem a calculo praegrandi tunc felicissime liberavit . Atque ita fieri aliter non potuit , quam ut ab eo tempore per ingentem quasi saltum , ad summum gloriae gradum in professione sua pervenerit . Notus de caetero illustris hic vir ex inaudita sectione Caesarea , quam ante aliquot lustra apud Batavos insigni cum laude administravit , ubi in foemina viginti et unum menses gravida , non ex utero , sed ex uteri Tuba , foetum jam putrescentem cum secundinis totum extraxit , atque a misera matre evidenterissimum ; vitae periculum inusitato exem-

exemplo avertit. Integram Historiam peculiari Epistola ipse publicavit *Auctor Lugd. Batav.* 1700. Miratus sum Excellentissimi hujus Chirurghi singularem humanitatem atque modestiam, rarum in hoc genere Heroum contingens. Apud plerosque enim alios Anglorum et Batavorum Chirurgos Operatores, nescio quam morum asperitatem observare licuit, quam continua manuum cruentatione atque necessaria erga patientes crudelitate, in administrandis operationibus contrahere praeter intentionem, mihi fere videntur. Londini curiosa antequam relinquam, paucis mihi mentio facienda Bibliothecae illius, quae in suburbio Westmonasteriensi, prope magnificum illud et perantiquum aedificium, Westminster-Hall appellatum, in peculiari Sacello asservatur, et *Cottoniana*, a fundatore *Rob. Cottono*, appellatur. Consistit haec in Manuscriptis rarissimis et antiquissimis, praefertim illis, quae Historiam Angliae Ecclesiasticam et Politicam concernunt. Videbis hic etiam fragmentum S. Evangelii Graecum literis auro et argento pictis, antiquo et pretioso scribendi more, exaratum: Librum Geneseos idiomate Graeco itidem scriptum, qui pro antiquissimo totius Europae Manuscripto a Curiosis aestimatur; Ut nihil dicam de insigni illo, quem haec Bibliotheca possidet, Idolorum Veterum Romanorum, numismatum item Anglicorum et Palaeo-Saxonicorum thesauro. *Catalogus* hujus Bibliothecae prodit *Oxoniae in fol.* anno 1696 *auctore Thoma Smitho.*

Non procul Londino, in districtu illo, qui
ad

ad Westmonasteriense suburbium adhuc refertur, delectatus sum visitatione magni illius Xenodochii, quod ab adjacente vico *Chelsey*, *Chelsey Hospital* appellatur, et a Carolo II. in solatium Militum laesorum vel exauctoratorum fundatum fuit, in cujus memoriam quoque statua Regis Caroli ex aere conflata, in medio areae posita, cernitur. Aedificium hoc magnificum opus est, tanto fundatore dignum; Habet Sacellum cum duobus Diaconis, Medicum etiam, et Pharmacopoeum. Alit autem quadringentos et septuaginta sex milites emeritos, exceptis Locum tenente et reliquis officialibus in commodum Alumnorum constitutis; pro salario dictorum officialium, famulorum famularumque, tria millia librarum quotannis consumuntur.

Inter publica loca numeratur etiam Pharmacopoeorum Londinensium Promptuarium, *Apothecari-Hall*, non procul a Ludgate situm. Ducebat me in hunc locum *Dn. Godfried*, qui Promptuario huic quondam erat praefectus, jam autem in alia urbis parte, *Common-garden* appellata, domicilium collocavit. Ex hoc Promptuario omnes Pharmacopaei sua comparare simplicia, imo et praeparata chimica, necesse habent. Occasione discursus nostri multum mihi narrabat *Dn. Godfried* de B. Boylæi in Chymicis curiositate, cui etiam quondam multum operae in ejusmodi laboribus, praesertim in praeparando Phosphoro suo, locasse asserebat. Dicebat mihi de stanno Anglico, bonitatem ac praerogativam ejus deberi regulo antimonii martiali, cupro ac bisinutho, quae ad justam
pro-

proportionem mixta, stannum optimum ingrederentur ; Bismuthum autem huic mixturae inserviens omne ex Saxonia nostra huc transportari, nec in Angliae fodinis idem facile reperiri fatebatur.

Per laudatum *Dn. Godfried*, alium quendam frequentare licuit Chymicum, qui Parisiis quondam per aliquot annos commoratus fuit. Commemorabat iste inter mutuos discursus, quos de *Venenis* occasio suggerebat, sibi aliquando ab Italo quodam Lutetiae degenti, arcanum, praeparandi praesentissimum venenum, processum patefactum fuisse, cujus fundamentum sequentia requirebat plusquam Barbara postulata : Misero homini ad patrandum facinus aere conducto exhibeantur per aliquot septimanas loco alimentorum nil nisi saccharata, ut lymphae et salivae fontes septica virulentia probe imbuantur : his substituantur ultimis diebus conserva Rosarum, cui paucissima Mercurii sublimati portio admixta fuerit, quo facto brevi temporis spatio ad salivationem disponetur vivens illud venificii subiectum ; saliva fluente, applicandae hominis illius Parotidibus et cavitatibus sub axillaribus Viperarum, quarum applicatione prius non cessandum, quam probe vexatus ab his miser intumescere incipiat, saliva Venenata interim ex ore et faucibus copiosius erumpente, quae in vasculo solícite colligenda et ad usum servanda. Coeunt sic in unum concretum, pravorum et corrosivorum hominis humorum sentina, Mercurii sublimati virulentia, et Viperarum venenum, quale magna ad perpetranda certissimi eventus scelera efficac-

cissimum esse , nullus dubito . De caetero fastebatur peritissimus ille Chymicus , salvari interdum homines illos , Veneficii viva instrumenta , a Viperis demorsos , et id quidem ipsius salivationis ope , quam propinatis salutaribus e lignis decoctis moderari norunt , atque in salutem vergere faciunt Sicarii illi Venefici . Multa hic pro asserenda nefandi hujus processus fide ex Physica et Medica doctrina adduci possent , nisi res in se ipsa maxime detestabilis manum de tabula remove juberet . Hoc saltem tacere non possum , quod non ita pridem de venenatis qualitatibus salivae ex consveta mercuriali salivatione promanantis , observavi : Canis Domino suo admodum fidelis et charus , sitibundus , ex defectu aquae limpidae ; casu in liquorem illum in vasculo quodam collectum incidit , qui ex Domini sui tunc salivantis ore recens prodierat , quo avide exhausto , protinus vertigine et convulsionibus corripitur atque in terram concidit mortuus . Si tanta salivae Mercurialis malignitas , quid de illa expectandum , quae veneno viperino maxime fermentifico et lethali erit impraegnata ?

De Reginae M. Britanniae hodie Regnantis statu ut pauca etiam adjiciam , quantum mihi quidem videre licuit , est ille certo longe splendidissimus . Triplicem vidi in Aula ejus Comitatum Militarem : Primum quidem Equestrem , *the Horse-Guarde* , qui Regnam peregre proficiscentem ante et post currum comitari solet , atque ex his Equitibus duo semper sub introitu Aulae Regiae , quae *St. James* appellatur , gladiis denudatis equis insiden-

tes, excubias agere solent: alterum Pedestrem, *Helvetorum habitu* incedentem, scarlatinis vestibus auro distinctis et halebardis deauratis instructum: tertium ex Magnatum filiis constantem (*the Gentlemans Guard*) qui in Reginae atriis tantum, hastis brevioribus muniti splendidissime vestiti, duplici serie locati, officium faciunt. Ex Clericis singulis mensibus bini, Diaconorum more, Reginae serviunt. Communiter admodum juvenes hi sunt, nec ab Archi-Episcopo, sed a Magnatibus Reginae proximis, Eidem praesentantur. Multum hoc Sacerdotale *Γέννημα* indulgere juventutis genio aliquando solet, et accidit Caroli II. tempore, quod unus ex ejusmodi Diaconis Regem venatum cursantem equo vectus secutus fuerit; Rex miratus Clerici hujus curiositatem, quendam ex comitatu Nobilem interrogavit, qualis hic? qui Regi statim respondit: *Sir, th'is Your Majesty's Jagt-Capellain*. De statu Ecclesiastico in Anglia alias notum satis, eundem fere ad faciem Romano-Catholicorum esse conformatum, ac redditibus satis sufficienter instructum, quod tamen de superioribus, Episcopis puta ac Canonicis e. g. potissimum intelligendum: inter Parochos enim Provinciales tanta ut plurimum observatur paupertas, ut vitam miserrime ducant; cui malo atque indigentiae Cleri ut subveniret Regina, argentum illud omne, quod ipsi ex officiorum publicorum distributione redire solet, misero Clero perpetuo legavit, quod sexies mille librarum summam quotannis facile conficit. At do-
lent egentes Parochi, majorem horum redi-
tuum

tuum summam possidere ad hunc usque diem Pellicum Regiarum incolumem numerum, quibus ex Caroli II. et Wilhelmi liberalitate hic census in salarium ad dies vitae cessit. Nolentes volentes igitur Parochi expectent necesse est, donec debitum Pellices illæ naturae solvant, et aliud salarium a Carolo in altero mundo obtineant. Redit hic in memoriam *Dna Cleveland*, Pharmacopoei Parisiensis filia. Haec Caroli II. tempore Parisiis Londinum veniebat, ut Regis manu a scrophulari malo, (*from the Kings Evil*) quo laborabat tunc, liberaretur. Hujus Pulchritudo inter tangendum, adeo Regem fascinabat, ut ipsam postea Ducis praerogativa et titulo, praetereaque centum librarum reditu menstruo donaret. Clementiorem adhuc Regem Carolum experta est *Dux de Portsmouth*, cui inusitato exemplo Rex mille librarum summam erogavit singulis mensibus, quantum, nec plus Regina ipsa Maria Wilhelmi Conjux, a Rege et Parlamento, ut Aulae ejus sumptibus sufficeret, olim obtinere potuit.

Verum quousque divagor? Ordo jam postulabat potius, ut de Cathedrali Londinensium Templo D. Paulo dicato, Palatiis Regiis, Curiis ac centum aliis notatu dignis urbis hujus commemorarem, nisi institutum meum me in his talibus diffusiores esse vetaret, praesertim cum non deficient Auctores Topographici antiqui ac hodierni, qui Londini rariora eleganti atque accurata descriptione prosecuti sunt, quos inter *Coulon dans sa description de l'Angleterre*, *Jouvin*

E 2

de

de Rochefort dans son Voyage d'Angleterre , Dn. Chamberlain in the Present State of England , et qui novissime de Londinenſi urbe . in ſpecie ſcripſit anonymus quidam ſub titulo : *A New View of London apud Job. Nicholſon* , 1708. 8. De ſtupendo tamen Templi Paulini ædificio non poſſum quin paucis ſaltem moneam , ad perfectionem hoc nondum quidem eſſe perductum , quamvis in perficiendo illo a quinquaginta fere jam annis occupatus fuerit ingens artificum atque opificum numerus . Spem tamen eſſe affirmabant plerique Londinenſes Cives , intra quinquennium ut ultimam experturum ſit manum opus hoc admirandum , ad quod nec Ephesii illud Delubrum , nec quicquid Romana manus et tot ſeculorum ingenia præſtiterunt , comparanda ſunt .

Londino , menſe Novembris *Oxonium* , plusquam ſexaginta leucas Anglicas hinc diſtans , me contuli , Bibliothecam præcipue , Hortum et Collegia hujus Univerſitatis perluftraturus . Habet autem *Oxonium* , uti notiſſimum , Academiam , ſi Collegia et Bibliothecam ſpectes , incomparabilem , ſi ſtudia ibi florentia , nulli per totam Europam ſecundam . Numerantur Collegia hujus Univerſitatis octodecim , omnia reſcitibus liberaliter admodum inſtructa , quae inter eminent *Collegium Corporis Chriſti* , quod incredibilem argenti ſummam ex fundo ſuo quotannis capit . Syſticas habebam ad *Dn. Hudſon* t. t. Bibliothecarium , a quo perquam humaniter exceptus et perluftrandi Bibliothecae arcanæ occaſionem nactus ſum exoptatiſſimam .

As-

Affervatur haec Bibliotheca in Collegio Universitatis, (*University Colledge*) fundata ante hos centum et quod excurrit annos; a *Thoma Bodley of Exeter*, qui *Casaubono teste Ep. 745.* 200000 libras Gallicas pro extruenda hac erogavit. Huic *Seldenus* Bibliothecam suam exquisitam testamento legavit: *Wilb. Ladus* autem *Archi-Episcopus Cantuariensis* et alii post adauxerunt. Stupebam incredibilem librorum apparatus, ordinem elegantem atque aedificium tanto Thesauro recipiendo maxime accommodatum. Miraberis hic libros in majori forma, et ut vulgo loquimur, in folio omnes catenis ferreis esse alligatos, utpote qui in inferiori regione, quae omnibus patet, in armariis suis dispositi sunt: Reliqui minoris formae, in pergulis superioris et mediae loci regionis locati sunt, ad quas gradus et scalae ducunt peculiaribus valvis oclusae, et quas adire nulli extero jam amplius conceditur, ob frequentiora furta, quae hac occasione a male moratis facta quondam fuerunt. In superiori contignatione ipsius aedificii spatiosissimum est ambulacrum, ex utroque latere iconibus Virorum illustrium exornatum, quas etiam *Dn. Hyde Catalogo Bibliothecae Bodlei. Oxon. e Theatro Scheldon. 1674 in fol. vulgato*, inseruit. Sub *Thomae Bodlei* effigie leguntur haec verba: *Hospes rogatus siste, Bodleumque loci genium et Musarum Maecenatem ultra Caesares Augustum, qui Bibliothecam molemque hanc stupendam condidit, intuere. Hoc volebam, nescius ne esses. Vale!* In eodem hoc ambulacro affervatur etiam Nummophylacium, atque inter ra-

riora ejus *exemplar librae Anglicanae*, quae argentea est moneta in forma quadrae, cum effigie Caroli I. statuae Equestris, anno 1642 cusa. Interrogavi postea Dn. Hudson, de *Rob. Baconis Manuscriptis*: an adsit illud, quod *Theatrum Naturae* inscribitur; ast licet Bibliothecarius ipse in catalogis ac scriniis Manuscriptorum sedulo quaereret, nec tamen inveniebatur, putabat autem rapacem manum abstulisse hanc Manuscriptor. Baconianorum partem, quales antehac fatis frequentes habuissent. Quaecebam inter impressos codices *Petri Arlensis de Scudalupis Sympathiam Septem Metallorum ac selectorum lapidum ad Planetas*, et quidem editionem illam, quae Madridi et Romae, ante corruptam illam Parisiensem quam de An. 1610 in 8vo habemus, in fol. primum prodiit, et cujus apographum in Germania apud Virum quendam Clariss. olim offendi, sed frustra: item *Asuerii* cujusdam *Icones Viror. illustr.* ast cum eodem successu. Querebatur, quod mirabar., D. Hudson. quod sumptus non suppeterent pro coëmendis novis ac aliis, qui deficerent in hac Bibliotheca, libris, cum tamen quotannis, ut ipse fatebatur, ex legatis, atque aliis Curiosorum donis magna fiat fundo hujus Bibliothecae accessio. Adornabat jam ipse novum Bibliothecae catalogum, priori, quem Dn. Hyde ut paulo ante recensui, edidit, auctiorem. Dicebat etiam in Theatro Sheldoniano sub prelo jam sudare *novam Livii editionem* ex Manuscriptis Bibliothecae, aliquot decadiibus, quae haëtenus pro deperditis habebantur, adauctam, Praeter Bibliothecam vi-

sitavi frequentius Oxonii *Hortum Academicum*, cui jam praeest *Dn. Bobart*, Botanicus inclytus, Vir Humanissimus. In limine Portae leguntur sequentia : *Gloriae Dei Optimi, Maximi, Honori Caroli Regis, in Usum Academiae et Reipublicae* 1632. *Henricus Comes Danby*. Refertus est is Hortus plantis indigenis juxta atque exoticis omnis generis. Ex rarioribus mihi monstravit *Dn. Bobart* sequentes :

Sorbum veram, qui foliis et flore cum *Sorbo Aucuparia* fere convenit, fructu autem gaudet plane diverso, utpote qui pyriformis est, arillis instructus, caro fructus est instar mespilorum. Nasci hanc arborem in unico Angliae loco sylvestri, *Wustorshire* appellato, ex quo haec species in hortum translata, affirmabat.

Helianthemum, flore pentapetalo, coloris incarnati.

Scyllam veram, quae florem habebat hexapetalum stamineum fere.

Teucrium Boëticum.

Arborem Balsami Peruviani, quae est species *Abietis*, qua cum, foliis et conulis perfecte convenit, odore autem fragranti et suavi longe antecellit. Genita fuit haec arbuscula duos cubitos jam alta, ex ipsis conorum granis, *Dno Bobarto* quondam ex Mexicana Colonia transmissis, septem annorum spatio.

Cedrus Vera ex monte Libanon foliis stellatim dispositis abiegnis fere, ibidem ex semine producta.

Pistacia Vera, juglandis folio, fructu nuci-formi.

De caetero mirabar in hoc Horto ingentem Taxi copiam , ex qua integras statuas concinnatas vides , quales duae illae sub introitu Horti conspicuae , sexu distinctae : altera enim species baccam fert monopolyrenam , coloris miniacei , altera vero sterilis est. Multum commendabat *Dn. Bobart* in discursu suo *Clariss. Rivini* nostri methodum Botanicam , et de *Dno Sherard* Anglo Botanico accuratissimo , quem Lipsiam transeuntem anno 1698 vidi , mihi narrabat , eum jam Smyrnae in Asia degere ibidemque Consulis Anglicae nationis munere fungi.

Habebam etiam Literas ad *Dn. Edwardum Lbnyds* , Musei AshmoleaniInspectorem : et licet ipse non adesset , tamen per famulum monstrabantur mihi Musei rariora. Est autem hoc in egregio illo aedificio , non procul a Theatro Sheldoniano dissito , quod anno 1683 sumptibus Universitatis erectum , ac Laboratorio Chemico et Bibliotheca praeter dictum Museum , sumptibus Universitatis , auctum fuit. Portae limini sequentia literis majoribus inauratis inscripta :

*Museum Ashmoleanum , Schola Naturalis
Historiae , Officina Chymica .*

Musei hujus fundator fuit *Elias Ashmol* , insigne accepit augmentum ex haereditate *D. Rob. Huttington* , qui multas possedit quondam antiquitates Aegyptiacas , itemque *Martini Listeri* , qui insigni rerum Naturalium thesauro hoc museum ditavit. Visu dignissima etiam est Mumia illa integra Aegyptiaca ,
qua

qua *Dn. Aaron Goodyear* nuperrime Naturalia hujus Gazophylacii auxit .

Proxime , ut jam dixi , adjacet huic Museo *Theatrum* , quod nomen a *D. Sheldon* , Archi-Episcopo Cantuariensi , obtinuit . Accuratissimae architecturae exemplar ac solidissimum aedificium hic vides , in usum exercitiorum Academicorum , una cum typographia consummatissima , tempore Caroli II. Regis , extructum .

In perlustranda Bibliotheca et Collegiis Oxonii octiduum fere consumpsi , multo honore a *D. Hudson* maectatus , qui Literis ad *Dn. D. Sloane* Londinum concreditus , me dimisit , atque ita per eandem , qua Oxonium ivi viam , *Londinum* repetii , ibidemque tres adhuc hebdomadas commoratus , tandem reditum in Hollandiam meditatus sum . Ante autem , quam hunc auspicarer , saepius mutuo colloquio et conversatione Theologi cujusdam Evangelicae Religioni addicti , Angliae per triginta annos hospitis , cui per Amicos in patria commendatus fueram , frui licuit .

Ducebat me aliquando is ipse secum ad Mercatorem in civitate non procul a Monumento habitantem , ubi vasorum ex terra Chinenfi confectorum (*Porcelain*) incredibilem copiam et selectissimum vidi apparatus . In transitu visitavimus viduam ex Lithuania per Dantiscum nuper reducem , quae uxor quondam fuerat Viri cui nomen *Ramsloe* , ex Lithuania quidem oriundi , ast qui Londini diu antequam patriam repeteret , commoratus fuerat , Ludimoderatoris munere functus .

Hic *Ramsfœ* intimae admissionis apud *Dn. Boyle* quondam fuit propter Linguae Latinae peritiam, quam suos in usus convertit Illustris ille Vir, et huic, tandem amanuensi, pleraque operum suorum Physicorum ex Anglicana in Latinam vertenda concedidit. Tantum enim, uti notum, haud valebat in latinis Illustris ille Philosophus, ut proprio Marte Latine sermone sua proferre potuerit. Memoratus *Ramsfœ* autem, post *Boylei* obitum, vel patriae amore ductus, vel non inveniens amplius Londini unde viveret, cum hac uxore sua, natione Scota, in Lithuaniam transmigravit, et Cavenae, oppido ad Crononis, s. Nemeni littus sito, Rectoris munus in Ludo coetus Evangelici, in se suscepit. Post mortem ejus vidua nostalgia laborans, Londinum repetiit, supellectilem librariam et Manuscripta defuncti mariti secum advehens, quae Amicus iste et ego perlustravimus, licet tanti non essent, uti nobis quidem promiseramus. Inter ambulandum in via varios necebamur discursus: Affirmabat Amicus meus, verbum Personae S. S. Trinitatis nullibi in Script. S. inveniri, nec approbare volebat *Dn. Edzardi* Pastoris Ecclesiae Svecicae Londin. opinionem, qui in veteri Codice, pro Personae nomine, Faciem semper stare putat; nec concipere se animo posse assererat, quomodo λόγος aeternus, si secunda S. S. Trinitatis persona ab aeterno fuisset, in utero B. Virginis unam solum numero cum Humana Natura in Christo personam constituere potuerit: tunc autem bene Salvatorem nostrum Personam appellari, cum in statu illo, quo in hoc mundo com-

paruit , consideretur . *De statu animarum post mortem* assererat , illas in loco tertio πx Beatorum aut Damnatorum asseruari , fortassis etiam peccato Originis adhuc inquinatas , alias de Lazari anima non constaret , quomodo illa reverti in pristinum corpus potuerit : absurdum esse , allegari in contrariam sententiam dictum illud Apocalypseos S. Johann. *Beati mortui in Domino Morientes* . Hoc enim de felicitate Ecclesiae et fidelium certae cujusdam atque significatae a Divo Johanne periodi intelligendum esse . *De variis Lectionibus N. T.* ita statuebat , selectum esse servandum in his , et sua opinione parum laudis mereri illos , qui has accumularent atque augerent adhuc quotidie : quod ad versus integros attineret omisso , facile accidere potuisse , quod amanuenses supplementa ex aliis Manuscriptis fecerint , imo forte et adhucdum Manuscripta Novi Foederis inveniri , in quibus Evangelistae et Apostoli ipsi , curis secundis dicta quaedam annotassent , in aliis haud invenienda . Evangelium in omnibus mundi partibus et angulis publicatum esse , persuasus erat , quin et plerosque Paganorum sub aenigmatis suis et fabulis , verbi revelati vestigia habere certum esse putabat . De variis in Anglia sectis et Enthusiasmo differentibus , mentio incidebat *Quirini Kuhlmann* , Enthusiastae notissimi , qui ante annos aliquot in urbe Moscovia cum sodali suo igne punitus est . Hic jam Jacobi II. tempore in Anglia fuit , et sub Regni ejus auspicio ipsi integrum de Chiliasmo Tractatum tradidit . Paulo post in Hollandiam delatus , insignem ibi vexillorum nu-

numerum conficiendum curavit , quae Sacris Chiliastrarum expeditionibus quondam inservitura prodidit ; praeterea blasphemae admodum docuit , se certissimum esse de Uxore sua , quod novum Messiam in utero gerat . Et quod eo ipso Patris Regnum in terra , aequae ac Filii , brevi futurum sit . Quod hac occasione meminisse consultum duxi , quia plures in ea opinione fuisse mihi certo constat , ut putarent , *Kuhlmannum* summa iniustitia a Russis tam atroci poena affectum fuisse .

De Chronismis Anglorum , occasione Regicidii injiciebat etiam quaedam Amicus meus : Paucissimis notum , Anglos in publicis monumentis ac scriptis suis anni principium non primo January , sed ipso Festo Annunciationis Mariae ponere . Ita certum est , Regem Carolum d. 30 January 1648 securi fuisse percussum , licet in Angliae annalibus annus 1647 allegetur . Sciscitabar etiam de *Pensylvania* , an ipsi notum esset , quod Collegium ibi Adeptorum degeret ? quod negando refutabat : Se ipsum , inquit , curiosum semper fuisse in detegendo illo Collegio , nec unquam tamen per literas , neque per amicos ex *Pensylvania* reduces , quicquam certi de hoc tali comperire potuisse : Statum alias incolarum *Pensylvaniae* non adeo esse felicem , ac sibi persuaderent exteri : maximam eorum occupationem consistere in agricultura : multum enim terrae pro levi pretio assignari advenis , quod tamen non solum ipsi colere deberent , sed etiam contra irruptiones ac devastationes Barbarorum haud satis tutum haberent . Omnes illos , qui famosam hanc coloniam petiissent

sent suo tempore , maximam partem fuisse Fanaticos , Ardeliones , quibus patria vel ob laboris taedium , vel ab alias rationes exosa : nec ex aliis Europae partibus , figillatim Germania , defuisse ejusmodi curiosos , qui relatione aliorum decepti , Paradisum hunc adire flagraverint . Qualis intempestiva curiositas nuper saltem prudenti consilio *Domini Kirchneri Regis Polon. et Electoris Saxoniae in aula Reginae M. Britanniae Legati Residentis* , impedita fuit , contra quarundam ex Saxonia nostra oriundarum familiarum intentionem , quae transfretationem in Pensylvaniam cum universo suo peculio sibi proposuerant , et jam in eo erant , ut salvum conductum a Regina peterent . Optarem , ut occasione hujus relationis , qua *Dni Kirchneri* mentio facta , Illustri huic Viro , elogium publice ast apposite etiam tribuere possem . Sed extant atque extabunt ejus merita in seculum duratura : mihi sufficiat hic meminisse , tantum ipsi pro innumeris in me Londini commorantem beneficiis collatis me debere , quantum solvendo vix unquam futurus sim .

Ex Anglia jam , nummariis tesseriis literisque systaticis ante transfretationem a *Dn. Oliver* , Mercatore Londinensi , cui pro insigni , qua mihi adesse semper voluit , humanitate aeternum devinctus ero , instructus , primo Decembris die in *Hollandiam* redux , statim *Roterodamum* me contuli . Ibi ab insigni transfretationis taedio , quod per quatridduum fere , ventis atque impetuosis maris fluctibus cursui nostro adversum tenentibus , sustinere debebam , lassatus , per aliquot dies commoratus sum .

sum. Hinc Lugdunum perrexi , ubi literas Londini mihi concreditas Excellentissimo D. Albino tradidi. Jucundissima mihi Medici hujus consummati memoria. Dicit enim non potest , quam amice atque humaniter exceperit me plane ignotum. Monstravit mihi thesaurum suum ex Materia Medica et Naturalibus constantem , atque inter sermones mutuos commemoravit radicis *Gensing* , cujus vegetabilis exotici insignem possidebat copiam , et hanc quidem ex liberalitate Regis Borussiae , ad cujus jussu experimenta de viribus , diversa ratione ac modis instituit , quibus tamen omnibus nihil aliud elicuit , quam quod nuda earum manducatio exserit , easdem scilicet fere cum rapis passis nostris harum esse vires. Vidi apud eundem aliquot sic dictas *Viperas Melitenses petraefactas* , de quibus notum quod omnes capite careant. Scilicet quondam pro viperis petraefactis habebatur concretum hoc lapidosum : Et pie credebant superstitiosi quidam a D. Paulo olim omnes viperas Melitae insulae , in saxeam substantiam , demptis capitibus , ob damnum et morsum ipsi intentatum atque inflatum , pro vindictae perpetuo testimonio , transmutatas fuisse. Postquam autem *ingeniosissimus Scilla Italus* in tractatu suo , *La Vana speculatione disingannata dal senso* , inscripto , sicuti de aliis pluribus , ita et de his putatitiis Viperis vulgarem errorem monstravit , quod scilicet male pro petraefacta Vipera habeatur , quod certi Conchylii , Tubularia dicti , per succum quendam lapidescentem ita transmutati , potius genus sit , nemo amplius veterem illam

de Viperis Melitenfibus petraefactis capite ca-
rentibus fabulam defendere audet. Vid. *alleg.*
auctoris tractatus tab. 12. ubi fossile hoc Tu-
bulus marinus petraefactus appellatur. Ha-
bet etiam *duas digiti Humani articulationes*
petraefactas, in quibus omnes apophyses ac-
curate adhuc expressae cernuntur. De Dilu-
vio Universali eandem cum *Dno Woodward*
Anglo, opinionem fovet, eo nimirum to-
tam globi Terraquei superficiem fuisse dissip-
am, destructam ac discontinuatam, indeque
ortos montes, ante diluvium haud extan-
tes.

Aliquoties etiam visitavi *Dn. Muschenbroeck*
Celeberrimi nostri temporis Mechanici aedes
et officinam instructissimam, ejusdemque ap-
paratum instrumentorum ad Physica experi-
menta et Chirurgiam facientium sedulus per-
ustravi, quorum catalogum una cum pretio
hic inferere operae pretium duxi.

Catalogus Instrumentorum, quae apud Joann.
van Muschenbroeck veneunt Lugdun. Bat.
1707.

	<i>fl.</i>	<i>st.</i>
<i>Magna Antlia Pneumatica cum omni</i>		
<i>apparatu</i>	_____	_____
	600:	_____
<i>Parva</i>	_____	_____
	225:	_____
<i>Alia forma</i>	_____	_____
	187:	_____
<i>Fons Vitreus</i>	_____	_____
	7:	_____
<i>Ad experimentum pro Respiratione</i>	_____	_____
<i>Aeolipila</i>	_____	_____
	4:	_____
<i>Siphon anatomicus cum 8. tubulis et</i>		
<i>clave</i>	_____	_____
	18:	_____
<i>Siphunculus cum duobus flexilibus tubis</i>		
	7:	_____
		<i>Sex</i>

	fl.	fl.
<i>Sex Tubi ad Transfusionem Sanguinis</i>	2:—	
<i>Tubulus Cupreus ad inflanda vasa</i>	—: 15.	
<i>Tubulus Ferreus ad Mercur. injic.</i>	—: 1:—	
<i>Tubulus cum Valvula</i>	—: 4:—	
<i>Instrumentum ad os Canis claud.</i>	—: 4:—	
<i>Styli Cuprei variae magnitudinis</i>	—: 2	
<i>Instrumentum ad ossa perterebr: cum</i>		
<i>sex terebris</i>	—: 7: 10.	
<i>Microscopium Universale</i>	—: 18: 18.	
<i>Particulare</i>	—: 15: 15.	
<i>ad circulat. Sangu. vid.</i>	—: 7: 10.	
<i>Catheter flexilis argenteus</i>	—: 5: 15.	
<i>Catheter non flexilis argent.</i>	—: 6: 6.	
<i>Catheter Cupreus</i>	—: 1: 16.	
<i>Catheter pro Foeminis</i>	—: 1: 4.	
<i>Instrumentum pro Paracent. argent.</i>	—: 5:—	
<i>cupr.</i>	—: 2: 10.	
<i>Clyster ad sibi ipsi Glyisma injic.</i>	—: 10:—	
<i>Tabacalis</i>	—: 5:—	
<i>Subligacula pro Herniis retinendis</i>		
<i>pro Viris</i>	—: 9: 9.	
<i>pro Juvene</i>	—: 6: 6.	
<i>pro Infante</i>	—: 4:—	
<i>Plicabilia</i>	—: 12: 12.	
<i>Instrumentum ad Urinae incontinentiam</i>		
<i>praecavendam et sanandam</i>	—: 2:—	
<i>Vitrum ad Valvulas Plantarum</i>	—: 14:—	
<i>Omnis denique generis Instrumenta ad resti-</i>		
<i>tuendos male formatos Pedes , Dorsum ,</i>		
<i>Spinam , Collum.</i>		

Lugduno , visis Horto Medico et Muséo
 (quorum cum accuratus in manibus omnium
 sit catalogus , recensione eorum chartam in-
 ti-

tiliter onerare nolo) *Amsterdamum* contendi , ibidemque *D. Kustero* literas a *D. Hudson* Profess. Oxon. ad ipsum perscriptas , tradidi. Vir hic Clariss. Graecarum literarum ad stuporem doctus , qui *Svidae* editione inclaruit , jamque in aliis edendis Graecis Autoribus occupatus est , perquam humaniter me excepit. Laudabat Anglos eorumque in eruditos amorem atque existimationem plane singularem ; imprimis Cantabrigiensem Academiam multum celebrabat , ac dolebat , quod se ex illa quondam Berolinum avocari passus fuisset. Memorabat inter colloquendum , quod *Medicae* Arti me consecratum pernosceret , ligni cujusdam , quod igne admoto nec flammam concipere , nec in carbonem vel cineres redigi posset , sed , quod mirum , instar ferri saltem excandesceret : Hujus frustum nuperrime se hic *Amsterodami* apud Curiosum quendam virum mercatorem vidisse , admodum porosum externa facie , possessorem autem ejus asseruisse , esse lignum ex *Larice* in littore maris *Adriatici* crescente . Nullus dubito Lignum hoc incombustibile fuisse idem illud , cujus , post meum ex *Hollandia* abitum , *Clariss. Dn. Johann. le Clerc* dans la *Biblioth. Choisie* Tom. XII artic. 2 et Tom. XIII artic. 6 anno 1707 impress. meminit , ubi etiam possessorem nominat *Mons. de Baris. Nation. Batavae* in urbe *Sevilia* quondam *Consulem* : qui non ex *Italia* quidem , sed ex dicta urbe *Andalusiae* metropoli ligni frustum secum *Amsterdamum* apportavit ; de quo ipso autem laudatus *Dn. le Clerc* non sine ratione judicat , esse speciem illius ligni cujus *Vitruvius* L. II. c. 9. atque

ex hoc *Plinius Hist. Nat. L. XVI c. 10* itemque *Palladius L. XI c. 15* mentionem fecerunt , et pro ligno *Laricis*, circa ripam fluminis *Padi* et littora maris *Adriatici* nascentis , habuerunt. Notae et qualitates characteristicae hujus Ligni , quas l. c. recenset *Dn. le Clerc* , ita comparatae sunt , ut de lignosa substantia ejus dubitari nequeat. Propria ejus de his verba sunt sequentia : *C'est un bois , qui se coupe aisément , qui se rompt même , et qui se casse sans peine , sur tout lors qu'il a esté plusieurs fois rougi au feu. On peut s'en apercevoir en le machant. On voit en le coupant les fibres , comme dans les autres sortes des bois , et on ne peut nullement douter , que ce ne soit du veritable bois. Tom. XII p. 59. Ni en raclant le bois , ni en le coupant , on ne sent aucun sable , ni aucune dureté extraordinaire.*

Quod si ita se haec haberent , nullo modo confundendum hoc lignum cum fossili illo *Umbriae Provinciae* , quod *Franc. Stellatus* quondam in peculiari libro , cujus titulus : *Tractato del Legno Fossile e Minerale nuovamente scoperto etc. Romae 1637 in fol. inpresso cum figuris* , descripsit : nec cum alio , quod apud *Excell. Dn. D. Johan. Christoph. Gottwald Gedani* in selectissimo suo *Naturalium gazophylacio* nuperrime vidi , *Romae* quondam ab antiquario *Domino Ficaroni* ipsi procurato , et non minus sub ligni incombustibilis nomine oblato , utpote quod ad fossilia , propter lapideam suam duritiem potius est referendum , et cum ligno parum praeter externam faciem commune habet. Post haec uni-

nica mihi cura erat Anatomicos et Chirurgos hujus urbis convenire. Salutavi hoc nomine *Dn. Frider. Ruyschium*, *D. Joh. Jacob Raw*, *D. Guenelon*, *Dn. Pieter Adriaansen Patrem et Filium*, *Dn. Caturwe*, etc. Prae caeteris autem, ante quam *Dno D. Raw* innotui, *D. Ruyschium* invisi frequentius, et neutiquam horas illas neglexi, quas explicationi Anatomies ac demonstrationibus Gazophylacii sui Anatomici Curiosi, in gratiam aliquot Studioforum exterorum destinaverat. Incredibilis copia Praeparatorum Anatomicorum et stupendus ille Naturalium Thesaurus, quae possidet in aedibus suis vir hic celeberrimus, attentos facit curiosos spectatores, in quorum enumerationem velle descendere, in vastum pelagum esset sese committere, quo de fidem facere possunt *Specimina* illa, quorum *septem* tunc ediderat sub *Thesaurorum nomine*, ut *Observationes* taceam et *Epistolas* ejus *Anatomicas*, quae seorsim prodierunt. Non possum tamen quin memorem, quod inter ejus rarissima sit praecipuum, illa *Mumia pueri cujusdam octennis*, cujus corpus liquore et arte sua balsamandi, ut perhibet, tam nitidum post mortem conservavit, ut color juxta et consistentia cutis et musculorum visui et tactui naturales et quasi viventes se sistant: partes omnes et membra hujus Mumiae non indurata sunt nimis, sed molliuscula, quasi succo et sanguine adhuc turgerent ac vigerent, constituta. Admirandum hoc est artificium, quod in praeparatione Mumiae hujus praestitit Clariss. Vir, et plane inauditum, omnem fidem superans, nisi quis ipse viderit.

Ac licet diversimode de praeparatione hujus cadaveris judicetur ab ejus adversariis, nemo tamen est, qui analogum quid conficere aut demonstrare hucusque potuerit. Dixit saepius Dn. Raw, de prodigio hoc cum sententiam ejus expeteremus: malae fraudes sunt ac praestigiae cum puero isto; cuticulam detraxit misero, ita ut cutis cum musculis suis sanguine adhuc turgidis, naturalem quodammodo corporis colorem referant: alii de Vacuo autumabant, in quo corpusculum illud perpetuo, excepto demonstrationis tempore, conservaret. Sed omnes istae hariolationes exigui sunt ponderis: Monstra simile, et in sententiam tuam lubentissime descendam. Notum alias est de *Bilfio*, Anatomico exercitatissimo, praeter miraculosam illam corporum viventium incruentam sectionem, quam, *Meibomio* teste autopta, divina plane arte ac manu curiosis saepius demonstravit, a nullo alio postmodum unquam repetitam, etiam novisse artificium integra corpora conservandi cum sanguine, visceribus, intestinis et quicquid intus continetur sine ullo putredinis vel minimo periculo. Artem hanc postea *T. Andreae*, alius Anatomicus, a *Bilfio* sibi communicatam multis experimentis auxit ac praestantiorrem reddidit. Hic enim, praegressa hebdomadam aliquot balsamatione, cadavera aperuit, atque ita, intervallis subinde interjectis, anatomicum in iis administravit, ut semper, tanquam vix essent mortua, omnia quam recentissima in illis invenirentur. Summi certe suo tempore in Pollinctura artifices fuere hi duo Anatomici: ast ambos multis parasangis antecel-

le.

lere nostrum *Ruyschium* , persuasissimum habeo . Num vero Clariss. Vir aliquid de arcanis illis *Bilsi* atque *Andreae* balsamandi methodis expiscatus sit , easdemque tam mire auxerit , uti *Andreae* primum cum *Bilsi* inventis fecerat , meum non est hic ventilare . Quid de caetero in sectionibus ac demonstrationibus ejus Anatomicis viderim atque prae caeteris notatu dignum observaverim , paucis jam commemorabo .

Officula Auditus ex Foetu , ejusdem , quod mirum videri posset , in omnibus foetuum craniis cum officulis Adultorum magnitudinis sunt . Notandum etiam contra *Valsalvam* , noviss. de Aure Hum. Scriptorem , Officula Auditus gaudere periostio et vasis . Vasa quidem admittit *Valsalva* , periostium non aequè ; quod contra omnes Anatomes regulas . Egent enim vasa fulcimento semper , quo firmentur , cui scopo inservit semper in ossibus periostium .

Cavitas sub Sella Equina ossis Sphaenoidei in Craniis Adultorum , obducta est pellicula tenuissima . Observavit etiam *D^r Ruysch* in quibusdam subjectis , ex hac cavitate patere foramen in ossa spongiosa Narium , cum quibus etiam tunica illa , quae dictam cavitatem obducit , communicare videtur ; In recens natis cavitas haec sub sella Equina apparet nulla .

De *Antro Highmori* , Cavitate illa , quae in utroque osse maxillari sub sinu interne invenitur , notandum , saepissime falli Chirurgos Anatomes ignaros , qui , si laesio in his partibus vel violenta vel successiva , uti in Lue

venerea saepius accidit , fiat , pro cariei effectu , cum stylo tam profunde penetrare possunt , hanc ipsam cavitatem habent .

In *Cadaverculo recens nati* , cujus sectionem d. 27 Decembr. 1706 celebravimus , Funis Umbilicalis , uti notum , adhaerebat firmitus Vesicae Urinariae , mediante Uracho . Est autem Urachus nihil aliud quam oppositio Vesicae , ast sine perforatione et usu , quod apparet si immitatur in vesicam Urinariam flatus , a quo nullo modo turgescit Urachus nec extenditur ille ad funem Umbilicalem usque , sed circa Umbilicum desinit , et cum adjacentibus vasis , foetu in lucem edito , in ligamentum abit . Aliquando cutis circa Umbilicum in recens natis observatur nimis tenuis , elevata atque instar bullae transparens : quales infantes brevi post partum tempore certissime extingui observavit *Dn. Ruysch* frequentius .

Distinctionem sexus in Sceletis admodum difficilem esse , certissimum est , si quae tamen , quaerenda illa potissimum in rima illa sub synchondrosi ossis pubis , quae ab ossibus Ischii formatur ; haec enim laxior ut plurimum in foeminis . Quod si haec Rima in foeminis respective sit angustior , partus inde difficillimus metuendus , ex quo nunquam fere emergunt : nam speculum sic dictum Uterinum , nec hic , nec in aliis casibus ullius est pretii . De caetero , ratione distinctionis sexus in sceletis , nec rejicienda penitus est differentia illa in costis apparens , quae in foeminis latiores , in maribus magis teretes , Pelvis etiam ambitus in foeminis longe amplior .

Collum vel cervicem ossis femoris a violentia
ex-

externa frangi , frequentius accidit , quam a plerisque creditur . Ossea enim vel vitrea , ut a quibusdam appellatur , lamella in hac parte tenuissima est . Et quamvis communis sit opinio , ubi patientes de dolore et motu abolito in his partibus conqueruntur , exarticulationem vel luxationem ossis Ischii accidisse , falsa tamen , imo propter incredibilem ligamentorum ac tendinum circumjacentium crassitiam ac robur impossibile , hanc articulationem tali modo luxari . Talem fracturam his meis oculis vidi ac manibus palpavi in cadavere foeminae Nosocomii Muliebris Amstelod. sociae (*in 't Besjes Huys*) in qua tractu temporis fractura illa cervicis ossis femoris dextri , per callum quidem coaluerat iterum , foemina tamen exinde per omnem aetatem ad mortem usque clauda . Callus pollicis latitudine sub ipso capite magno ossis femoris extabat , nulla autem in ligamentis ac tendinibus musculorum laesio vel praeternaturalis constitutio : omnia sic satis firmiter cohaerebant , et locus laesionis praegressae tam bene callo erat obductus ac ferruminatus , ut , violenter licet tractatus , rumpi nequiret . Non negandum tamen , tendines musculorum in ejusmodi fracturis , licet iterum coalescant , pati ac debilitari in tantum , ut movendo debito ac sufficienti modo pedi vix postea sufficiant , ut de nervis nihil dicam hic occurrentibus , majoribus illis ex osse Sacro prodeuntibus , et dictis tendinum ac ligamentorum partibus varie implicatis . De caetero de Fracturis ossium in genere observavit *Dn. Ruysch* dari homines , qui vel ex constitutione corporis scorbutica vel vitio con-

nato , succo illo gelatinoso ad ferruminationem ossium necessario , plane carent : atque in his talibus fracta ossa nunquam coalescere rite possunt . Vidit alios , in quibus pars spongiosa saltem ossium , vel meditullium concreverit , lamina vero ossis externa dura illa non aequae : hi , data levissima occasione , fracturas iterum patiuntur : pro utroque horum sufficere putat applicationem laminae ferreae , pro continendo membro adaptatae .

Paracentesis Thoracis in Empyemate rarissime cum successu exoptato instituitur , quia materia purulenta communiter in sacco celluloso inter musculos intercostales et pleuram haeret . Satius esse putat Ruyschius scalpelli loco cauterium potentiale adhibere , intra quartam et tertiam costam veram , ab inferioribus numerandi principio facto , applicandum . Tale cauterium optimum ex calce viva et lixivio Saponariorum , ad consistentiam fere lapideam coctis , paratur .

De Trepanatione monebat , se semper viginti quatuor horas fomentationibus cephalicis partem laesam tractare , si interea non remittant symptomata , tunc demum ad Trepanationem transire , operationem maxime ambiguum atque operosissimam .

Die decimo tertio Januarii suppeditabatur ex Nosocomio publico *Cadaver foeminae instanti partu mortuae* , et hoc quidem pro informandis Obstetricibus , quibus ejusmodi occasiones institutionis in arte Obstetricandi , Magistratu sic jubente , saepius exhibentur . Antequam autem *Dn. Ruysch* , cui incumbit hoc munus , Obstetricibus demonstrationem daret ,

nobis prius inter praeparandum rariora talis subjecti phaenomena Anatomica demonstravit. Ita autem situs est in Gravidis Uterus , ut Intestina Ileum et Jejunum versus superiora , hep-
 par , ventriculum et diaphragma puta , protrudat , unde respiratio in gravidis plerumque difficilior. Uterus per Crucem dissectus , ejusdem apparet crassitie , ac fuit ante imprae-
 gnationem , quamvis admittat insignem illam extensionem sphaericam , quod incredibile vi-
 deri posset illis , qui non considerant ingentem illam tunicae Uteri mediae vel vasculosae in-
 tumescientiam , quae successive cum foetu accrescit indies. Tunicae autem utero pro-
 priae tres sunt numero : Exterior glabra , me-
 dia spongiosa et vasculosa vasis sanguiferis scatens , et interior quasi papillosa , cui ad-
 haeret , licet non adeo firmiter , Placenta U-
 terina , et haec ipsa continua est cum membra-
 nis foetum involventibus , in specie Chorion . Membranae illae duae Chorion et Amnion
 primo intuitu unicam numero membranam constituere videntur , quae tamen facili nego-
 tio digitis separari possunt ab invicem . In hoc subjecto foetus jam ad exitum se praepa-
 raverat , unde orificium Uteri internum per dilatationem quandam attenuatum observaba-
 tur , capacitas autem hujus orificii binos digi-
 tos jam admittebat facile . De Placenta Ute-
 rina in specie observavi , hanc non adeo gru-
 mosam et divisam esse , ac videtur post ex-
 tractionem in partu naturali , ubi manibus jam tractata ab Obstetricibus fuit . Obducta est
 peculiari membrana , quam *Ruyschius* Succo-
 sam vocat , cum Chorion membrana continua-

ta atque Uteri substantiae inosculata. In Vagina hujus Gravidae observavimus circa orificium Urethrae numero plures hiantes poros, quibus falli interdum solent imperiti Chirurghi, in exploratione Calculi, ex his quendam pro urethra ipsa habentes: quem errorem tamen illi facile evitant, qui ex Anatome norunt, latum pollicem sub Clitoride in linea recta situm esse Urethrae orificium. De poris autem illis sciendum, esse hos ipsos glandularum hiantia orificia, quae tempore Veneri concubitus apud plerasque, imprimis lasciviores, insignem eructare solent liquoris gelatinosi copiam. Singulare est, quod observavit de Tubis Fallopiianis Cl. Ruyschius, sc. in illis foeminis, quae proxime conceperunt, Tubam illam, per quam transit ovulum, inflammatum quasi apparere, quod in osculo Tubae in Uteri cavitatem hiantē observatur.

Quamdiu foetus in repagulis Uteri est inclusus, difficillimum de vita et morte ejus judicium, quod tamen vel maxime requiritur eo tempore, ubi de salvanda per Embryulciam matre quaestio oritur. Neque ullum signum, de foetu intra uterum mortuo adeo certum, quam illud, quod de fune Umbilicali desumitur: hic si flaccidus, nec amplius pulset, ad operationem te salva conscientia accingere poteris. Signum foetus mortui ex pulmonibus desumptum admodum lubricum statuit Dn. Ruysch. Quod si enim cadaverculum a longo tempore jam extinctum, et aëri liberiori expositum fuerit, pulmonum structuram adeo posse everti per supervenientem fermentationem,

nem , ut supernatent aquae , licet in utero matris extinctus fuerit foetus , certissimum est . Quod si etiam accadat , ut in ipso exitu in Vagina expiret foetus , nullum tamen adhuc dum aërem recepisse pulmones persuasus est.

Antequam a relatione sectionis foeminae illius in partu extinctae et discursu Ruyschiano occasione hujus anatomes formato discedam , facere non possum , quin hic loci inferam cogitata , quae de Abortu vi et pharmacis causato , mihi , dum relegi , enata sunt . Notissimum , quanta et quam multiplices inventae sint ab infelicibus prostibulis et lenis technae , pro extinguendo , antequam in lucem prodeat et amissae pudicitiae et virginitatis proditorem agat , infante embryone . Tantus enim bonae famae et existimationis amor et pretium , ut conscientia et religio negligentur lubentissime a plerisque , si modo illas fartas tectas utcunque conservare valeant foeminae , quae clandestino modo Veneris festis interfuerunt , ac delicias hujus furtim degustarunt . Quantum hominum numerus ejusmodi artificiis in fieri pereat , vel inde constare potest , quod dentur nonnulli inter Pontificios , qui Limbum Infantum , quo asservari creduntur ad Extremum Judicium usque cum reliquis non baptizatis infantibus Abortus etiam , ipsum Purgatorium spatio suo exaequare asserunt : alii plusquam tertiam hominum viventium partem superari numero ab Abortivis infantibus credunt . Habent enim infames illae pharmaca et pocula sua abortiva sic satis fida , quibus intentioni suae cum successu satisfaciunt ,
quae

quae tamen ut plurimum statim post imprae-
gnationem , vel ante tertium ad minimum et
quartum gestationis in utero mensem adhibe-
ri debent : quod si vero vel ex simplicitate vel
ex imprudenti negligentia termino isto et tem-
pore exclusa quae fuerit , neque tunc etiam
technae et machinae deficiunt , quibus ab in-
commodo et vivente scortationis testimonio se
liberare valent. Tunc enim misero foetui pa-
rata sunt alia arma , tam ferocia , ut ad ex-
tinguendos infensissimos in bello hostes suffi-
cerent . Obstupesco . quoties in memoriam
revoco , quae in *scriptore Gallo libri cujusdam*
Amatorii et deinde etiam apud *Guidon. Pati-*
num Philosophum et Medicum incomparabi-
lem in Literis suis Gallico idiomate scriptis ,
de hac ipsa re legisse recorder : *Epistola est*
CXCI et seqq. Tomi I ad Dn. Falconet anno
1660 die 27 July et seqq. scripta , Edit. Pari-
sinae 1692. ubi meminit obstetricis , eo tem-
pore suspendio publice punitae , quae , perfora-
to foeminae cujusdam gravidae per idoneum
instrumentum utero , foetum enecavit , abor-
tum procuratura , ast successu tam infelici ,
ut correpta convulsionibus mater miserrime
expiraverit . Nequissima obstetrix , in confes-
sione coram Criminali Judicio , pluribus foe-
minis hoc modo interdum satis feliciter abor-
tum effecisse passa est . *Dn. Patinus* autem ,
ut sedulus Historiae tam Sacrae quam Profa-
nae Lector , ex *Tertulliano* allegat locum ,
quo jugulandi in utero foetum , eundem hunc
modum , jam ante plura secula notum fuisse ,
probat : legitur locus iste in *libro de Anima*
cap. 25 edit. Rigaltii ann. 1641 p. 328 his fere

verbis : *Est etiam aeneum spiculum , quo jugulatio ipsa dirigitur cœco latrocinio :*
Ἐμβρυοφάκτιν appellant , utique viventis
 infantis peremptorium . Fallor , an historia ex
 his autoribus allegata , et *Tertulliani* locus ipse ,
 optime explicant illam *Ovidii Elegiam* ,
quae in Amorum L. II. decima quarta est et
sequentia habet :

*Quid juvat immunes belli cessare puellas ,
 Nec fera peltatas agmina velle sequi ;
 Si sine Marte suis patiuntur vulnera telis ,
 Et caecas armant in sua fata manus ?
 Quae prima instituit teneros convellere foetus ,
 Militia fuerat digna perire sua .
 Scilicet , ut careat , rugarum crimine venter ,
 Sternetur pugnae tristis arena tuae .*

Et paulo post :

*Vestra quid effoditis subjectis viscera telis :
 Et nondum natis dira venena datis .*

Item :

*Dicite quis Tereus , quis Vos irritet Iäson
 Figere sollicita corpora vestra manu ?
 Hoc neque in Armeniis tigres fecere latebris :
 Perdere nec foetus ausa Leaena suos .
 At tenerae faciunt , sed non impune puellae :
 Saepe suos utero quae necat , ipsa perit .
 Etc.*

De veritate facti igitur ; quod scilicet *Pati-*
ni tempore in Galliis , atque *Ovidii* ac *Ter-*
tul-

tulliani testimonio Romae , abortum violentum sibi , perforato per stylum ferreum utero , concitaverint desperabundae , nullum restat dubium ; Hoc autem concipere fatis commode nequeo , qua ratione vulnerari tam crudeliter uterus , maxime sensibile viscus , queat , salva et superstita matre. Salvam autem vel aliquando ex truculento hoc puerperio emerfisse ac restitisse matrem , ex reiterato saepius tam antiquis quam his nostris temporibus nefando hoc facinore colligendum est. Nisi enim aliquando et vel semel saltem successisset negotium , nulla vel perditissima foeminarum id ipsum imitata fuisset unquam. Stylus ille letifer adigi necessario debet per vaginam in ipsum uteri orificium ; hoc autem quam sensibile , quam nervosum , durum , et extra partum quasi cartilagineum sit , ex inspectione oculari constat. Quantae inde convulsiones , quam dira inflammatio et alia symptomata non metuenda ? Certe plusquam giganteas vires pro superandis ejusmodi doloribus ac periculis habuerit necesse est , si quae unquam infernale hoc obstetricandi artificium revera superavit. Obiter noto , annon credendum , quod Εμβρυοσφάνη *Tertulliani* magnam cognationem habuerit cum Οἶονχι *Hippocratis* , qui *Libro de Superfoet. text. 5.* hunc describit , ut instrumentum ferreum acutum , quod magno digito affixum , ad ventrem infantis diffindendum et intestina eximenda adhibuerunt in *Embryulcia Veteres*.

Alia occasione demonstrationem et discursum formavit *Dn. Ruysch de Venae Sectione.*
No-

Notum quidem subjectum Venae sectionis communissimum in Brachio esse Venam Cephalicam, Basilicam et Medianam: Vena Cephalica sita est in latere externo Brachii, sicut Basilica in interno. Ubi autem hae duae Venae per ramorum suorum anastomosis concurrunt, quod fit infra Cubiti flexuram, Mediana inde emergit; Quae non adeo frequenter secatur, uti imperitum vulgus putat, interdum enim sub musculis fere occultatur. Inciditur autem communissime Cephalica vel ejus ramus in Cubiti flexura, vel supra illam; Basilica enim vel Hepatica, uti a quibusdam appellatur, periculosius secatur propter proxime adjacentes et subjacentes nervos, in specie autem aponevrosin illam, quae a subjacente parte tendinosa musculi Bicipitis formatur, et laesa, gravia producit symptomata.

Inter demonstrationem partium Urinae secretioni inservientium et in specie Vesicae, rarissimam observationem *de descensu Vesicae in Scrotum* proposuit, sancteque testatus est, bis in Praxi sua ejusmodi portentum seipsum observasse; Solere autem tunc Vesicam descendere in scrotum per eandem viam, qua intestina solent in herniis: Certissimumque hujus affectus signum esse, si quis non nisi compresso superiora versus scroto, mingere potest.

Haec sunt, quae ex *Clariss. Ruyschii* ore, praelectionibus ac demonstrationibus haurire atque annotare integrum fuit. Jam de altero nostro Praeceptore Domino *D. Joh. Jacob Raw*, Insigni Hollandiae Decore, Anatomico et Chirurgo Incomparabili, judicio atque

experientia in secando ipsius *Vesalii* dexteritatem ac diligentiam fere superante, quaedam in medium proferre liceat. Hujus Viri Excellentissimi institutione in Anatomicis et Chirurgicis per quinque fere menses utebar. Quaecunque igitur hic communicavero, Consummati Anatomici sunt observata, et quidem illa saltem, quae mihi potissimum ex doctrina ejus notabiliora visa sunt. Innumera alia habet Clariss. Vir, in specie quod fraudes, praestigias atque errores Pseudo-Anatomicorum attinet, quae si publico patefacere vellet, admirationem omnium in se tracturus esset, de salute tot myriadum hominum atque Artis nostrae incremento optime meriturus. Quod si has meas qualescunque lucubrationes et spicilegia Anatomica ad ipsos Magni illius Anatomici oculos pervenire contingeret, nolit eo nomine mihi succensere, quod singulares quosdam ejus conceptus in lucem proferre non erubuerim. Sancte enim testor, publici amore hoc factum esse: Ut Anatomes studiosi videant quaedam saltem vestigia doctrinae Anatomicae verae, naturalis, non fucatae, et cavere sibi discant ab Anatomicis illis, qui famam habent et non merentur, qui miseris ac male fundatis tyronibus imponunt, laureolam in mustaceo inventis suis novis atque inauditis, uti crepant, praestigiis et glaucomatis quaerentes.

Suam facit Excellentiss. *Dn. Raw* de vera articulationis maxillae inferioris cum superiori sede in sceletis inventionem. Perpetuus enim est in omnibus fere sceletis et delineatis et naturalibus error, maxillam inferiorem articula-

tam

tam videre eo in loco , ubi cavitas clinoidea ossis petrosi occurrit , quae tamen semper fere , et maximam partem in homine vivente pinguedine repleta est , et spatium quidem concedit apophyibus condyloideis , sed in motu saltem , ut sc. sine impedimento moveri retrorsum ipsa maxilla inferior possit : Verus autem articulationis locus est juxta processum Zygomaticum , in eminentia transversali , cui interveniente cartilagine in cadaveribus articulatam clare cernimus dictam inferiorem maxillam . Quod si casu ab alto , plaga aut alio modo maxilla inferior exarticuletur , tunc fieri potest , ut totus fere processus condyloides in clinoideam cavitatem secedat : at hoc in statu praeternaturali accidit , et tunc homo in masticationis opere impeditur , nisi dextra Chirurgi manu , elongando aliquantum dictum Maxillae Os , in sedem pristinam reducat : .

De *osse Maxillari* proprie sic dicto Maxillae Superioris notum est , hoc totum fere exsinuatum esse , et parvum angustumque habere orificium in Narinas hians : *De usu hujus Sinus* non minus ac Sinuum Frontalium et Sphaenoidalium statuit , praecipue quidem hos facere ad sonum in voce formandum , secundo vero inservire mucosum Narium indefinenter restituendo ; Sunt enim revera nihil aliud quam muci Narium receptacula allegati sinus , ita ut omni tempore mucus abundanter adsit , qui undique ex his effluens , in quemcunque sensum caput positum fuerit , membranam Pituitariam , cellulas ossium spongiosorum investientem abundanter inundet , ne ab inspira-

to et expirato aëre exsiccata ad olfactum inepta fiat , sed a continuo hujus humoris affluxu flexilis servata , commode impressiones partium odoratarum per aërem ad illam deductarum recipere ac debito modo nervos afficere possit. Hinc etiam videtur tanta membranae Pituitariae in exiguo spatio expansio : nam omnes praedictos sinus et cellulas ossium spongiosas investit , ut in ampliori superficie Odorantium particulae per aërem advectae illam tangere possint. Et haec est ratio , quod odores objectorum per aliquod tempus nobis maneant , objectis jam remotis , quando nimirum quaedam odorum particulae in interstitiis cellularum oberrant. Hinc animalium , quae has cellulas ampliores habent , odoratus praestantior existit , uti in Canibus evidens.

Ossa Narium Spongiosa inferiora , quae a Recentioribus Maxillarium apophyses esse dicuntur , *Dn. Raw* singulare Maxillae Superioris ossium par constituit. Nares enim et processus Ethmoidei ossis ab his perita manu in adultioribus subjectis separari possunt , et tam facile etiam separantur et cadunt sua sponte , ut in plerisque Craniis , ex coemeterio vel calvariae loco desumptis , deficient.

De Foraminibus pro transmissione Nervorum in Cranio occurrentibus , magnum inter Anatomicos invenies dissensum . Optima videtur mihi Paeceptoris mei methodus , qui in Osteologia sua Cranii foramina , non uti alii faciunt , cuivis ossi peculiariter enumerat , sed post descriptionem omnium Capitis ossium , ita procedit , ut eadem , ossibus in naturali sua compage relictis , recenseat. Formantur enim
fo-

foramina haec aliquando ex pluribus uno offibus , unde inepte ab aliis in singulari offium Cranii recensione divisim recensentur. *Decem numerat foramina Cranii interna :*

Incipiendo ab illis , quae pro *Olfactoriis nervis* formata sunt :

Per *Foramen secundum* transit par *Opticum :*

Tertium Foramen inaequale quatuor infervit Nervorum paribus nimirum :

*Oculorum Motorio ,
Oculorum Pathetico ,
Primoramo Opthalmico Quinti Paris ,
et*

Pari Nervorum sexto in musculum *Oculorum* abducentem derivato , quod *Timidum* alias appellatur :

Foramen quartum transmittit secundum ramum *Quinti paris* ad maxillam superiorem excurrentem :

Quintum pro tertio ramo *Quinti paris* , qui inferiori maxillae infervit :

Per *Foramen Sextum* egreditur ramus *Arteriae a Carotide externa* oriundus :

Septimum Foramen admittit *Carotidem internam :*

Per *Foramen Octavum* egreditur par Nervorum *septimum Auditorium* dictum :

Nonum formatum est pro receptione *paris Nervorum Octavi* , quod *Vagum* appellatur :

Decimum denique , quod saepius duplex , *pari Nono* , quod *Linguale* appellatur , infervit :

His accedit *foramen* in Cranio omnium *maximum*, per quod *Medulla oblongata*, *decimum* etiam quandoque *par*, *Arteriae Vertebrales* et *Nervi spinales Willisii* exeunt. Vides qualem *Dn. Raw* Nervorum distributionem faciat. Numerat paria Nervorum quidem cum Willisio, ast non decem sed novem saltem, siquidem ultimum par decimum Willisii ad Cervicales potius spectare videtur, adeoque primum rectius Cervicalium Nervorum par, quod inter primam et secundam colli vertebrae exire observatur, dicendum.

De Undecimo Nervorum Cerebri pari, quod *D. Bidloo* reliquis Cerebri nervis accenset, et summa in Galenum injuria sibi et ipsi ejusdem inventionem vindicat, ita judicat *Dn. Raw*: Verum quidem, quod egrediatur ex Cranii ossibus dictus Nervus, si quidem notissimum, illum cum pari Octavo per unum idemque foramen egredi ac tandem, relicto dicto pari, in musculum Trapezium impendi: Ast quia hic ipse Nervus non ex Cerebri substantia, quatenus in Cranii ossibus continetur, ejicitur, sed ex medulla spinali inter secundam et tertiam vertebrae nascitur, absurde a *Bidloo* ad Cranii nervos refertur, rectius antiquissimo Galeni nomine *Nervus ad latus Medullae oblongatae locatus* appellatur. Haec de Capite.

Ex Artubus paucis allegabo, quae de Carpo ejusdemque debita compositione in Sceletto *Dn. Raw* nobiscum communicavit. Notissimum, hujus articulationem et compositionem adeo esse difficilem, ut in Sceletto, qui osteo-

logiam probe intelligunt Anatomici , hanc partem statim observent , quae si debito ordine ac modo composita sit , dexteritatem atque in Anatomicis solidam scientiam artificis multo certius patefacit , quam vel albedo officium , vel aliae minutiae , ab imperitis aestimata . Hanc igitur Carpi compositionem sequenti modo nobis monstravit : Carpus seu Antibrachiale octo habet ossa , quorum figuram , ob irregularitatem describere non possumus : duplicem autem constituunt articulum , unum cum Radio et Ulna , alterum inter se . Quod sic fit : quartum officulum primi ordinis nihil fere facit ad articulum , sed superius tantum adhaeret officulo interiori horum trium officulorum primi ordinis et recipit tendinem musculi Carpi flexoris interni : tria haec officula superiora vel primi ordinis per strictam diarthrosin juncta superius capitulum constituunt , quod Radio pro maxima parte et Ulnae articulatur , inferius cavitatem efficiunt , quae excipit capitulum formatum ex duobus officulis secundi ordinis . Ita ut videas duplicem esse ordinem horum officulorum , nam primus ordo quatuor habet officula , secundus totidem . Et duplicem esse articulum amphiarthrodialem , unum cum Radio et Ulna , alterum cum tribus officulis primi ordinis . Praeterea ita dispositus est ordo horum officulorum inferius , ut cavitatem relinquat profundam pro commodo transitu tendinum flexorum digitorum , nervorum et arteriarum , quae ad manum spectant internam

Majoris curiositatis aequae ac utilitatis sunt , quae de *Dentium generatione* observavit pri-

mus *Celeberr. Raw.* Edidit quidem *Theod. Kerckringius* olim *Osteogeniam Foetuum* rara diligentia atque accurato iudicio conscriptam, ast, quod mirum, de Dentibus eorumque generatione nihil fere ibi reperies. Singulari perspicuitate et cura hanc rem nobis proposuit Anatomicus noster, sequentem in modum: Mirandum, omnium Dentium semina in alveolis Maxillarum adhuc imperfectis haerere, gingivis obiecta in foetu, et tot quidem semina, quot unquam in homine per omnem aetatem prorumpunt Dentes. Possunt haec semina in foetu recens nato, ablatis gingivis, ad oculum demonstrari. Continet autem unusquisque foetus, qui completum aliquando Dentium numerum habiturus est, quinquaginta duo Dentium semina. Praeter triginta duo enim, quos Homo perfectus habet Dentes, viginti numero in duplo inveniuntur in foetu Dentium vestigia. Natura enim sic constitutum est, ut octo incisores, quatuor Canini et Octo Molares circa 5. 6. 7. vel totum aetatis annum cadant, restituendi iterum per haecenus latentes sub prioribus Lactariis, et postea succedentes Dentes. Cadere autem necesse habent priores, quatenus illorum substantia durior longe et compactior est, quam Maxillarum substantia. Hinc cum Dentes illi tam cito explicari nequeant ac Maxillarum alveoli, evenit, ut praeseptiola vel alveoli valde amplificati tenuem nondum accretum Dentem amplius non amplectantur, sed cadere sinant. Praeterea juvant hunc Dentium casum memorati jam iuniores, adhuc molles secundarii Dentes in pri-

privatis suis alveolis asservati. Nam qui in locum veniunt Incisorum, a Latere posteriori siti sunt, qui in locum Caninorum, a latere anteriori et inferiori, qui in locum Molarium, inter tres Molarium radices. Sciendum enim, hos Molares in infantibus tres habere radices, caeteros Molares, qui non cadunt, quatuor. Haec de situ Dentium Succedaneorum doctrina animadversionem meretur, et observari debet exacte ab illis, qui Dentibus extrahendis operam dare solent. Ubi enim duplex Dentium series adest in pueris, quod non raro accidit, ex Incisoribus anterior, e Caninis non nisi posterior extrahendus est. Hi Dentes igitur succedanei in hac aetate molliores se explicant in privatis suis alveolis, et alveolos suos versus primorum alveolos protrudunt, et sic illos ad casum sollicitant. His vero expulsis, suis alveolis primorum alveolos occludunt, posteriorem lamellam versus anteriora comprimendo. Et sic postea illi adhuc molles Dentes, cum hac aetate jam rigidior facta maxilla, aequaliter accrescere atque adaugeri possunt, ut apta mancant praeseptiola ad illorum radices retinendas. Nam arcte alveoli radices Dentium ambiunt et reticulosa vasorum membrana in alveolis ligant atque extus gingivae illis adnatae idem faciunt.

De caetero notabile etiam, quod *Dentium structuram in genere* attinet, cavitatem eorum interius, non minus ac radicem exterius investire membranam, quam comparare possumus cum perioestio interno atque externo ossium. Et hanc membranam demonstravit nobis *Dn. Raw* in Dente Incisore per longitudi-

nem dissecto, vasis ejusdem cera miniacea repletis : quae vasorum repletio etiam fieri potest sine cera, ab ipso sanguine, si Cani e. g. ligentur venae jugulares.

In Myologia singularis est et notatu dignissima *Dn. Raw* observatio de Colli, Dorſi et Lumborum musculis Extensoribus. Cum enim plerique Anatomicorum Extensores Colli duos nominent, Transversalem et Spinatum, Dorſi et Lumborum tres utrinque, diversis nominibus Sacrum vel Sacro-lumbarem, Longissimum Dorſi et Semispinosum appellantes, constituent, *Dn. Raw* unicum saltem musculorum par, quod Collum, Dorſum et Lumbos, quantum articulatio admittit, extendit, habet. Hoc oritur partim tendinoso, partim carnosio principio a parte posteriori et superiori ossis Sacri, et collocatum intra cavitatem, quae ab apophysibus spinosis omnium vertebrarum, et a parte posteriori costarum efformatur, ejicit innumeros tendines, qui apophysibus spinalibus ac transversis decussatim quasi implantantur.

Omnes Tendines Musculorum digitorum Pedis et Manus habent Vaginam ex propria sua substantia efformatam : In vaginis illis semper liquor ; qui natura idem est cum liquore in articulationibus reperiundo, colligitur.

De Musculo communi Femoris et Tibiae, Fascia Lata vel Membranoso, quem plerique pro abducente musculo habent, ex accuratiori sectione apparet, saltem musculus Vaginallem hunc etie, reliquos sibi subjectos musculos firmiter colligantem. Proprie etiam non movet Os, quia ipsi parum vel nihil inseritur.

Pha

Pharyngis Musculi, quorum a nimum curiosis quinque paria numerantur, tres saltem sunt, accurate loquendo: duo Sc. Stylo-pharyngaei, qui Oesophagum dilatant, et unus, qui Sphincter Oesophagi dici meretur, eumque constringit. Ex hoc Sphinctere a sciolis duo formantur musculorum paria, Pterygo-pharyngaeus et Thyro-pharyngaeus.

In Humeri Musculis Rotundus minor et Infra-Spinatus, unum numero faciunt musciculum.

De Cubiti Musculis notandum, Longum Brevem et Brachialem externum, unicum saltem constituere musciculum, qui triplex quidem habet caput, unicum autem punctum mobile.

Anconaeus nihil aliud est, quam protensio reliquorum Extensorum Cubiti.

Clitoridis musculorum mentionem apud nonnullos invenies Autores, descriptionem autem valde obscuram. Accuratiores eorundem Anatome, quam in cadavere puellae septendecim annorum nobis dedit, haec est: Clitoridis musculi duo sunt, ab utroque latere unus, adhaerescunt ossi pubis inferius ad latus internum, et horum concurrentes extremitates ab utroque latere cum suis fibris involutis duobus corporibus nervosis, Clitoridem ipsam constituunt, quae nihil aliud est, quam duorum horum musculorum finis cum fine duorum corpusculorum nervosorum cuticula nymphis continua obiecta, multis papillis conspicua aequae ac nymphae. Horum musculorum usus est, corporum nervosorum venas contrahere et sanguinis regressum impedire, unde ab

affluxu sanguinis arteriosi corpuscula nervosa tumentia , Clitoridem erigunt , membranam eam obcingentem valde tendunt , unde papillae nerveae pendulae rigidae magis factae , minimas etiam titillationes accuratius persentiscunt , et Veneris illecebras augent . Salaciores foemellae hujus contrectatione ac titillatione lasciva liquoris illius , quem sperma communiter vocant , effusionem sibimetipsis proritare solent .

Haec de Clitoride , qua occasione et propter materiae cognationem nonnulla in discursu allegabat *de genuinis Virginitatis notis* . Et prout notum abunde est , elucescet , Hymenem in adultis inventu esse rarissimum , ob nimiam sexus sequioris curiositatem et intempestivam lasciviam , ita paradoxum etiam videbitur , non parum difficultatis occurrere *in vera diagnosi foeminae jam puerperiam vel abortum adultiorem passae , ab illa , quae nunquam peperit* . Plicas quidem vel rugas contrahunt in abdominis integumentis foeminarum pleraeque , obefiores praesertim et phlegmaticae , post primum saltem et unicum etiam puerperium , quibus praesentibus , etsi in pudendis partibus reliqua Virginitatis signa adeo accurate perquirere non liceret , justam de antecesso puerperio suspicionem apud imperitum vulgus vix effugerent : Ast , ut taceam varia illa astutiorum muliercularum machinamenta , quibus et nominatim stricturis illis abdominis fortioribus per certa vestimenta post partum statim instituendis , rugarum proveniunt evitare et ventrem sic satis nitidum , globosum ac laevem conservare satagunt , aliae etiam

etiam prostant rationes et causae , quae a plicatili et rugoso ventre ad laesam per concubitum et puerperium virginitatem argumentari non permittunt . Quid si enim mente et corpore illibata post superatum Ascitem , Hydropem Uteri , vel alium similem affectum , rugosum ejusmodi integumentorum ventris habitum contraheret ? Annon summa injuria misera talis , sine ulteriori inquisitione , pro vitiato scorto haberetur ? Sin igitur rugosus venter non sufficit ad probandum praegressum puerperium , nec etiam sic satis laevis et strictus pro asserendo contrario : alia omnino et certiora adesse debent phaenomena , quae nobis pro dignoscenda illibata luculentiorum accendant facem . Haec quaerenda partim in externis , partim in internis Muliebrium partibus . Et in externis quidem *Fissura Magna* est , a Graecis Anatomicis *Σχίσμα μέγα* appellata , ex cujus inspectione de praegresso puerperio certissimum indicium haberi potest . Hujus enim parietes , qui ab Anatomicis Labia vocantur , illa parte , qua anum prospiciunt , in nondum puerperium passis arctius cohaerent et tensi sunt , ita ut eo ipso spatium illud , quod Perinaeum vocatur , latius et largius , fissura autem ipsa versus anum praecipue , angustior et arctior reddatur . Haec freni labiorum tensio in puerperio per foetus transitum insigniter laxatur , ipsaque fissura hac ratione anum versus non parum dilatatur , nec unquam post puerperium , ad pristinam tensionem redit ; quam freni labiorum dilatationem Gallorum Obstetrices vernacula sua *le déchirement de la Fourchette* appellare satis apposite solent ,

Quoad

Quoad internas , explorandae ipsius *orificii vaginae corrugationes* , a nonnullis Carunculae myrtiformes appellatae , quae a plerisque ab Hymene post deflorationem concidente formari , et superstites remanere creduntur . Hae dictum vaginae orificium arctius reddunt con- nata sua rugosa , tuberosa et inaequali in- tumescentia , ita , ut in tam corrupto rerum nostrarum hodierno statu , pro Hymene ipso , si conniveant satis , in plerisque accipiendae sint . Neque tamen putandum , quod in illis etiam puellis , quae virum aliquoties passae fuerunt , hae deliciae deficient omnino . Si modo sana quae fuerit , et habitu corporis non nimis spongioso vel phlegmatico gau- deat , illam orificii coarctationem et carun- cularum intumesceniam conservare sic sa- tis integram potest , ut artes taceam , quibus levissimo negotio , constrictiorem et arctio- rem aditum hujus antri Venerei reddere valent callidae et astutae Nymphae . Ast longe ali- ter comparata res erit in illis , quae vel sim- plici vice pepererunt : In his enim membrano- sae illae inaequalitates et corrugationes , gra- tissimae Veneris illecebrae , ita obliterantur , ut earum nullum fere vel vix ac ne vix qui- dem palpabile vestigium remaneat . Quae ra- tio etiam fuit , quod corrugationes has pro Carunculis vel carnosissimis eminentiis Curiosiss. Organorum Mulier. Ruspator Regner. de Graaf accipere noluerit : Quod si enim , dicit , verae essent carunculae , in magna illa vagi- nae orificii distensione , qualis in partu contin- git , suam figuram ac molem servarent , aut a- liquod saltem earum vestigium remaneret ,
quod

quod, si contingeret, parturientibus magno forent impedimento, quandoquidem asperitate et inaequalitate sua egredienti foetui tanquam obices resisterent, p. 192 cedit. Lugd. Batavae 1677. Tantum de signis passii puerperii, quae pro superflua speculatione nemo facile habebit, qui haec tam difficilia fere omni tempore, quam ipsius Virginitatis fuisse considerat, testante Doctissimo Horatio Augenio Ducum Sabaudiae olim Archiatro qui in *Epist. I Tomi Ildi cap. 5 Editionis Francof. Wecheliana* de anno 1597 in fol. prolixè narrat, sex probatae famae et peritiae obstetrices juvenculam quandam judicasse virginem intactam, quae septem antea mensibus puerum pepererat. Valeant interim astutae foeminae cum stricturis suis abdominis post partum ad laesionem partium internarum usque adornatis, quibus *rugarum crimen*, ut cum Ovidio loquamur, evitare student: allegata a *fissura et orificio vaginae desumpta indicia*, si perita et emunctioris naris obstetrix pro inspectione admittatur, nunquam artibus suis effugient.

De Areola in Mammis statuit noster Anatomicus, consistere illam in cutis attenuatione quidem, at quae firmiori contextu quam caetera cutis gaudeat, ne impetus continuus infantis, quem in areolam sugendo exercet, tam facile eandem laedat. Videmus enim sugendo cutim etiam in aliis corporis partibus statim rubesceri.

Ex Adenologia sequentia habe:

Octo majores in capite Humano reperiuntur glandulae: Duae Parotides,

Sub-

- Sub-Maxillares,
- Sub-Linguales,
- Amygdalae dīctae :

Quae omnes ex pluribus numero componuntur glandulis , et quarum distincta orificia facile videmus oculis. Parotides per ductum Stenonianum exonerant lympham suam in fauces , Buccinatorem muscolum perforantes , prope Dentem Molarem tertium a Caninis , superioris maxillae.

Sub-Maxillares et Sub-Linguales glandulae per unum eundemque ductum , quem *Jul. Caes. Placent.* longe ante *Warthonum* descripsit , exonerant lympham suam sub lingua juxta frenulum et venulas Raninas .

Nuckii nova glandula sub inferiore palpebra , uti et *ductus novi* pro advehendo humore aqueo in *Oculis* , in cerebro saltem natae et fictae chimerae sunt .

Vigebat eo tempore , quo exercitia nostra Anatomica continuabamus , Disputatio inter *Phil. Verbeyen* Lovaniensem , et *D. Godofr. Bidloo* Leydenssem Anatomicos , de *Glandula Thymo* , cujus controversiae argumenta scriptis ex utraque parte in publicum editis , extant . Ex hac controversia nascebatur nobis occasio examinandi hanc glandulam ejusdemque situm in foetu recens nato accuratius . Haeret autem haec sub jugulo , sive in parte superiori et anteriori cavitatis pectoris , sub osse Sterno . Mediaestino adnata est ope membranae adiposae tenuissimae , quam bene comparaveris cum lamella tenuissima Omenti . Te-
git

git Venam Cavam superiorem totam , Aortam , antequam in angulum contorquetur , et principii arteriae Pulmonalis partem , (in quantum haec duo vasa extra pericardium visui se offerunt). His vasis , interventu praedictae membranae , nectitur leviuscule , ut illam digitis avellere facile possis . In Specie autem contra jejunam *Godofr. Bidloo* descriptionem de situ Thymi notandum , partem ejus superiorem tangere quidem primam Venae Cavae Superioris divisionem , ast ne unicum quidem trium ramorum ex angulo aortae ejectionem attingere , inferiorem autem glandulae hujus partem supra pericardium , reperire usque ad medium cordis , et pericardio , mediante praedicta membranula , laxe adhaerescere . Praecipuus itaque hujus glandulae usus obtegendis vasis majoribus sine dubio dicatus est : Ast , cum in infantibus ac foetu succo lacteo chyloso turgeat , qui statim ac foetus in lucem editus , successive imminuitur , videtur omnino etiam aliquid conferre ad nutritionem foetus in utero , sed qua ratione , hucusque non liquet .

Ex Angeiologia primus observavit D. Raw , Venae Portae ramum Lienarem majorem , ubi ipsi incumbit Pancreas , emittere septem , octo , decem aliquando etiam plures ramusculos , Pancreati , secundum longitudinalem ejus ductum , prospicientes . Habent Venae interius productiones membranofas , Valvulas dictas , duas semper sibi ratione situs et altitudinis correspondentes . Non illum , ut plerique Autorum volunt , habentes usum , ut sanguinis in Venis motui succurrant . Hoc
e-

enim ipsa Circulationis lex efficere potest , etiam si longius a corde distitae Venae , ejus impetum vix sentiant . Alia itaque ex ratione Valvulas in Venis non omnibus , sed Cava solum et ejus disseminationibus familiares statuimus , ut in quacunque Cordis Systole sanguinem Venalem pro illo momento quasi repressum suffulciant , ne tale pondus extraneum arteriosi sanguinis in venas ingressum repellat , et sic varias in corpore secretiones praepediat . Praeterea videmus Valvulas semper inferius orificio disseminationum Venarum qf. appositas , ut sic sanguinem per illa orificia et majores Venarum ductus ingredientem , quasi diverticula quaedam recipiant , ne levem sanguinis in majoribus Venis motum ab utroque latere appulsus sanguis interrumpat . Notandum tamen , in ipsa Cava inferiori maxima , et superioris trunco , antequam bifidetur , vix unquam inveniri Valvulas . Si enim adessent membranosae tenues et subtiles hae productiones in ipsis his majoribus truncis Cordi proximis , impetui Sanguinis a Cordis Systole effecto , vix resistere potuissent . Quapropter in distributionibus potius conveniebant , in quibus impetus sensim remittit . E contrario Vena Portae nullas habere debuit Valvulas , quandoquidem illa Cordis pressio in systole in Portae Sanguinem exerceri non potest : Venae enim Portae pars superior Arteriae officio fungens , in partem suam interiorem receptum sanguinem in hepar dimittit . Hinc Arteriae potius fabricam obtinet .

Quae de Situ Partium in genere earumque Connexione , in aliquot cadaverum apertione

observavi, brevibus hic etiam commemorabo :
 Dissecto Abdomine , uti notum , in conspe-
 ctum veniunt intestina , quae in situ naturali
 ita constituta sunt , ut Jejunum occupet re-
 gionem supra umbilicum , Ileum autem regio-
 nem illam , quae infra umbilicum sita est , ita
 ut hoc maximam partem cavitatis pelvis occu-
 pet : Colum in inferiori parte abditum quasi
 latet et curvaturam Sigmoideam facit a dextra
 cavitate ossis Ilei usque ad Intestinum Rectum .
 Duodenum occultatur in sinistro latere sub Je-
 juno . Hepar superiorem partem sub Dia-
 phragmate occupat per totam latitudinem , ita
 tamen , ut paulo major pars in dextro latere
 sita sit , quam in sinistro , quia spatium pro
 Liene in dicto sinistro latere superesse debebat .
 Ita autem comparative sita sunt Hepatis et Lie-
 nis Viscera , ut in dextro latere sub costis spu-
 riis emineat Hepar , in sinistro Lien , ita , ut si
 scirrhus affecta sint , bene ibi tumor manu ad-
 mota sentiri possit . Ventriculus occultatur
 fere sub Hepate , ita , ut in media saltem parte
 aliquantum emineat , magis tamen versus si-
 nistram ab Hepate detrusus : connectitur cum
 Liene per vasa brevia ; Ab hoc statim exten-
 ditur Omentum , Lienem simul tegens , quod
 non perforatum est , sed duplicatum quasi
 cum Colo cohaerens . Vesica Urinaria ante-
 rius tantummodo in pinguedine haeret , alias
 etiam in parte Hypogastrica et quidem facilio-
 ri apparatu et negotio secari posset Calculus :
 Ast quia propter pinguedinem Vesicae in his
 partibus vulnerata coalescere nequit cum peri-
 tonaeo , Urina in cavum abdominis effunderetur ,
 lethali periculo . Intestinum Rectum in

specie sphincter ejus , tota quasi in pinguedine sepulta cernuntur . Hoc non saltem in excernendis fecibus durioribus , sed in Partu difficili etiam usum habet egregium , ut scilicet cedere possit , quod minus fieret , si carnosae musculorum fibrae proximius adjacerent Vaginae Uteri : Econtrario pinguedo haec in statu praeternaturali multum ad Fistularum Anigenerationem conferre observatur . Aperto thorace ante omnia fere in conspectum venire solet Mediastinum , quod nil nisi duplicatura vel continuatio Pleurae est , et duos in utroque latere saccos efficit , ex quo patet , quaratione particularis Mediastini Hydrops , cujus *Hippocrates* meminit , fieri queat . Nervus Octavi vel Vagi paris per collum in thoracem delatus semper suspensus super partes vicinas Pericardium , Pulmones etc. incedit : Intercostalis vero statim affigitur circa dorsi vertebrae .

In *Splagnologiae* explicatione , cum partes Genitales Adolescentis 16 annorum nobis Anatomice demonstraret , sequentia de *Vesiculis Seminalibus* , *Vasis Deferentibus* et *Venis Testiculorum* discurrendo inferebat :

Vesiculae Seminales firmiter adhaerent Vesicae Urinae circa sphincterem . Et videtur sphincter aliquid conferre ad excretionem feminis in coitu , licet ipsae Vesiculae musculosas et carnosas fibras etiam possideant , quae primario illas convellunt .

Vasa Deferentia ad faciem externam Vesicularum sita sunt infra Ureteres , cum quibus Xiasmum figura exprimunt . Contra *Observationes Anatomicas Lealis in Actis Eruditor.*
Lip.

Lipsiens. Ann. 1687 p. 229. recensitas, notandum, Vasa Deferentia non quodam communi ductu sed duobus plane distinctis, arcte sibi invicem adjacentibus in Urethram circa caput Gallinaginis terminari, quod immixtis duabus fetis porcinis et flatu per tubulum nobis ad oculum demonstravit. Idem *Lealis* male statuit Vasa deferentia, ubi circa Testiculos Epididymides efficiunt, ita constituta esse, ut explicari digitis facile queant. Contrarium propter frequentiores hic occurrentes anastomoses vidimus in praeparatis cera repletis.

Qui *Venas* negant e *Testiculis* redeuntes, stolidi sunt. Per injectionem enim mediante cera rubra ad oculum demonstrari possunt in satis magna quantitate et numero una cum suis Capreolis, qua occasione etiam *Venas Nutritivas Vasorum Deferentium* clare vidimus. Testiculorum substantia ex meris vasis capillaribus constat, quae vasa sustentantur per membranas vel dissepimenta plurima ex membrana Albuginea enata, quomodo e. g. in Cerebro videmus Piam Matrem facere. Extremitates autem illae vasorum capillarium non saltem a Venis atque Arteriis sunt, sed etiam a Vasis Deferentibus: Vasa haec per sepimenta membranae Albugineae sustentantur, ne comprimantur vel disturbentur, atque ita separatio feminis turbetur.

Si *Testiculus* saltem *unicus* adest in homine, alter plerumque in abdomine absconditur, atque ab imperitis Chirurgis saepius pro Bubonocoele habetur. *Urethrae membrana interna* est productio membranae internae ten-

dinosae Vesicae Urinariae , et haec glandem Penis loco cutis obtegit : Hinc maximus ille dolor post sectionem calculi in glande Penis per consensum .

Vasa deferentia et Vesiculas Seminales comparat *Dn. Raw* cum ductu Hepatico et Cystide . Sicuti enim omnem bilem ex Hepatico ductu excerni , et superabundantem in Cystidem reverti videmus ; ita etiam in hoc organo sperma omne ex vasis Deferentibus adferri , superabundans autem in Vesiculas regurgitare , et tunc demum ex duabus Vesiculis per duos illos distinctos canales in Urethram tempore Venerei Congressus ejici , certum est .

Inter praeparationem Organorum Mulierum , de *Sinu Muliebri Veterum* , sequentia monebat . Notitia Sinus Muliebris , (qui post Carunculas sic dictas myrtiformes , et sub osse Pubis interius in Vagina observatur , atque in illis , quae semel saltem pepererunt capacitate sua pugnum facile admittit) usum habet egregium in Partus administratione , in specie difficilis : tunc enim manus Chirurghi vel Obstetricis , nisi inter infantis prominentis partes et Sinum hunc sub Osse Pubis applicetur , auxilium afferet nullum . Hic enim spatium manui vertendae sufficiens conceditur , cedente interim , quo deprimendae egredientis foetus partes , Coccygis osse .

Post Partum Difficilem et Embryulciam *Haemorrhagia Uteri lethalis* saepe accidit , et quidem ex hoc capite , quia separatis jam , putrescente et mortuo foetu , secundinis , Uterus propter resistentem foetus et Secundinarum

rum molem se constringere debito modo nequit , qua constrictione alias pori illi Sanguinem copiosius exsudantes , occluduntur.

Die I. Martii ego hujus Relationis Autor , et *Dn. Wickham Anglus* , fecimus experimentum de *Apertura vel Hiatu Tympani Celebrissimi Dn. D. A. Q. Rivini Profess. Lips.* invento , immisso in tubam Eustachianam argento vivo , quod statim quidem per Tympanum ex Meatu Auditorio effluebat , locus autem , ubi praecipue , distingui non poterat. Putabat autem *Dn. Raw* , qui experimento praesens erat , per poros membranae Mercurium currentem transsudare , accedente pondere , prout videmus per corium etiam eundem trajici posse , et talem Mercurii transgressum per ipsas Vesicae Urinariae membranas sat validas , casu se aliquando observasse , simul addebat. Ipsum hoc nostrum experimentum in capite cadaveris pueri adolescentis sedecim annos circiter nati , adornavimus. Interim pro *Excell. Rivini* invento Hiato stare videtur commune illud experimentum , quod Tabaci fumum per fistulas sugentes exercitiores instituere omni tempore valent , ubi sine ullis praestigiis , fumum , quem ore hauriunt , per aures reddere solent cum admiratione adstantium , quibus facti veritatem manibus quasi palpare tunc conceditur .

Sequuntur Operationes aliquot Chirurgicae , quas in Vivis subjectis Amsterodami administratas ipse vidi ,

Quamvis jam saepius laudatus et nunquam satis laudandus *Dn. D. Raw* omnes Operationes Chirurgicas in cadaveribus aliquot humanis , expositis antea omnibus ad rem facientibus Instrumentis Chirurgicis , quorum selectissimum possidet apparatus , nobis demonstraverit , earundemque repetitionem cum cautelis memoriae ergo ad calamum dictaverit non lubet tamen dictata illa ; certas ob rationes in publicum emittere , sed quaedam saltem de operationibus illis annotare , quas in Vivis aegrotantibus partim ab ipso *Dn. D. Raw* , partim a *Pieter Adriaensen* et *Dn. Boeckelmann* , Chirurgis Amstelodamensium Celeberrimis , administratas ipse vidi , et quarum encheireses postea domi chartae mandavi .

Exploratio Calculi Vesicae .

Die 21 Jan. 1707 veniebat ex Pago *Cromen-*
nic Puer 16 annorum , incontinentia urinae
 ac doloribus in regione hypogastrica enormi-
 bus laborans . Indicia aderant Calculi , quo
 de ut certus esset Praeceptor noster , sequen-
 ti modo explorationem instituebat . Prostrati
 ac resupinati in pavimentum pueri caligis exuti
 virgam laeva apprehendebat , ac dextra cathe-
 terem incurvatum consuetum , oleo prius
 madefactum , in urethram intrudebat , eo qui-
 dem modo , ut catheteris pars incurvata pri-
 mo perinaeum versus duceretur , donec us-
 que ad os Pubis venerat , quo in loco sensim
 catheterem invertebat , ita , ut partem incur-
 vatam in cavitatem ventris dirigeret , atque i-
 ta

ta in vesicam ipsam statim penetrabat. Nobis tunc etiam tractandi catheterem atque explorandi in hoc subjecto Calculum copiam dabat, et facillime quidem, moto hinc inde cathetere sentiebamus lato satis ac grandi calculo eundem insilire. His peractis promittebat sectionem, remittente frigore hyberno, peragenda, atque interim patienti potum lactis calidi, loco potus ordinarii, injungebat. Causam autem incontinentiae Urinae a magnitudine calculi parietes vesicae continuo premensis, unde nunquam desinens vesicae contractio atque involuntaria mictio, deducebat. Hanc Explorationis calculi operationem praeterire nolui. Sciendum enim, non minimam dexteritatis Chirurgicae laudem in apta Calculi exploratione poni, nec omnibus cum cathetere dextre procedere datum esse.

Lithotomia.

D. 17 Febr. anni 1707 ego et Dn. Wickham Anglos proficiscebamur cum Praeceptore nostro Dn. D. Raw Cromenicum, pagum in ditione Harlemerensi situm, ubi in puero illo, quem nuper exploraverat, Calculi sectionem in praesentia duorum dicti pagi Chirurgorum ac Consulis administrabat, sequenti modo.

Instratis arculae sesquipedali altitudine a pavimento prominentis, duobus pulvinaribus, quorum alterum alteri ex parte erat superimpositum, stratoque super his mantili duos cubitos lato, quod in anteriori arculae parte pavimento fere dependens attingebat, puerum vestimentis usque ad indusium exutum, atque

in ventre fascia ligatum , ita locabat , ut posteriora ejus altius fere , quam ipsum caput essent posita . Tunc utrique pueri brachio circa carpum injiciebat vincula ex lana parata , quibus , repressis aliquantum pueri genubus , pedibus ejus manus alligabat et firmabat . Pedes ex utroque latere manu prehensens famulus divaricabat aliquantum , aliis duobus parastatis caput et ventrem pueri stringentibus , ne loco moveretur . His praemissis , et puero ita locato , ut posteriora ejus arculae oris incumberent , D. Raw inflexo altero saltem in pavementum genu , se ante aegrotantem sistebat , et catheterem communem oleo madefactum virgae intrudens , calculum denuo explorabat , mox eundem extrahens , alium sulcatum immittebat , adeo profunde quidem , ut in perinaeo digitis eundem sentire posset , mox incisionem in sinistra perinaei , quatuor digitos a tuberositate ossis Ischii , et digitum latum ab Ano scalpello faciebat , quem incisionis locum catheter monstrabat versus perinaeum depressus . Erat autem scalpellum foliatum , pollicem fere latum , lanceolam communem figura exprimens , quod fasciola ita involutum erat , ut articuli digiti altitudine cuspidis ejus denudata saltem emeretur . Facta hac prima per cutim , pinguedinem et musculos incisione , itinerarium applicabat , et super hoc scalpello in collum vesicae usque penetrabat , tunc scalpellum vulneri infixum , manu firmiter tenendum mihi tradebat , ipse autem interea forcipem arripiens , eandem inter itinerarium ac conductorem , extracto prius scalpello intrudebat , dilatatisque per dicta duo instrumenta vul-

vulneris labiis , prehensoque cum forcipe calculo , feliciter eum extrahebat . Erat autem calculus extractus ovi gallinacei minoris magnitudinis , sanguine madidus , atque ex altera parte tenuissima membranula obductus , ubi forte cum vesicae latere aliquantum coaluerat , sphaericae de caetero fere figurae , ac saxi crassioris arenosi ad instar , inaequalis . Vulneri spongia deterso nil nisi lintea carpta applicabat , idemque obligabat , imposito saltem plumaceolo . Ita obligatus aegrotans lecto immittebatur , natibus autem pulvinar avena infarctum substernebatur , ut urina ex vulnere ac fecibus ex alvo excipiendis inferviret . Fenestras cubiculi claudere jubebat , ne lux aegrotanti quietem impediret , pro concilianda autem hac , emulsionem anodynâ pro lubitu usurpandam porrigebat . Post operationem lecto jam traditus , de doloribus intensissimis in glande penis querebatur calculo liberatus , quod per consensum accidit in omnibus , quem urethrae membrana cum interiori vesicae habet .

Die 7 Martii vidi aliam Lithotomiam ab eodem meo Praeceptore , in puero Hebraeo septenni administratam , in qua praeter jam enarrata nihil singulare , nisi quod intestinum Rectum saepius inter clamores patientis prolaberetur , quod semper oleo madefacto digito reponebat , ne in operatione impeditur .

Paracentesis Scroti .

Die 21 Febr. puer octennis Hydrocele la-
H 5 bo-

borans ducebatur ad *Dn. Raw*, quem perforato per instrumentum, Trocar appellatum, scroto ab aqua extravasata intra horae diuinae spatium liberabat. In hac operatione observandum:

1. ne perforatione venas tangamus :
2. ut Acus applicetur in loco transparente, nec profundius, quam quousque transparet, adigatur :
3. peracta operatione, emplastr. de Cumino aut simile applicandum esse toti scroto :

Notandum etiam in Hydrocele vasa praeparantia ac deferentia digitis distingui posse: in Hernia e contrario cum intestino prolapsio confusa esse. Quod pro signo diagnostico inferire poterit.

Caries ossis Tibiae.

Die 22 Febr. visitabat *Dn. Raw* Mechanicum, qui instrumenta Anatomica et Chirurgica perquam accurate et artificiosissime praeparare noverat. Hic in parte superiori ossis Tibiae laborabat carie, quo in loco novacula incisionem faciebat *Dn. Raw*, firmo nisu ad os usque scalpellum adigens, factaque incisione, labia vulneris, carnem luxuriantem separando, dilatabat, ut pro applicando cauterio locus pateret commodus. Osse enim carie infecto, fibrae musculorum carnae in parte cariosa abscedunt, & nunquam ossi iterum adnascuntur, nisi caries ablata fuerit. Cauteria autem eum in finem applicantur, ut vascula ossis cariem nutrientia extirpentur, quo facto cariosa pars separatur ultro atque abscedit,

dit , pro tempore lucrando a Chirurgo vossella auferenda . Ablata sic ossis parte cariota , fibrae carnae felicius adnascuntur , et cum osse denuo coalescunt . Et tunc sine omni periculo apertura illa carne iterum claudi potest .

*Labii Leporini Sectio , a Piet.
Adriaensen , Fil.*

Infantem sex mensium , cujus vultus duplici Leporino Labio erat deformatus , Chirurgus parastata gremio suo excipiebat , ejusdemque caput ambabus firmiter tenebat . Alter Chirurgus operator scalpello labia , quae cum gingivis maxillae superioris coaluerant , separabat , et forficula quatuor extremitates vel oras fissurae praeternaturalis cruentabat . Hoc facto tres paratae erant Aciculae argenteae , altera extremitate tricuspidatae , altera rotundae , ac superficiali globulo instructae , ejusdem ac moduli maximi solent esse communes aciculae crassitie , longitudine tres pollices adaequantes . Hae tribus firmatae erant retinaculis , ac filio sericeo purpureo firmiori instructae , fili autem extremitatem claudebant particula alutae orbiculata ; Tunc aciculam retinaculo firmatam primo in superiori fissurae loco penetrabat , ita , ut ex utraque parte minoris digiti latitudine a margine fissurae perforaret , quem perforationis locum etiam ex utraque parte dictae alutae particulae muniebant , circa aciculam autem transfixam filo sericeo decussatim plexo , ter firmiter distantem vel hiantem labii fissuram constringebat : Secundam

dam aciculam in infima fissurae parte transfigebat, eodem ac in superiori modo vulneris labia constringens: Tertiam vero aciculam in mediae fissurae parte applicabat. His peractis ac labiis quam poterat fieri accuratissime aequatis, uniuscujusque aciculae extremitates forcipe auferbat, ita tamen, ut quarta pollicis parte adhuc eminent. Tandem loco vulnerato emplastrum in duabus extremitatibus fissum imponebat. Post operationem infanti potiunculam confortantem propinabat, quae simul collutioni oris cruore infarcti interserviebat. Tertia post operationem die auferbat *Dn. Adriaensen* aciculam medio loco applicatam, quarta illam, quae superiori, et quinta, quae infimae fissurae parti erat transfixa.

*Fractura cum Vulnere in medio ossis
Tibiae:*

Patientis in commodo scabello locati os fractum mensulae imponebatur, substrato pedi pulvinare pressius infarcto, tunc laeso ab assistantibus firmiter detento, pes altera Chirurghi manu circa calcaneum, altera superius in dorso pedis apprehendebatur, ac sensim, quantum ad repositionem sufficiebat, extendebatur. Facta repositione, pedi applicabatur primo emplastrum Defensivum circa extremitates fissum, ut firmitus adhaeresceret, huic imponebatur ligatura ex linteis ad modum voluminis compacta (*Eine Buch-Ligatur*). Haec ex multis conficitur linteis planis, ita dispositis, ut horum extremum quinque palmarum longi-

gi-

gitudinem et duarum latitudinem habeat , interiora sequentia gradatim in longitudine ac latitudine deficient , quorum fere sex debent esse numero in medio confuta. Lintea haec circa oras bis fissa sunt , et priusquam applicentur , spiritu vini madefiunt. Tandem ligaturam hanc et fascias muniebat ferulis , quarum inferior furas ambiens latior erat reliquis lateralibus : illa enim tres pollices , hae duas saltem latitudine sua exaequabant : locus Tibiae superior vulneratus sine ferula relinquebatur apertus. Ferulae ipsae tribus fasciis lineis sufficienter constringebantur , mediam primo , deinde superiorem , atque ultimo inferiorem firmando , simulque cavendo , ne strictiori fasciarum applicatione noceamus , sufficit nimirum strictura , quae spathae intrusionem facile admittat. Pro meliori defensione ab injuriis externis , pes laesus in pulvinari molliusculo tribus fasciis firmato reponebatur. Tandem grabato imponebatur patiens , elevato paulisper pede , et ex utraque grabati parte alligato , ne hinc inde moveri ac laedi iterum posset. Post haec quotidie semel deligatio solvebatur , et vulnus ipsum plumaceolis ex filis carptis detergebatur , aliaeque fila carpta melle rosaceo imbuta imponebantur , modoque jam fufius descripto semper iterum deligabatur : Calcaneo , ut ab omni compressione liber relinquatur , pulvillus ex linteis confectus substernebatur.

Amputatio Artuum.

In amputatione Pedis , hujus extremitas altius

tius locata esse debet , quam pars superior , quod impedit , ne sanguis tanto impetu ad partem amputandam ruere queat . Tunc instrumento Chirurgico , *Tournequet* , applicato , impeditur , ne cochlear quidem sanguinis effluat . Amputatio in parte carnosâ cito fiat , minus vero in ossè , ubi sensim et provide , ducenda est ferra , alias facile os frangi potest . Amputatione peractâ , deligatio non fiat oleis vel emplastris , nec arteriæ forcipe constringantur , sed sufficit applicatio vesicæ bubulæ pulveribus adstringentibus atque emplasticeis instructæ , ex quibus optimus fungus pulverulentus , vulgo *Bovist* . Cavendum ab adstringentibus Vitriolatis . Ligatura in pueris ac macilentis non sit nimis fortis , alias facile gangraenam causatur , in obesis vero potest esse firmior .

Excrescentiæ Uteri extirpatio .

Optime extirpantur tales excrescentiæ per ligaturam , quæ fit filo fortiori , bis eidem circumducendo ac firmiter constringendo , pondere plumbeo vel ferreo extremitati fili appenso . Sic intra tres vel quatuor dies decidunt . Levis inflammatio , quæ a Ligatura oritur , non attendenda . Haec operatio a *Dn. Boeckelmann* d. 16 Decembr. 1709 in foemina quadragenaria , optimo cum successu peragebatur .

De Mammarum Scirrho et Cancro .

D. Bidloo Lugduno Amsterodamum vocatus

tus ad foeminam scirrho Mammae dextrae laborantem , referente *Ruyfchio* , hunc scirrhum pro Cancro habebat , eundemque manu sua excindere paratus erat . At *Dn. Ruyfch* simul in consilium ante operationem vocatus , statim cognoscebat , non veram esse Cancrum , sed Scirrhum saltem , et applicato emplastro de Cumino , intra quatuor dies tumorem dissipabat et curabat feliciter .

In Vero Cancro , sive occultus ille sit sive Exulceratus , optimum esse *Dn. Ruyfch* existimat , eundem non irritare , multo minus per calida discutientia medicamenta acrimoniam ejus intendere : Securissima tunc medicamenta esse Refrigerantia , Empl. de Ran. c. mercur. , vel laminam plumbeam mercurio inunctam .

De Vulneribus Abdominis cum Proci- dentia Intestinorum .

Ante omnia prolapsa intestina digitis , vel instrumento quodam obtuso rotundo reponenda sunt : ubi cavendum , ne intestina inter peritoneum atque abdominis musculos per errorem intrudantur , quod saepius accidit . Peritoneum enim in vivis multo facilius quam in mortuis a musculis abdominis separatur . Quod si intestina , modo jam dicto , intra musculos ac peritoneum intrudantur , lethale est . Gangraenam enim statim concipiunt . Idem accidit , quando intestina prolapsa nimium fricantur et comprimuntur .

Fractura Ossium Nasi .

Re-

Reponuntur haec ossa per instrumentum ferreum vel ligneum spathae simile , quod gossypio involvitur , ita , ut narium cavitati quodammodo respondeat : Hoc in nares sensim cauteque intruditur , ossaque depressa elevantur. Exterius vero ope manus repositioni succurrendum , donec , quantum licet , perfecte sint restituta . Hoc facto cannula una vel altera , si necessitas postulet , naribus immittenda : quae cannula duabus auriculis sit instructa , auriculae autem perforatae , per quae foramina trajecta fila superius colligantur ac firmantur . Exterius postea empl. Defensivum Vigonis applicatur , quod fascia circumjecta in nucha firmatur .

DE HORTO AMSTELODAMENSI.

Ex Nosocomio in Hortum : Qualem , praeter Amsterodamum , universa Europa , nullum habet , exoticis ac rarioribus plantis adeo abundanter instructum . De situatione ejus , cultura et magnitudine , quae mediocris , nihil dicam : saltem de Plantis , Officinalibus praesertim , et illis in specie , quae rariores sunt secundum *Catalogum Plantarum Usualium Horti Medici Amstelodamensis Caspari Commelini de anno 1698* pauca adjiciam , Vidi autem sequentes potissimum .

Kali , quae planta est caules protrudens late diffusos , cubitalis altitudinis , crassiusculos illos , crassitie ac colore Portulacae similes , folia itidem crassiuscula , longa , ex lato principio in mucronem desinentia , negligenter incurvata , circa quorum pediculos nascuntur flores monopetali , quinque laciniis divisi ,
cum

cum fructu superstites , qui coloris puniceî , cochleae ad instar intortus et singulari semine foetus est . Haec est planta illa , ex qua in Aegypto quondam , jam in Occitania Galliae etiam prope Monspelim , atque in Provincia Narbonensi , per incinerationem sal ad conficienda vitra purissima , paratur .

Inter omnes icones , quas Herbarii monstrant , nulla magis cum viva planta convenit , quam illa , quae apud *Lobelum p. 479 edit. Antwerp.* invenitur .

Mandragoram plantam foliis prope radicem exeuntibus , obscure virentibus , subrotundis , late circumcirca in terram diffusis , Betae vel Lactucae similibus , foetidis : florem fert monopetalum regularem , quinque laciniis divisum , quem excipit fructus mollis , plerumque globosus , coloris lutei , in quo semina ut plurimum reniformia . Miror hanc plantam ab Autoribus Germaniae denegari , cum tamen ante aliquot annos ab Amico Vratislavia mihi transmissa fuerit radix , in Alpibus Giganteis (auff der Baude bey Schreiberau) reperta , caractere cum Anthropomorpha Veterum exacte conveniens .

Terebinthum arborem ramis cinereo cortice tectis raris atque extensis , foliis conjugatim ut in Sorbo nascentibus pinnatis cum uno semper in summitate impari , subrubentibus , lucentibus glabris , juglandis foliis fere similibus : Loco florum , ante folia , Verno tempore , e ramulorum tuberculis in longo racemo protrudere solet stamina apicibus purpurascensibus ornata .

Cassiam Fistulam arborem cortice et foliis

Juglandi similem : cortex enim est planus , mollis , cinereus , folia multo plura quam in juglande , alata , ex quinque conjugationibus contexta , in extremo acuminata : Flores irregulares pentapetali , quales fennae fere sunt , coloris aurei , sequente filiqua satis nota .

Orleanam , Urucu Brasiliensium . Erat arbuscula bipedalis proceritatis , foliis Populi nigrae fere similibus , hilari virore perfusis , mucronatis , cum pediculis biuncialibus : Flores praeterito autumnno produxerat Pentapetalos , albos ex parte incarnatos , sequentibus folliculis lappaceis , hispidis , qui in duas partes dehiscentes , plurima continebant semina coloris miniati .

Extractum e feminibus aqua simplici confectum , ad butyrum et pannos , itemque Succolatam tingendam usus haud exigui est .

Curiosa etiam spectatu erant :

Euphorbium Verum , Scadida Calli Horti Malabar . duorum pedum proceritate e terra emergens , articulato , triangulari et quadrangulati stipite , marginibus sinuosis , angulosis , e quorum angulis spinae duplices semper , crassae , curtae , fuscae , rigidae ac nitentes , emergunt .

Flores , uti *Dn. Commelin* ab *Henr. van Rheede* habet , in loco natali fert Monopetalos , quinque laciniis semilunaribus divisos , crassos , rigidos , planos ex viridi flavescentes : Ex florum umbilico stamina emergunt , floribus autem marcescentibus succedunt vascula seminalia tricocca , in quibus tria semina rotunda , extus cinerea , intus albicantia .

Ar-

Arbor Camphorifera : Caudex teres erectus, cortice dilute virescente, nitente amictus est: folia pediculis longis, tenuibus ex fusco spadiceis nixa, alternatim posita, palmam fere longa, duos digitos lata, margine aequali, nervosa, in utroque extremo angusta, superne nitentia, hilari virore praedita. quae contrita odorem spirant validum camphoratum. Hujus arboris nitidissima species, proceritate satis conspicua virum fere aequante, Dresdae etiam in *Domini Heigii*, deliciarum Hortensium Nutricii perquam Liberalis, Horto Exoticis plantis instructissimo, alitur. Hanc primus descripsit delineavitque *Jac. Breynius*, in *Centur. Plantar. Rar.* qui et ejus notas characteristicas et differentiales optime dedit in *Prodr. II Fascic. Rar. Plantar.* Nimirum quod arbor haec Camphorifera Japonica baccam ferat nuciformem, caliculatam, nucleo bifido calloso, duro ac pingui, cortice ac putamine integro, fragili, calice concavo. A *Laur*o differt dicto calice, ab arbore *Canelli* fera floribus e foliorum sede prodeuntibus foliisque alternis.

Cistus-Ledon : est suffrutex ramis frequentibus lignosis, foliis oblongis superne ex viridi nigricantibus, inferne candicantibus, odore fragranti svavi praeditis : flos magnae rosae instar albus, ast cujus petala circa unguem ex purpura nigricante macula ornantur, floris umbilico multis croceis staminibus et apicibus pleno : vascula seminalia quinque vel potius multicapsularia. Hujus arboris Resina pharmacopolis nostratibus, nomine *Ladani*, notissima est.

Styrax Liquida C. Bauhin : quae arbor est Virginiana , a *Rajo* Platanus Virginiana *Styracem* fundens appellata. Caudex cortice gryseo amictus , superiori parte ramosus : folia incondita , pediculis teretibus rubentibus pendentia , per ambitum profunde serrata , foliis *Aceris* similia , superne saturato viridia , inferne incana , saporis amariusculi cum adstrictione , hyemali tempore decidua. Fructus *Rajus* ait pilulas esse rotundas Platani pilulis similes. Vid. etiam tota ejus , ast sine floribus et fructu , figura in *Horto Amstelod. Tom. I. fig. 98.*

Arbor Benzoinifera : *Arbor Virginiana Citriæ vel Limoniae folio Benzoinum fundens* , *Hort Amstelod. P. I. fig. 97.* Est Arbor Virginiana , caudice recto , cortice fusco , ramulis virescentibus : folia alternatim insident , *Limoniae* aut *Citriæ* aemula , tactu tamen molliora , substantia tenuiora , adversa parte hilari viriditate , averfa albidiori praedita , in utroque extremo angusta et mucronata ; manibus contrita odorem spirant ingratum : florem eo tempore . mense sc. Februario , monstrabat luteo-herbaceum , exiguum , pentapetalum.

Sebestena Domestica. Arbor erat quinquepedalis altitudinis , caudice cortice scabro fusco : rami foliis inordinatis pedunculis longioribus suffultis , erant vestiti , oblongo-rotundis , Alii aemulis , mucronatis , crassioribus , nonnihil rugosis , margine inaequaliter serratis , superne satore viridibus , inferne dilutiori virore perfusis , deciduis : flores habebat , mense Martio , pentapetalos , ramulorum cymis insidentes , albicantes , suaveolentes. Fructus

etus in Horto Amstelodamensi nunquam quidem in arbore visus, Medicis tamen atque Aromatariis notissimus, atque in pectoris affectibus commendatus. Arbuscula autem haec ex ossibus fructus provenerat.

Hae sunt plantae, quae eo tempore vel proceritate insigni atque in Europaeis regionibus rariore, vel floribus ac fructibus conspicuae, Hortum Amstelodamensem ornabant. Aliae quidem erant plures Exoticae, ast quae meo tempore vel non florebant, vel propter teneriorem juventutem curiosiorem contemplationem ac descriptionem nondum admittebant. Tales erant:

Aristolochia longa, offic. Est longa vera, *Baub. Pinac.* folia habet rotundiora et minora, prae *Aristolochia Rotunda*, pediculis etiam instructa: flores breviores colore viridiores, qui in *Rotunda* atropurpurascens sunt, secundum *Remb. Dodonaeum Part. III. Lib. XI.*

Cuminum verum, *Cuminum semine longo*, *Baub. Pinac.* Accuratiorem prae aliis hujus figuram invenimus apud *D. Rivinum Ordin. Plantar. quae sunt flore Irregulari Pentapetalo.*

Ferula Galbanifera, seu *Ferula Galbanifera Africana Ligustici foliis et facie. Hermannii Parad. Batav. p. 163*: ubi laudabilis icon. Haec species pro *Galbanifera* vulgo habetur, quamvis adhuc incertum sit, ex hac, an ex alia *Galbanum* colligatur. vid. *Herm. l. a.*

Anchusa floribus puniceis C. Baub. Hujus radix roseo colore tingens dicitur *Radix Alkanna* in officinis, quamvis vera *Alkanna* sit.

Ligustri species Orientalis , quae in nostris officinis non reperitur .

Cassia Lignea est species arboris Cinamomiferae *Cassia Lignea et fusca aromatica*. J. B. Sunt autem *Cassia Lignea* , Cinamomum , Cannela , Folium Indum seu Malabathrum , aromata illa officinalia omnia , partes , si non unius ejusdemque speciei , loco natali aut cultura saltem differentis arboris , ut multorum est opinio , exiguae tamen differentiae . Ut non male in hortis arbor Cinamomifera pro cognoscenda origine dictorum aromatum proponatur communiter , donec India Or. alias etiam hujus generis species , dicta simplicia proferentes , nobis suppeditet. vid. *Horti Medici Amstelodam. Plant. Usual. Catalog.* p. 60.

Indigo , Nil , *Anil seu Indigo Indica*. Morison. H. Ox. p. 202. Ameri Hort. Malabar. ubi exactam ejus habemus figuram *Tom. I. tab. 54.* Est autem arbuscula hominis altitudine , nascens in arenosis et petrosis : foliorum habet quina et septena paria cum uno in vertice impari in eadem costa , quae Coluteae familia ferre sunt , coloris ex viridi subcoerulei : flores spicatum profert papilionaceos parvos , filiquas autem parvas , etiam teretes , unciales , cum semine glabro , cylindraceo . Haec arbuscula tempore pluvioso et aestivo bis in anno dat flores . Ad Emerum Tournefortii seu Coluteam scorpioidem Casp. Baub. referri posset , ob filiquas non articulatas et cylindraceas . Vocatur *Colutea Herbacea* a Casp. Commelino in *Flora Malabar.* quo referri etiam videtur ab Hermanno in Hort. L. B. Apud Casp. Baubinum

num in Pinace Indigo et Glaſtum vel Iſatis Thuringorum ſub eodem inveniuntur genere. Cum tamen Glaſtum noſtrum ſit planta annua , flore regulari tetrapetalo , fructu unicapſulari oblongo. Quod de caetero praeparatum illud attinet , quod in officinis ſub nomine *Indigo* proſtat , et a tinctoribus praefertim uſurpatur , eſt illud ſuccus deſaecatus ex ramis et foliis arbuſculae Anil , inſpiſſatus. Simile pigmentum praeparabatur olim ex Thuringorum Glaſto , et ab Indico non niſi colore minus exaltato differebat . Dicitur autem Indici colorem acceſſione calcis vivae exaltari ; quapropter etiam lanae et lintea hoc ipſo tinſta in reſeſſu minus bona , nec tam conſtantis coloris eſſe obſervantur.

Gummi Anime , Arbor Siliquoſa , ex qua Gummi Anime elicitor. Deſcriptionem huius arboris invenimus quidem jam apud *Piſonem* L. 4. c. 9. H. N. p. 123. Foliorum autem et fructuum optimam figuram apud *Leon. Pluckenet. tab. 82.* ſub nomine *Ceratiae Diphyllos Antegoava dictae*.

Vanilla , *Banillus* et *Vagnillus* Offic. Eſt volubilis ſiliquoſa Mexicana foliis Plantaginis , *Jo. Raji. Hiſt. Plant.* Ab *Hernandez* , qui primus dedit ipſius plantae figuram , appellatur *Tlixochitl* , flos niger et *Aracus aromaticus* , *Hiſt. Nat. p. 38.*

Cacao , *Amygdaliſera* , *Guatimalenſis* , *Bauh. Pin. Cacara Quabvitl. ſeu arbor Cacarri* , *Cacaviſera Hernandez.* Noviffimam deſcriptionem huius Plantae exoticae , quae in arboris ſatis procerae altitudinem tractu temporis excreſcere ſolet , dedit *Clariff. Plume-*

rins in libro *Nova Genera Plantarum Americanarum* inscripto , *Parif. 1703. in 4. edito.* Et florem habere dicit regularem pentapetalum , cujus pistillum abit in fructum Cucumiformem alatum, inaequalem, seminibus foetum, in quinque ut plurimum acervulos collectum oblongos , in multas veluti amygdalas fissiles.

Sesamum Verum : cujus exactam figuram *D. Rivinus* habet in *Ord. Plantarum*, quae sunt flore irregulari monopetalo : et haec iconi in ipso *Horto Malab. T. IX tab. 54* delineatae, ubi Malaica lingua *Schit-Elu* appellatur , praeferenda omnino videtur. *Tournefortius* *Sesamum Digitalis* speciem facit.

Bombax frutescens , *Gossypium* seu *Xylon frutescens sem. albo. C. B. Pin. Gossypium herbaceum seu Xylon. J. B. T. I. p. 343.* Ex hac potissimum specie , cujus figuram vide apud *Matthiolum* et *Hernandez p. 308* colligitur in Asia minori , tanta lanuginis copia , quae *Baum Wölle* nostratibus audit. Verisimile autem est , *Gossypium* l. lanuginem hanc et ex arboris cujusdam specie colligi , unde Germani mercatores denominandi occasionem sine dubio sumpserunt , licet ad idem genus a Botanicis referenda . Nascitur enim in Indiâ Orient. arbor , quae *Gossypium arbo- reum flore flavo* ab *Hermann* in *Hort. Acad. L. B. et Cudu-Parili* in *Hort. Malabar. T. I.* appellatur , ut et aliae species , de quibus videri merentur *Tournefort. et Pluckenet.* *Gossypio* vel *Xylo* huic in genere flos est regularis monopetalos , instar *Ketniae* vel *Alceae* , cujus pistillum abit in fructum subrotundum , membranaceum , multi-capsularem , seminibus

bus repletum fuscis circumcirca lanugine albissima involutis . Praeterea in Indiâ Orient. aliae reperiuntur arbores excelsae Lanigeræ , a Xylo genere diversae , quarum fructus nobis lanuginem sericeam suppeditant , Seidene Watten dictam , quae quidem , uti Gossypium in fila duci nequit , pro culcitris tamen , togis Japonicis et stragulis farciendis , propter sericeam molliem , aptissima est .

Harum duae potissimum dantur species .

1. *Capock et Panja-Panjala Horti Malabar. T. III. Arbor Lanigera Bontii et Clusii , Gossypium Javanense Salicis folio , C. B. Pin.*

2. *Moul-Elavou Hort. Mal. T. III. Arbor Lanigera spinosa Malabarica , Commelin not. ad Hort. Malab. caudice ramisque spinosis et florum magnitudine coloreque purpureo et fragrantia potissimum ab antecedente discrepans . Utraque haec species secundum Hort. Malabar. in descriptionibus florem habet regularem pentapetalum , cujus pistillum abit in fructum oblongum Cucumiformem , cortice duro praeditum quinque capsularum , feminibus sericea lanugine involutis refertum : folia instar Viticis ex pluribus aliis ex eodem centro in orbem dispositis , composita sunt ; simplex folium , salicis aemulum , at latius est .*

Curcuma . Est radix Curcumae radice longa , Cyperi genus ex India Matthioli , C. B. Pin : Curcuma foliis longioribus et angustioribus Jacob Breynii Prodr. II. Manjella-Kua Horti Malab. T. II. tab. 21. Figura , quae in Hermann. Hort. Acad: L. B. reperitur , praestare videtur prae illa , quam Hort. Malabarius habet . Plantam ipsam optime nobis sub

Cannae Indicae figura concipere possumus, utpote cum qua et folia et crescendi modus conveniunt. Florem habet irregularem monopetalum, quem *Tournefort.* nominat *Liliaceum*, multifariam scissum, cujus calix abit in fructum tricapsularem; adeoque plantam hanc laudatus auctor *Cannae Indicae*, quam *Cannacorum* vocat, speciem facit, nominatque *Cannacorum radice Crocea* seu *Curcumam Officin.* *Instit. Rei Herb.* p. 367. *Hermannus l. a.* simili ac *Curcumam* fructificatione gaudere nos docet *Bengalam Indorum*, *Cardomum majus et minus*, *Costum Arabicum*, utramque *Galangam*, *Zedoariam*, *Zerumbet Garziae* et *Zingiber*, unde una cum *Curcuma* sub eodem genere summo reponenda censet. Et hoc, ut ego quidem observavi, non sine ratione, siquidem et in alia adhuc maxime notabili proprietate plantae hae conveniunt, quod caulem flores et fructum ferentem plane singularem ex ipsa radice ad latus protrudant, a caule foliato plane diversum.

Zingiber in specie quod attinet, invenitur illud sub nomine *Inschi* vel *Inschi Kua* in *Hort. Malab. Tom. XI tab. 23.* Ubi iconem vide, ex qua liquet non exiguus *Morisonii* error, qui *Hist. Oxon. Part. II. p. 350* Iridis speciem pro *Zingibere* descripsit ac depinxit, cui errori folia *Irina*, quae potius tamen arundinacea, ansam dedisse videntur. Male quoque *D. Doct. Valentini* Clarissimum *Hermannum a Morisonii* partibus stare tradit, cum contrarium ex *Hort. Acad. L. B.* sub *Curcuma* descriptione appareat. Illa enim verba, quae de hac radice in *Hermanni Cynosura Ma-*

teriae Medicae nuperrime edita reperiuntur ,
supposititia credo .

Est autem Cynosura haec Colleg. M. S. in
Mater. Medic. a Celeberrimo viro olim habi-
tum , ast publicae luci nunquam in illa , qua
apparet forma , destinatum : foetus , quem
pro suo non agnosceret , si in vivis adhuc es-
set Clariss. ille Botanicus ; adeo enim mutilus
est , et infra doctorum expectationem , ut
tanti Viri famam non parum obscuret .

Cardamomum minus Offic. *Cardamomum*
simpliciter Officinis dictum C. B. Pinac. Est
fructus plantae *Elettari* dictae secundae *Horti*
Malabar. Tom. XI. tab. 4. et 5. Praeter hanc
Cardamomi speciem , dantur adhuc duae a-
liae : *Amomum* Offic. vel *Amomum racemosum*
C. B. Pin. *Elettari prima* *Horti Malab. Tom.*
XI tab. 6. a quibusdam male *Cardamomum*
majus vocatur : *Cardemomum* enim majus
verum Offic. et *Bontii* , sextuplo fere minori
in fructu longius est , a quibusdam *Cardamo-*
mum longum salutatur . *Grana Paradisi* Car-
damomis etiam a quibusdam accensentur : In
Officinis aliquando haec Cardamomo majori
substituuntur , ast insigni errore , cum ad Pipe-
ris acrimoniam sapore suo quam proxime ac-
cedant . Figurae plantarum , quae Cardamo-
mum ferunt apud *D. Valentini in Mus. Mu-*
seor. plane fictitiae sunt , ab infelici *Pometi*
delineatione desumptae .

Senna Alexandrina Offic. *senna Orient. Ta-*
bernaemont. cujus figura licet ligno saltem in-
cisa , corruptae *D. Valentini* omnino praefer-
enda . Pertinet ad ordinem Plantarum , quae
flore sunt irregulari pentapetalo . *D. Rivinus*
figu-

figuram quidem hujus *Officinalis Sennae* hucusque in Opere suo nullam dedit, bene autem *Tournefort.* qui *Sennam* refert ad classē *Arborum* et *Fruticum* flore *Rosaceo*, cujus pistillum abit in siliquam compressā.

Scammonium Offic. Planta, ex cujus radice colligitur *Scammonium*: dicitur a Botanicis *Convolvulus Syriacus*, e. g. a *Morisonio Hist. Ox. P. II p. 12 Scammonia Syriaca C. B. Pin. 294.* Optimam apud *Lobelium* invenies figuram, ex qua suas postmodum mutuati sunt alii. *D. Valentini* icon quidem convolvulum refert, at plane a verō diversum, utpote qui folia habet sagittaeformia, minime autem, uti *Valentini* figura, cordata.

Guayacum Offic. *Guayacum magna matrice C. B. Pin. Guayacum American. primum fructu Aceris seu legitimum Jac. Breynii Prodr. I.* Est arbor tractu temporis in satis magnam proceritatem excresecens, ramis circa genicula aliquantum nodosis, cortice inaequali fusco tectis: folia habet subrotunda, quatuor in quavis costa, conjugata, crassa, *Lentiscina*: fructum etiam vidi exsiccatum summitatibus ramorum adhuc insidentem, *Aceris* fructui, exceptis aliis foliaceis, simillimum.

Lignum Sanctum Offic. A *Guayaco* differt colore, qui in sancto albidior est, caeterum viribus fere convenit. Arbor, quae *Lignum Sanctum* suppeditat, dicitur *Guayacum prope modum sine matrice C. B. Pinac. Guayacum American. alterum fructu Evonymi Jac. Breynio Prodr. I. foliis Lentisci eidem, Prodr. II. Hoaxacan Hernandez. p. 63. Congeriem synonymorum in uno nomine dat Leon. Pluckenet.*

Phy-

Phytograph. tab. 94, dum *Jasminum* vulgo *Americanum* et rectius *Evonymo* affinem Occidentalem, alatis *Rusci* foliis, nuciferam, cortice ad genicula fungoso, nominat.

Balanus Myrepjica, *Nux Been* Offic.: In Juventute arbuscula haec monstrat furculum folia emittentem ramosa, quibus adhaerent foliola *Heliotropii* similia. Figuram talem accuratam et curiosam vid. apud *Tob. Aldinum* in *Hort. Farnes.* p. 73.

Thymelaea foliis *Lini*, cujus grana *Gnidia* appellantur ab aromatariis. Figuram cum Natura convenientissimam habet *Carol. Clusius Hist. Rarior.*

Sanguis Draconis. Arbor in Horto Amstelodam. tunc videnda, ex qua Gummi hoc colligitur, erat *Palma prunifera* foliis *Juccae*, *Draco arbor C. B.* *Sanguis Draconis* optimus autem in India Orient. ex arboris spinosissimae $\mu\epsilon\nu\omicron\beta\lambda\acute{\alpha}\varsigma$ strobilis a Malajis Jananisque colligitur. Arbor strobilos hos proferens est *Palma Conifera* spinosa, quam optime et curiosissime describit autopta *Engelbertus Kempfer*, in decade observat. *Exoticarum* sub titulo *Dsierenang*, satis diffusa relatione. Quae *Clariss. auctoris* dissertatio *Lugduni Batavor.* 1694 edita, eo magis digna ut legatur, cum praeter allegatum *Dsierenang*, et alia non minus rara et curiosa, ut *Agnum Scyticum* vel *putatitium* illud *Muscorum* *Zoophytum* *Barometz.* vulgo dictum, *Asphaltum Caspii maris*, *Mumiam nativam Persicam* *Moyminabi* in spelunca petrosa prope Urbem *Dara* reperiundam, *Torpedinem sinus Persici*, *Moxam Chinenisium* etc. describat, quae omnia in locis suis natalibus ipse

ipse perlustravit auctor. Dicta arbor sanguinem Draconis fundens, *Palma-Pinus a Casp. Baubino* appellatur, *Rotan* seu *Arundo caule farcto* à *Bontio*. Notari enim meretur, duo potissimum esse Arundinis apud Indos genera: alterum caule farcto, quod *Rotan* a Malajis et Javanis vocatur, alterum vero caule cavo, quod *Bambus* appellatur. Ex hoc posteriore, *Bambu Pisonis*, colliguntur, quod incidenter annotare operae pretium duco, in India primi stolones vel teneriora germina, quae adjectis Aurantiorum ac Limonum immaturis fructibus, Allii radicibus, Capfico, Zingibere et aliis quibusdam aromatis, additoque aceto, vel acida quadam muria, condiuntur, atque in Europae diversas regiones transmittuntur a inercatoribus, quale condimentum Magnatum mensas hodie ornat sub *Asiae vel Acciae Bambus* nomine. Notandum etiam quod hoc Arundinis genus *Bambus* dictum in tantam apud Indos proceritatem excreseat, ut naviculae inde extrui queant, testis *Guil. Pisoni in Mantiss. Arom. p. 186.* Ex adulta hac planta *Bambus*, succus colligitur a sole exiccatus, qui *Tabaxir Avicennae et Arabibus* dicitur, et veterum Saccharum fuisse creditur, colore lacteus, substantia admodum rara, spongiosa et porosa, levis, et gustatus instar Boli vel unicornu fossilis Linguae tenacius adhaerens. Haec occasione *Assiae Bambus*. Aliud non minus aestimatum a delicatioribus condimentum est, quod *Soia* communiter appellatur, pretiosius adhuc, ex India Orient. non minus, vel potius Japonia, ad nos perveniens. Hoc, prout *Clariss. Hermannus* quon-

quondam *Domino Sherard Anglo* communicavit, ex certa specie Phaseolorum in Japonia praeparatur. referente *Sam. Dale in Pharmacologiae supplement. p. 182.*

Arundo Saccharifera C. B. Pinac. Tacomaroë Pison. Nulla adhuc apud Botanicos accurata ejus figura aut descriptio prostat. Fortassis autem *Clariss. D. Hans Sloane* hunc defectum in *Historia Insulae Jamaicae Naturali* novissime edita, supplevit. A *Tournefortio in Instit. Rei Herb.*, quod mirum, hoc plantae genus omissum, fortassis propter characteris incertitudinem. Dicitur autem *Arundo Saccharifera* in Indiis paniculam protrudere flosculis staminosis et seminibus Miliaceis ornata.

Haec sunt, quae mihi Amsterodami per semestrem fere commoranti pro augmento Artis nostrae observare atque annotare curae fuerunt. Nihil de Urbis hujus, Celeberrimi Europaeorum Emporii, singularibus adjicio, utpote quorum pleni sunt Itinerariorum Libri et peregrinatorum ora atque discursus. Studiis meis intentus, alias curiositates vidi quidem, ast fugitivo oculo, et in spem futurae oblivionis, ut necessaria eo firmitus inhaerent.

Vergente autem ad finem Aprili mense, anni 1707 sarcinas collegi, atque Hollandiae dicens vale, reditum in patriam per *Noivomagum* et *Coloniam Agrippin.* adornavi. Hunc itineris tractum consulto elegi, partim quia eandem, qua veneram, viam repetere taedium erat, partim, quia *Coloniae* Patrum societ. Jesu Collegium et Bibliothecam visere in

vo-

vôtis habebam. Per Oëtiduum itaque COLONIAE commoratus, dictam Bibliothecam ingredi ac lustrare plus simplici vice licuit. Laudanda enim Rev. Patrum erga externos humanitas, siquidem omnem, quam poterant, de bibliotheca sua notitiam benevole et mihi impertiebant. Commendatus mihi aliquando ab illustri quodam Viro, Musarum Patrono, liber rarissimus, in hac ipsa Patrum Jesuitarum Bibliotheca inventus et visus, *Asverii Icones Virorum Illustrum* puta, Argentorati olim impressus, quem praeter dictas Philosophorum, imprimis eorum, qui Adeptos se nominare solent, icones, vitas etiam et res gestas cum nervosa doctrinae eorum scia-graphia comprehendere narrabat. Hunc in laudata jam Bibliotheca quaesivi sedulus, Bibliothecarium, ut suppeditaret librum, continuo fatigans. Ast frustra egi omnia: Bibliothecarius talem nunquam vidisse sancte testatus est, et catalogi tam Manuscriptorum quam impressorum Codicum nec volam nec vestigium hujus libri monstrabant. De caetero non veterum saltem sed recentiorum etiam Codicum sat magno numero haec Bibliotheca instructa est, atque in eo cum magnificentia adjacentis Templi atque Collegii optime congruit. Templum enim hoc Jesuitarum, universae Coloniae nitidissimum si appellaveris, non errabis. Quod Cathedrale enim illud attinet, a sepultura Trium Magorum Regum per totum Orbem celebratum, hoc, nitore ac magnificentia longe est inferius. Immensi quidem operis aedificium illud est, sed irriti labore non ultra mediam partem erectum, imo cho-

chorum si excipias , totum aedificium vastissima potius veteris architecturae Gothicae rudera , quam Aedem Sacram , repraesentabit . Ex reliquis Urbis hujus Templis atque Sacellis , quorum numerus ad trecenta fere ascendere vulgo dicitur , inter praecipua numerantur *S. Gerconis* , et *S. Ursulae* , quorum postremum reliquias undecim millium Virginum Martyrum continere creditur . Est aliud Sacrarum Virginum Collegium et Templum Coloniae , quod a *Diva Maria Virgine* nomen habet , in quo vidi atque audiavi Virgines ex Nobilitate Colonienſi oriundas , quae horas singulari ac ridiculo fere habitu vestitae , dictum cantare , instar Canoniorum , tenentur . Hae collaria gestant ex subtilissimo linteo , eâ figura , qua Lipsiensium Sacerdotes Sacra administrantes uti solent , confecta , superhumerali ex rarissimo sindone a tergo pendente praeterea ornatae , de caetero a capite ad calcem usque , ad hodiernum Gallicae nationis genium amictae , quod curiosis advenis non nisi rarissimum spectaculum praebere potest . Videri etiam in hac antiquissima Germaniae urbe meretur *Carthusianorum Collegium* , quod *Celsissimus atque Eminentissimus Saxoniae Dux et Cardinalis ex Cizensi Linea* oriundus , Archi-Episcopi vicibus , sedem deferente Bavaro , fungens , erogatis perquam liberaliter ex proprio sumptibus , reficere nuperrime curavit . Fuit enim hoc Collegium , prae reliquis omnibus Coloniae Conventibus , Eminentissimo Principi gratum , utpote quod , tanquam amoenissimum suum secessum , frequentius visitavit , aliquando etiam non sine

summo vitae periculo , quod ipsi a Gallico praedone et conductis aliis quibusdam latronibus , in via illa , quae a palatio ejus ad Carthusiam ducit , uti ex historia temporis nostri pernotum est , imminuit . Prior vel Generalissimus Carthusiani Ordinis nuperrime hoc Monasterium Digito donavit ex reliquiis S. Brunonis desumpto , quod depositum tanto magis aestimatur ab his Monachis , quod Brunonem civem Colonensem olim fuisse , ex historia Ordinis hujus constat .

Colonia FRANCOFURTUM discessi , ubi a *Dno Heister* , Oenopola , cujus cum Filio Amsterodami conjunctissime vixeram , perquam humaniter exceptus , et hospitio dignatus , durante Nundinarum tempore , per decendium fere commoratus sum , Medicos et Pharmacopocos hujus Urbis interea temporis conveniens frequentius . Prae caeteris , Humanissimi Viri *Dn. Nicolai Saltzwedelii* , Pharmacopoci , Officinam instructissimam saepius frequentavi . Hic auri portiunculam mihi monstravit , quam ex plumbo transmutatam nuperrime oculis suis viderat . Artistam Adeptum , hujus metamorphoseos autorem , jam in Westphalia , non procul Monasterio , in pago quodam degere narrabat , quo cum frequens adhuc literarum de rebus Chemicis sibi esse commercium , simul assererat . De Transmutationis modo , cujus non solum oculatus testis sed experimentator etiam fuit , sequentia communicabat : *Chemicus ille , qui arti Pharmaceuticae addictum se profitebatur , Tincturam liquidam fusci coloris , odorem fere admodum olei C. C. de se spirantem , habebat :*
il-

illius beneficio , mediantibus quatuor saltem guttis , drachmam plumbi in verum aurum , 23 Carath et 7½ Gran. in Marca integra continens , transmutabat , plumbo , cui guttas primum superfuderat , modico igne liquefacto . Factum hoc in propriis memorati jam Dni Saltzwedelii aedibus , mense Majo , anno 1702 . In sui memoriam reliquerat Hospiti huic suo , aliquot dictae Tincturae guttulas , quibus postmodum Projectionem ipse felicissime instituit , asservata , in perpetuam rei memoriam , dicta Auri Chemici portiuncula , et vitro , obscura quaedam vestigia liquoris illius fusci cum odore , adhucdum referente . Et ita Francofurti obscura quaedam Chrysopociae vestigia oculis usurpare licuit . Num verò inter veros Artis Auriferae possessores Chymicus ille referendus sit , vel ideo dubito , quod aurum illud transmutatum nondum iustum Obryzi pondus 24 Carath attigerit , cum tamen unanimi Alchymistarum consensu , pondus Auri nativum superari a Chymico illo debeat . Dolenda enim infelix Divinae artis fors , quod tantus numerus muscarum et papilionum vagantium splendorem Solaris hujus luminis radiantem turbet , qui tamen proprias tandem comburunt ipsi alas , et ridiculos cecidunt mures pro montibus aureis , plerisque autem ingenuis Viris , atque illis praecipue , quibus technis suis imposuerant , occasionem suppeditant maledicendi universo Adeptorum coetui , dum , si Atheum , Scurram , Scelestum , Fraudulentum aliquem nominare voluerint , unica Alchymistae voce id proferrant . Tales Imposturas olim mortis sup-

plicio solvit *Bragadinus*, qui postquam Venerorum Senatui imposuerat, a Sereniss. Bavariae Duce suspendio publice punitus fuit; et novissime ille sic dictus *Comes Cajetanus*, qui, nunquam satis laudando Potentissimi Regis Borussiae jussu, eodem supplicii genere hac nostra aetate affectus est. De caetero, uti mihi quidem videtur, fatendum omnino, hinc inde prostare exempla satis illustria et fide digna, ubi sine omni impostura et fraude, mediante Tinctura quadam, vel concentrata in massa mediae consistentiae, vel liquida etiam plumbum vel Mercurius in aurum optimum fuit conversus: nihilominus scrupulus et quaestio remanet, an non, si de projectionis et transmutationis ingenuitate certissimi etiam essemus, Tinctura illa sit *Auri Anima*, ex ipso nobilissimo metallo singulari et arcano artificio extracta, hinc non nisi determinatae quantitati tingendae sufficiens. Quale divinum artificium olim Monachis, qui Orientales Orbis partes incoluerunt, notum fuisse, quidam de Transmutatione Metallorum scriptores Historici asserunt. Verum enim vero quanti ab hoc artificio expectandi sint thesauri, quilibet sanioris mentis homo pervidet facile; nisi forte Augmentationis arcanus processus in auxilium venerit, quo dicta *Auri quinta essentia* vel *Anima* ita exaltari potest, ut una ejusdem pars 16470 mercurii partes tingendo transmutare, testante *Zwelffero in Mantiss. Spagyrica P. 7. c. i. p. 328.* valeat.

Habes hic omnia, *Amice Integerrime*, quae in Itinere meo tam Anglicano quam Batavo notanda, et ab oblivione, facta hac

Re-

Relatione , vindicanda mihi visa sunt . Fortassis nonnulla ex his , si non utilia , grata tamen Tibi erunt , quia Amicitiae Nostrae in Academicis olim contractae , et huc usque per mutuum literarum commercium excultae , tanquam publicum semper extabunt testimonium . Nullum invenies in tota recensione fucum , nihil e mentitum , quae vitia , in hoc scribendi genere , vel maxime vitanda esse existimo . Extra sphaeram meae scientiae et Artis non facile divagatus sum , ita mecum semper statuens , non parum utilitatis redundaturum fore in publicum , si unusquisque cui exterarum regiones visere licet , illa observata , quae Professioni suae et genio congrua sunt , cum publico fideliter communicet , reliqua aliis , ut investigent , relinquens .

S. D. G.



CATALOGUS LIBRORUM NOVORUM

Apud JANSSONIO-WAESBERGIOS
Prostantium

Anno 1711.

Nicol. Bergius de statu Ecclesiae et Religionis Moscoviticae Exercitatio. 8.

Jos. Henr. Opii Hodegeticum Hebraeo-Chaldaeo-Biblicum. 8.

Gottlob. Frid. Seligmanni Exercitationes Historico-Philosophico-Theologicae. 8.

Jo. Henr. Bergeri Supplementa ad Electa Juris prudentiae criminalis Pars II. Accessit Disquisitio, utrum a Principe temperari poena adulterii possit.

4.

Engelberti Burg Orationes et tractatus de abusu commerciorum et Appellationum, Ratione status etc.

4.

Casp. Henr. Hornii de libro Metallico qui antigraphus dicitur Schediasma. 4.

Joan Caroli Naevii de Juramentis, illicitis, Temerariis, inofficiosis etc. 4.

Jo. Freind Emmenologia, in qua fluxus Muliebris Phaenomena, Periodi, vitia, cum medendi Methodo, ad rationes mechanicas exiguntur. 8.

Theod. Valent. Kramer Medicina Docens et ducens. 8.

Joan. Raji Methodus Plantarum emendata, et aucta. Accedit Methodus Graminum, Juncorum et Cyperorum specialis 8.

Bohusl. Balzini Verisimilia Humaniorum Disciplinaryum seu Judicium Privatum de omni quas humaniores vocant Literarum artificio 8.

Dictionary Magnum Latino-Gallicum ad pleniorum Scriptorum Latinerum intelligentiam in usum

- sum Serenissimi Delphini et Principum cura *Petri Danetii*. 4.
- Christ. Gryphii* Apparatus de Scriptoribus Historiam Seculi XVII. illustrantibus 8.
- Pauli Hachenbergi* Germania media. Guliel. Turekii recensuit ac Dissertationem de Geographia Germaniae medii aevi adjecit. 4.
- Joan. Hachmanni* Practica Philosophia, Ethica et Politica. 8.
- Titi Livii* Historiarum corpus concinnius. 8.
- Jacobi Masinii* Palaestra styli Romani, cum brevi Graecarum et Romanar. Antiquitatum Compendio, sectis et Vita Philosoph. etc. 8.
- Commentationes quinque Rabbiorum Raschi, etc. quibus Cap. XLIX. Genes. exposuerunt, in sermonem Latinum conversae studio *Jo. Frederici Losca-*
ni. 4.
- Jo. Andr. Danzii*, Davidis in Ammonitas devictos mitigata Crudelitas. 4.
- Thom. Goodwini* Moses et Aaron, seu Ritus Judaici illustrati, emendati, et aucti studio *Jo. Henr. Hottingeri*. 8.
- Historia veteris Testamenti usque ad Jesum Christum, chronologice proposita, cum discursu de successione Religionis ex Bossueto, studio *Petri Montmedy*. 8.
- Joan. Gustavi Reinbeck* de Redemptione per Lytron tractatio. 8.
- Sulpicii Severi* Historia Sacra, observationibus Philologicis, ad modum *Jo. Minellii*, Illustrata, adjecta est vita Sulpicii. 12.
- Supplementa Homiliarum *Joan. Chrysostomi*, ex Codicibus MSS. eruit latine vertit, & notis Illustravit *Ericus Benzelius*. 4.
- N. Testamentum Graecum ad formam editionis *Leusdeni* additis Locis Parallelis, et variantibus Lectionibus ex XX. Codicibus selectis, cum nova praefatione *A Rechenbergii*. 24.
- Mart. Wieland* Schediasma quo Judas Caenae Domini-

nicae conviva sistitur, cum decisione quaestionis an fas sit Christiano, cum iis quos indignos reputat Coenam Celebrare. 4.

Philip. Knipschildt, de Fidei commissis familiarum Nobilium. 4.

Luderus Mencke Regia via ad virtutem et Jurisprudentiam excolendam. 4.

Guliel. Roslingi Pandectae Juris Cameralis, ex ordinatione Camerae compositae. 4.

Martini Schraderi, de Causis fori Ecclesiastici tractatus. 4.

Christoph. Schreiteri Primae Lineae Juris civilis privati. 4.

Erid. Godl. Struvii Compendium Digestorum juxta seriem pandectarum accedit Memoriale legum antiquarum. 8.

Joan. Bohrii Circulus Anatomico Physiologicus sive Oeconomia Corporis Animalis, accesserunt Dissertationes Physiologicae. 4.

Petri Linsing Tentamen et Examen Medicum Institutum adauctum et Illustratum a *Francisco Low*. 8.

Nicolai Stenonis Musculi Descriptio Geometrica cui accedunt canis Carchariae dissectum caput et dissectus Piscis ex canum genere. 8.

Gregor. Blech Graecae Grammaticae Synopsis, nova Observationum Philologicarum cognitione Illustrata. 8.

Jo. Henr. Boecleri Tractatus Posthumi nempe Historia a mundo condito ad nativitatem Christi, manuale politicum, Discursus ad Lipsii Politica, etc. 8.

Joan. Bunonis Universae Historiae cum Sacrae tum profanae Idea ad praesens usque tempus continuata. 12.

Praeter hos adhuc plures alii in Eadem Officina Extant, uti patet ex Catalogo Novorum Librorum, qui singulis mensibus continuatur, et in eadem Officina prostat.





